

三通考輯要

第二函
五十一册

欽定續文獻通考輯要卷二十五

山陰湯壽潛鑿先恭輯

輿地考臣等謹按馬考因通典之舊以歷代郡國析於九州之中立法最善惟是馬敘千餘年之輿地故由秦漢以迄隋唐但分列各代之州縣以所屬之縣彼此不相聯屬至於宋而後汭流而上遞詳郡縣沿革所自作一總匯良以國代多而積世久其勢難悉數也續考始自南宋之末迄於明時在五六百年之中世數既近則不得援馬考宋以前之例但分列郡縣名目而於因廢增省一無所及也且全唐之地宋與遼分馬氏之世遼史未出故沿革止詳宋地茲則遼史具在自當與宋分卷並列以著唐地西北諸州之歸宿豈可詳於宋而略於遼耶又金則南承宋而北承遼實爲元明一統之過脈尤宜詳注王續改馬氏以九州爲綱之例舉各道爲標已不可謂之續又以明之郡縣爲主而繫遼金元舊跡於其下則是一代之輿圖而不得謂之考不但此也明爲主而於直隸一路冠以大都路夫序代之先後當首遼之號曰南京道據明代之職方當號曰順天府而大都路乃昉於元不知其義奚取今仍以郡縣析入九州而以冀州爲始並從宋真定開章與遼遙對而全唐之舊地沿革始完至各代序列體例悉遵馬氏之舊

古冀州

冀州爲古帝都禹貢不言封略則以餘州所至卽其境舜以南北地大分衛水爲并州燕以北爲幽州其在天文昂畢尾箕爲趙燕之分野兼得秦魏衛之交宋屬河北河東兩路唐多內燕雲爲遼所有至靖康盡入於金

金發跡之所卽秦漢之遼東西郡遼合燕雲建立五京金去中京增設中都咸平等路是皆在兩漢幽州部內
惟元在徼外漠野萬里之地非禹迹所及而與遼接壤距唐松漠都護爲近則亦以幽州順而據焉明自成祖
建都燕京改元中書省爲京師分設山西布政使司而邊境郡縣悉改爲衛古稱西北神明之隩此其徵也
宋初分天下爲十五路天聖析爲十八元豐又析爲二十三宣和又建燕山雲中兩路所領州府軍監之數具
詳前考自靖康以迄嘉定國勢日蹙中原陝右盡入於金東盡長淮西割商秦之半以大散關爲界所存者兩
浙兩淮江東西湖南北西蜀福建廣東廣西十五路而已茲仍全列諸路綜其終始以表金元遞承之所自
河北西路府四州九軍五縣六十三

真定府領縣九

相州仍唐舊又

領縣六

信德府

唐邢州鉅鹿郡領縣八

中山府

唐定州博陵郡領縣八

懷州

仍唐

爲河內郡領縣五

衛州領縣四

磁州領縣四

洛州

仍唐舊又領縣六

深州

仍唐舊又領縣五

祁州領

縣三

慶元府

唐趙州

領縣七

保州

本冀州保塞軍

領縣一

安肅軍領縣一

廣信軍領縣一

永甯

軍領縣一

順安軍領縣一

承天軍

謹按宋志有天威北平二軍無承天軍天威北平已見馬考真定

府并陘縣及定州北平縣注二軍皆仍隸州府故宋志亦不別爲標題但從附錄承天軍據馬考注亦本真

定府地建而史無之若以承天卽天威之誤則馬氏不應兩見豈史氏有漏失耶今從馬氏

河北東路府一州四軍三縣二十

河間府唐瀋州領縣四 雄州本唐涿州瓦橋關領縣二 霸州領縣三 莫州領縣三 冀州領縣七 乾甯軍

領縣一 信安軍 保定軍

河東路府三州十一軍七縣八十二

太原府領縣十 隆德府唐潞州上黨郡領縣八 平陽府領縣十 代州仍唐書又爲雁門郡領縣四 絳州領縣七 按

絳州所治疑尙有聞喜一縣說見河中府 慈州領縣三 隰州領縣六 忻州領縣二 汾州領縣五

澤州領縣六 遼州領縣四 憲州領縣一 嵐州仍唐書又爲樓煩郡領縣三 石州領縣五 謹按前考石州條

云元豐五年置葭蘆吳堡二寨隸本州遂令州帶沿邊都巡檢銜元符二年升葭蘆寨爲晉甯軍以州之隴

泉縣隸焉大觀三年復以定胡縣隸焉與史志合是晉甯一軍當增但既不隸石州則葭蘆非冀地應入雍

州 慶祚軍本潞州趙城地父始封之地 威勝軍本潞州銅鞮縣界 領縣四 平定軍領縣二 甯化軍領縣一 岢嵐軍領

縣一 火山軍 保德軍 謹按前考河東路有大通永利二監序略云宋太平興國四年平太原以并州

交城縣鐵冶建爲監名大通六年以交城及廢沁州之綿上縣爲屬寶元二年以監及交城隸太原府綿上

隸威勝軍又徙鹽務於平晉縣咸平四年建爲監名永利是大通已改屬太原永利亦即在太原屬地明矣

考宋時置監祇爲鑄銅鐵煎鹽而設地即在本郡邑之中故馬氏不載而獨錄此二監豈以大通曾有領縣

故耶然既改歸太原則固不應別列與諸州齒

陝西永興軍路府一州一軍一縣八

河中府領縣八 謹按開喜自漢以來屬河東郡隋分立絳郡開喜隸焉唐改郡爲州而開喜之隸絳如故後唐以河中府之稷山來屬加本州原隸七縣爲八前考誤以稷山足七縣之數而反遺舊隸之開喜矣於解州條下云五代漢以河中府解縣置州又以安邑開喜來屬不知開喜自何而來宋志殆仍其誤而不及詳與 解州領縣三 慶成軍領縣一 謹按前考大中祥符四年於河中府寶鼎置慶成軍緣直隸京師而得與諸州並列益知前天威北平晉甯三軍之均受隸於州府故不特書非遺之也

京西北路州一縣六

孟州

古孟津地漢屬河內郡

縣六

謹按唐書河北道首孟州而懷州次之并志云古幽冀二州之域孟懷瀋衛爲

媿皆分是孟州之宜入於此無疑而前考獨遺之若以所屬縣舊隸洛州應歸豫州河南府都內而豫州又復遺之且一州遺而所屬之六縣並沒所謂陽樊溫原之田竟安在乎查六縣中惟王屋一縣前考見豫州河南府條下並云熙寧後隸孟州則孟州之不可遺益明茲據宋志增入此州并合唐書核其緣始及屬縣之所自來分而注之至於汜水河陰地應屬豫而以所領者爲主又以少就多不得不然是亦前考此門之通例也 又按馬考此下附錄營平檀薊幽涿順僞蔚朔雲易應新儒武單于大都護府凡十六州一府蓋以爲雖非宋有而宋與唐正朔相嬗姑存唐職方之舊文耳自今觀之宋遼金三國興亡之介實繫於此蓋

遼失十六州而後國不可爲宋惟用童蒙之謀貪復十六州而後與金併力適以自禍金因之而并有河北河東諸路此其大較也今將敘遼與金與地之沿革當從宋開燕山前後路發端故根據宋志別爲立綱疏目詳列於後至於單于大都護府則於宋無與故不錄

燕山府路府一州九縣二十六

燕山府卽幽州領縣十二 涿州領縣四 檀州領縣二 易州領縣三 順州領縣一 薊州領縣三 景

州領縣一 經州 平州 營州 謹按以上一府九州所謂山前九州也宋志宣和五年金以其地來歸

內除景州經州卽薊州分設應歸薊州數內凡山前路復唐舊地燕涿檀易順薊六州雖不久仍入於金而來歸已及三載登入宋版尙不爲失實惟營平二州並未歸宋考之五代史石晉所賂十六州曰幽薊涿檀瀛莫順新雲蔚武應朔媯儒寶而無營平易三州蓋易州陷於宋雍熙四年不在石晉所賂之數營平則唐承逆藩劉仁恭以遺契丹原非失自石晉所以宣和求地之時金亦以此爲辭固不畀宋自不得以諸州會一屬宋者爲比然宋已於宣和四年預建虛號設官遙領故宋志亦附於燕山府路之後今姑存之

雲中府路府一州八

雲中府 武州 蔚州 應州 朔州 新州 儒州 媯州 歸化州 謹按以上一府八州所謂山後

九州也內武蔚於宣和五年歸六年陷雲應朔於五年歸旋陷其新儒媯歸化四州大約於平營一例名爲

遼領并未暫歸故一切從略

遼之先曰契丹居遼澤中當元魏時有地數百里唐初爲大賀氏曰靺鞨者露食扶餘室韋等國地方二千餘里貞觀三年置松漠都護府以其地建八部爲州州置刺史以靺鞨爲使持節督諸州軍事五代遼皝氏闢地東西三千里置縣四十有一縣置令太祖代遼皝氏起臨潢遼志臨潢本漢遼東西安平之地按後漢志西安平注曰縣北有小水南流入海遂建都爲東井渤海南取石晉所賂燕雲十六州之地於是始大兄弟趙宋而朝吳越矣太宗以臨潢爲上京幽州爲南京遼陽爲東京聖宗城大定府爲中京興宗升雲州爲西京五京既具幅員萬里凡京五府六軍州城百五十有大縣二百有九

上京道府一州十一縣三十城一

臨潢府領縣十 謹按遼初置縣率以征伐所俘人戶徙之皇都置縣居之命名多以意創前此未有然徙

戶雖昉自太祖而置縣不必卽其時也 祖州領縣二城一 懷州領縣二 慶州本黑河地領縣三 按唐志

有黑水都督疑卽駐此地 秦州本二十部族地初名黑風州後改領縣三 長春州本鴨子河地領縣一 烏州本烏丸地領縣一

永州領縣三 儀坤州本回鶻地以太祖后舒贈氏生此故名后自置領縣一 龍化州漢北安平地以始祖奇善汗居此故名領縣一 降聖

州本遼澤大部落東樓地以太祖生此故名之領縣一 饒州領縣三 謹按遼史上京道蓋漢遼東郡西安平之地貞觀三年

以其地置元州尋置松漠都督府大率多於內州爵治而又廢置不常迄於遼太祖時州縣名悉非其舊欲

雖指其爲唐時某地如饒樂歸誠之屬蓋亦不可多得矣特其統名則在松漢之間隸幽營之部參觀二史之志亦可粗得其崖略焉

徽州 成州 懿州 渭州 壕州 原州 福州 橫州 鳳州 遂州 豐州 順州 閩州 松山州 豫州 甯州 謹按上十有六州所謂頭下城也頭下城者諸王大臣及諸部從征所俘略人戶許各置州縣以居之惟橫帳諸王國舅公主得建城郭餘則否朝廷賜州縣額其節度使命自朝刺史以下本主得以部曲充焉征稅各歸頭下惟酒課納上京鹽鐵司蓋有人此有土有土此有財創業之初務以人實地令本主得自建城收其賦稅則人爭用命而又人自爲守此雄霸之略宜其凌厲五代抗衡趙宋而懾服吳越南唐幾有混一之勢也第既別爲頭下州則與經制之州微異故準遼志附於十一州之後

靜州 鎮州領縣二 河董城 靜邊城 皮被河城 招州 達蘭主城 謹按上三州四城遼西北防邊城也東南至上京或千餘里或三千餘里視頭下諸城又加遠矣茲準遼志以足上京一路云 又按馬氏以九州繫郡縣間有侵溢他州者如冀州之錯出青堯亦不得不然特從其數之贏者標識之耳全遼爲古幽營二州之地則錯出於青矣茲類入於冀者據晉地理志舜以冀州地大分燕以北爲幽州而前後漢書遼東郡並隸幽州部內所謂就其贏數也

東京道府八州五十七屬州二十一屬軍一縣八十城二

遼陽府

本高麗平壤城

領縣九

開州本高麗慶州渤海曰龍原府

領縣一州三州領一縣

定州領縣一

保州領縣一州一

軍一

辰州

唐破高麗蓋牟城置蓋州即辰州以辰韓爲名

領縣一

盧州領縣一

來遠城

鐵州領縣一興州湯州

漢襄平縣地

崇州領縣一

海州

本沃沮國地高麗沙卑城

領縣一州二州領一縣

涿州

渤海曰鴨綠府領縣二州四州領一縣

顯州領縣三州三州領縣二

宗州領縣一

乾州領縣四州一州領一縣

貴德州領縣二

藩州

故州本挹婁國地

領縣二州一州領一縣

集州領縣一

廣州領縣一

遼州

本拂遼國城領縣二州一州領一縣

遂州

渤海曰美州

領縣一

通州

本扶餘國城太祖初建龍州

領縣四

韓州

本婁離國領縣一

雙州領縣一

銀州領縣三

同州領縣二

咸州領縣一

信州領縣二

賓州

黃龍府

本渤海扶餘府太祖平渤海還有黃龍見改名

領縣三州五州領一

縣 謹按天下郡縣昉自兩漢立名者十之七八中間千餘年或瓜分鼎峙或南北書疆名號紛加不可紀

極至於隋唐一統而後漸就整齊故欲考郡縣之顛末必以漢唐爲斷自全唐之地分爲遼宋幾與南北朝

等遼東京路大率本唐所有而唐末衰亂中更渤海竊據改置郡邑多非其舊中有爲漢唐舊地可考者必

注明漢唐某地或曰漢置唐置而出自渤海大氏所建置則準漢書之例但云某曰某府某州某縣不以創

置之名予僭號者蓋以有創卽有承以遼承唐與宋遙對所以明其規模之大而非一切偏安者所得比也

中京道府二州六屬州十六縣四十二

大定府

漢遼西郡唐置饒樂都督府統和二十五年建爲中京改今名

領縣九州十州領十二縣

興中府

即營州領縣四州二州領二縣

宣州領縣二 錦州領縣二州一州領一縣 川州唐書山州地會同三領縣三 建州唐書領縣二 來

州領縣一州三州領三縣

南京道府一州一屬州八縣三十二

析津府唐幽州范陽郡太宗升爲領縣十一州六州領十四縣 謹按馬考燕山府有薊幽都廣平三縣宋

志無薊幽都而有廣平都市三河三縣薊與幽都經遼改名乃宣和五年自薊州來屬本在遼失幽州之後

此處自不應有惟廣平都市二縣則了無歸宿查唐志廣平注云天寶初析薊置尋省至德後復與馬考合

不知其後又廢於何年而史失之耳都市或卽幽都之誤故馬考亦無之大抵卽宛平縣地也 又按遼志

順州漢范陽地隋開皇中厥稽部長率八部自扶餘城西北舉落內附置順州以處之唐改燕州後仍爲順

州是順州卽今之順義故隸析津府而唐志云貞觀四年平突厥置六年僑治營州南之五柳城後復僑治

幽州城中縣一曰賓義或謂此別自一順州故編入羈糜州數內若卽是隋之順州何煩僑治此說非也蓋

隋末河北率爲突厥所據而新破之後未便置吏故從僑治豈有二地哉 平州領縣三州二州領四縣

西京道府一州六屬州六軍一縣三十一

大同府領縣七州二州領三縣 奉聖州領縣四州三州領三縣 蔚州領縣五 應州領縣三 朔州唐

邑領縣三州一州領一縣 東勝州隋置勝州唐於南清地置決勝州故此加東字領縣二 金肅州 河清軍 謹按遼西南兩

與地考 通雅堂藏板

京卽石晉所賂十六州而宋宣和中所號爲山前後路者是也內無瀛莫寶三州者寶於後唐明宗時早歸入應州部而瀛莫則周世宗已復取之宋河間文安郡卽此一州之地世謂十六州歷漢周末不復者亦大概之辭未暇詳爲別白耳

金之壤地包裹全遼繞出天山之外西臨積石循山南左折而東逾臨洮至大散關取淮之中流爲界而與宋爲表裏天會八年太祖大破遼兵肇基王迹天眷八年卽海古之地建號上京尋取十六州於遼取河北河東於宋建五京置十四總管府是爲十九路其散府九節鎮三十六防禦二十二刺史郡七十三軍十有六縣六百三十二後復盡升軍爲州或升城堡寨鎮爲縣是以金之京府州凡百七十九縣加於舊五十一城寨堡關百二十一鎮四百八十八營全遼盛時未之或逮也

上京路府一州三路五司一縣六鎮二

會甯府

本海古地金太祖興於此初爲會甯州太宗天眷元年升爲府號上京

領縣三

肇州領縣一

隆州

遼府

領縣一鎮一

信州領縣

一鎮一

蒲興路

海蘭路

率賓路

哈斯罕路

呼爾哈路

烏庫哩烈

亦一路也置招討司故不名路

咸平路府一州一縣十

咸平府領縣八

諱州領縣二

東京路府一州六路一縣十九鎮五

遼陽府領縣四鎮一 澄州領縣二鎮一 瀋州領縣五 貴德州領縣二 蓋州領縣四鎮二 復州領縣二鎮一 永遼州 博索府路

北京路府四州十縣四十二鎮十寨堡五十六

大定府領縣十一鎮二 利州領縣二鎮一寨一 義州領縣三鎮一 錦州領縣三 瑞州領縣三鎮一 廣甯府領縣三鎮二寨四 懿州領縣二 興中府領縣四鎮三 建州領縣一 全州領縣一 臨潢府領縣五堡三十七 慶州領縣一 興州領縣二 泰州領縣一堡十九

西京路府二州十四縣三十六鎮九

大同府領縣七鎮三 宏州領縣二鎮二 淨州領縣一 桓州領縣一 謹按遼有桓州隸東京道涿州入金並廢則此桓州與淨撫二州在大同之北皆金所創設者非卽遼之故州也 撫州領縣四 謹按金史志云遼秦國長公主建則此亦如頭下城徽州懿州之屬公主以所賜媵戶置耳但此等州皆以恩澤私置毋容詳其沿革而獨於此州追繫公主某建則殊失史氏之體故酌改爲遼舊州可矣且遼志諸媵州中並無撫州或實自金章宗創置而志誤云然未可知也 德興府領縣六鎮一 昌州領縣一 宣德州領

縣二 朔州領縣二 武州領縣一 應州領縣三 蔚州領縣五 東勝州領縣一鎮一

中都路府一州十三縣四十九鎮七

大興府領縣十鎮一 通州領縣二 蔚州領縣五鎮二 易州領縣二 涿州領縣五鎮一 順州領縣

二 平州領縣五鎮一 灤州領縣四鎮二 謹按上一府七州除平灤二州外金嘗以其地歸宋所謂山

前路等州是也然不久仍入於金是金於此數州直僑寄於宋耳故此處沿革仍承遼注而不復參之以宋

云 雄州領縣三 霸州領縣四 保州領縣二 安州領縣三 遂州領縣一 安肅州領縣一

河北東路府一州六縣十九鎮二十三

河間府即瀘州領縣二鎮三 益州領縣一鎮一 冀州領縣一鎮一 獻州領縣二鎮十 冀州領縣五鎮

六 深州領縣五鎮一 清州領縣三鎮一

河北西路府三州七縣十鎮二十九

真定府領縣九鎮三 威州領縣一 沃州領縣七鎮一 邢州領縣八鎮四 洛州領縣九鎮四 彰德

府宋相州領縣五鎮五 磁州領縣三鎮八 中山府宋定州領縣七鎮二 祁州領縣三 衛州領縣五鎮二

河東北路府一州十二縣三十九鎮四十堡一

太原府即并州領縣十一鎮八 晉州 謹按宋晉州即平陽府此別自一晉州金興定中以并州壽陽縣西

張寨地置。忻州領縣二鎮四 平定州宋平定軍大定二年升州領縣二鎮三 汾州領縣五鎮二 石州領縣六鎮

四 代州領縣五鎮十三 夔州宋火州領縣一鎮一 甯化州宋甯化軍領縣一鎮一 嵐州領縣三鎮四 岢

鳳州宋保德軍領縣一堡一 保德州宋保德軍領縣一 管州領縣一

河東南路府二州十縣六十九鎮三十關六

平陽府即晉州領縣十鎮一 隰州領縣六關四 吉州宋慈州領縣二 河中府領縣七鎮四 絳州領縣八

鎮五關一 絳州領縣六鎮四 澤州領縣六鎮二 潞州領縣八鎮四 遼州領縣四鎮一關一 沁州

宋威勝軍領縣四鎮一 懷州領縣四鎮六 孟州領縣四鎮二 原二百二十九

元起朔漢併西域巨高麗定南詔遂下江南而天下爲一其地北踰陰山西極流沙東盡遼左南越海表東南所至不下漢唐而西北則過之有難以里數限者矣世祖至元十三年平宋全有版圖立中書省一行中書省十有一路一百八十五府三十三州三百五十五軍四安撫司十五縣一千一百二十七大抵以路領府府領州州領縣或有府視路而不隸路又有府與州皆不隸路而直隸省者此又郡縣之一變而後世幾不能越其範圍有其舉之莫之能廢勢使然也

中書省路二十二屬府四屬州七十一縣二百三十八

大都路金大興府領縣六州十州領十六縣 上都路唐奚契丹地領縣一府一州四州領三縣府領三縣二州州領

六縣 興和路金撫州領縣四州一 謹按元志本路屬縣但云初隸宣德府中統三年來屬查金志惟大同

府有懷安天成二縣不知何時改屬宣德而高原威甯並無其名又查金撫州屬縣與此全異豈威甯卽金

威甯高原卽金柔遠所改而豐利省入二縣集甯別升爲路與又金宣德州元改順甯府亦不當云宣德府也 永平路金平州領縣四州一州領二縣

德甯路領縣一 淨州路領縣一 秦甯路領縣一 集甯路領縣一 應昌路領縣一 全甯路領縣一

甯昌路領縣一 砂井總管府領縣一 謹按元志云以上七路一府八縣皆闕謂不詳其沿革也查淨州及天山本仍金舊集甯則金撫州屬縣元於何時升置改隸今無可考 又按砂井總管府前綱不列於諸府數內或亦名爲府而地屬偏遠借名以資彈壓無其實也

保定路金保州領縣八州七州領十一縣 謹按以上十二路兩府直隸中書省其燕南之河北河東等路則

又置肅政廉訪司及宣慰司以統率之而司仍隸於省也 燕南河北道肅政廉訪司 真定路金真定府領縣

九府一州五府領三縣州領十八縣 順德路金邢州領縣九 廣平路金滹州領縣五州二州領六縣 彰德

路金彰德府領縣三州一 懷慶路金懷州領縣三州一州領三縣 衛輝路金衛州領縣四州二 河間路金河間府領

縣六州六州領十七縣 河東山西道宣慰使司 大同路金大同府領縣五州八州領四縣 河東山西道肅

政廉訪司 冀甯路金太原府領縣十州十四州領九縣 晉甯路金平陽府領縣六府一州九府領六縣州領四十

縣

遼陽行中書省路七府一屬州十二縣十二鎮一

遼陽路金遼領縣一州一 廣甯府路金廣領縣二

肇州 謹按金肇州在鴨子河黑龍江之地此肇州不知是否元大一統志與經世大典皆不載故宋濂疑之附於廣甯府之下注云元世祖於阿巴拉呼之地立城名曰肇州則或別是一肇州姑存備考

山北遼東道肅政廉訪司 大甯路金大領縣七州九 謹按金北京路有臨潢府全慶泰三州入元並廢

瀋陽路金瀋開元路金會 謹按元志開元路即金會甯府又云開元萬戶治黃龍府考遼黃龍府金

改爲隆州非會甯也開元西北曰會甯府西曰黃龍府是會甯黃龍與開元相近而非即開元地也今姑從

元志 咸平府 謹按金咸平路有韓州一州 合蘭府碩達勒達等路金扶餘海蘭等實呼爾哈等路及肇隆三州之地 東甯

路本高領縣二鎮一 謹按元志東甯路本高句麗平壤城漢樂浪郡地也唐征高麗拔平壤其國東徙千

餘里至元六年高麗李延齡等以其地六十餘城來歸立東甯府後升爲路據此則東甯即遼陽而別爲東

甯者考遼太祖破遼陽以爲東丹國又葺遼陽故城置東平郡遷東丹國民居之是遼陽曾析爲東平其後

既建東京則省京平入遼陽耳元仍析遼陽置此路以轄高麗新附之衆必以燕南已有東平路故名此爲

東甯理固宜然也

征東行中書省府二司一勸課使五

高麗軍民總管府 耽羅軍民總管府 征東招討司 各道勸課使 慶尙州道 東界交州道 全羅

州道 忠清州道 西海道 謹按此以高麗國都置行省卽以高麗王爲之號左丞相雖分設官司亦卽用其國人如各路郡縣之置吏入版者有異故元志附錄於各道行省之末

明太祖起淮右首定金陵以次削平諸夏其地東極朝鮮西接土蕃南至安南北距大磧東西一萬一千七百五十里南北一萬九百里於是改元行中書省爲布政使司凡爲直隸者二爲布政司者十三府百有四十州百有九十三縣一千一百三十八又羈縻府十九州四十七縣六而兩京都督府分統各都指揮使司十六行都司五留守司二衛四百九十三所二千五百九十三守禦千戶所三百一十五又土官宣慰司十一宣撫司十安撫司二十二招討司一長官司一百六十九蠻夷長官司五用以安內禦外經理綏密矣

北直隸府七直隸州二屬州十六縣二百六

順天府領縣七州五州領十五縣 保定府領縣十二州三州領五縣 河間府領縣十州二州領六縣

真定府領縣十一州五州領十六縣 順德府領縣九 廣平府領縣九 永平府領縣四州一州領一縣

延慶州領縣一 保安州

萬全都指揮使司 元順德府 衛十五守禦千戶所四堡五

北平行都指揮使司 元上都路 衛二十二守禦千戶所三

遼東都指揮使司 衛三十州一 謹按明萬全北平遼陽三都指揮使司在元爲上都興和二路及遼陽行省

之地內惟保安與蔚仍舊州名分隸北直山西餘則盡廢郡縣改爲衛所凡沿革可考者已各條析注明除淨州路省入東勝外惟有砂井一府志無明文未知省入何地至於合關府碩達勒達等路入明置都司一衛一百八十四所二十雖立官長大率僅存空名故與凡立衛所而無實地者並據明志不錄

山西布政使司府五直隸州三屬州十六縣七十八

太原府領縣十三州五州領七縣 平陽府領縣十二州六州領十六縣 汾州府領縣六州一州領一縣

潞安府領縣八 大同府領縣二州四州領五縣 澤州領縣四 沁州領縣二 遼州領縣二

山西行都指揮使司衛十七守禦千戶所六

河南布政使司府三屬州一縣二十

懷慶府領縣六 衛輝府領縣六 彰德府領縣四州一州領二縣 謹按以上據馬氏所按古冀州地合

之幽營二州之城詳列明代郡縣

原二百三十

古兗州

兗州東南據濟西北距河自二漢以後迭置兗州馬氏謂其所領郡國非盡古州疆域多有侵溢然漢理昌邑在宋爲濟州金鄉魏晉理廩邱在宋爲濮陽雷澤劉宋理滑州在宋爲滑州靈河郡皆不出河濟之間則禹跡之舊居然可按也前考一以禹貢爲據其在天文營室東壁爲衛之分野兼得魏宋齊趙之郊宋以其地屬京

東京西北諸路建炎後沒於金分爲河北山東及大名三路至元直隸中書省明成祖建都燕京以河間之景滄二州及大名府開州隸京餘屬山東布政使司但兗地與冀徐豫三州接壤故其地往往錯見如成安非兗地而入載禹城本兗地而別屬之類大都以其所領者爲主而屬邑則不復割裂馬氏所謂本非州之區域則以鄰接附入者是也

宋京西北路州一縣四

滑州

仍唐舊又爲靈昌郡領縣四

京東西路府一州二縣十四

濮州領縣四 濟州領縣四

謹按四縣皆古徐州地而馬氏載入兗州者禹貢濟河惟兗州濟州屬邑固

與兗地相錯也 東平府

唐鄆州

領縣六

謹按鄆州屬京東西路馬氏列於魏博二州之後未便省覽今類

登於此

河北東路府二州六軍一縣四十九

大名府

唐魏州周爲天維軍宋慶曆八年復置大名府號北京

領縣十五

謹按府屬舊有南樂朝城二縣後改隸開德府馬考復列

今刪 博州領縣四

德州領縣三

謹按唐志有將陵安陵二縣考宋志景祐二年省安陵縣入將陵改

屬承靜軍馬考復列今刪

棣州領縣三

濱州領縣二

滄州領縣七

恩州

唐清河郡領縣五

開德府

州唐景領縣七 永靜軍唐景領縣三

河北西路州一縣二

滑州即通利軍領縣二

金河北東路州二縣十二鎮十五

●滄州領縣五鎮十一 景州領縣六鎮四

河北西路州二縣四鎮四

滑州領縣二鎮一 滑州領縣二鎮二

山東東路州二縣七鎮十九

濱州領縣四鎮十 棣州領縣三鎮九

山東西路府一州四縣二十一鎮四十一

東平府領縣六鎮十九 濟州領縣四鎮二 博州領縣五鎮十一 泰安州宋兗州奉符縣領縣三鎮二 謹按

三縣皆古兗州地而馬氏於宋代不列入者以宋分隸古徐州之兗沂二州不得割裂別載金大定中置泰

安專州以三縣爲屬故類登於此 德州領縣三鎮七

大名府路府一州三縣二十鎮二十三

大名府即魏州領縣十鎮十三 恩州領縣四鎮六 濮州領縣二鎮三 開州即滑州領縣四鎮一

元中書省路三州六屬州八縣五十八

燕南河北道肅政廉訪司 大名路領縣五州三州領六縣 河間路本路治地在冀詳見冀州其屬州在兗者滄州景州 東平路

領縣六 東昌路領縣六 濮州領縣六 高唐州領縣三 泰安州領縣四 德州領縣五 恩州 冠

州 山東東西道肅政廉訪司 濟南路府治在青詳見青州其屬州在兗者棣州濰州

明北直隸府一屬州三縣十六

河間府府治在冀詳見冀州其屬州在兗者景州滄州 大名府領縣八州一州領縣二

山東布政使司府一屬州九縣三十四

濟南府府治在青詳見青州其屬州並在兗地列後 泰安州領縣二 德州領縣二 武定州領縣四 濱州領縣三 兗州

府府治在徐非古兗州也詳見徐州其屬州在兗者濟南州 謹按元升金濟州為濟甯路又別置濟州增屬碭山魚臺等縣皆古徐豫

二州之地故不載入兗州部內至明則省任城縣入州割金鄉縣隸兗州府餘仍宋金之舊則與兗地相錯

故依馬氏敘入 東平州領縣五 東昌府領縣七州三州領八縣 謹按此卷編次古兗州地而宋金元

三朝郡縣中皆無兗州之名蓋自隋改兗州為滑州後雖復為兗州旋即廢罷唐亦相仍為滑州而宋因之

又自唐迄宋別置兗州於古徐州之域而古兗州之名實愈清幾於無可別白馬考雖據禹貢以濟河之間

爲堯其後來改置之兗州則歸入於徐州而後古兗州之在此而不在彼較然明矣今於金元二朝悉從馬氏之例惟明以兗州領濟寧二州則不得不於二州之上出其府名而仍於徐州部內詳載其所屬州縣之數所謂兗州可移而濟河之兗州不可移也

古青州

青州東北據海西南距岱其境直跨海表舜因分置營州凡遼東樂浪元菟等郡悉屬其地考之天文虛危則齊之分野宋屬京東東路金爲山東東路元直隸中書省明隸山東布政使司此皆與海相接者也若夫跨海而東其地應歸青州者據晉地理志舜分燕北爲幽州而前後漢書遼東郡並隸幽州部內則古已併營而入於幽矣

宋京東東路州六府一縣三十一

青州領縣六 濰州領縣三 濟南府領縣五 淄州領縣四 密州領縣五 萊州領縣四 登州領縣

四 謹按前考登州下有安東都護府其說略云舜分青州爲營州置牧遼水之東漢武以其地置元菟樂

浪朔方等郡唐置安東都護府此馬氏自明其以遼地入青之原委耳茲考據書傳及晉地理志舜以冀州

地大分燕以北爲幽州兩漢遼東西並入幽州部內是幽州卽冀州而漢時并營入幽更無可疑至於安東

都護唐之中葉已廢於宋更無與也

金山東東路府二州六縣三十六鎮五十五

益都府

宋青州金
更名升府

領縣七鎮七

濰州領縣三鎮一

密州領縣四鎮三

濟南府

即青州
仍宋舊

領縣七鎮二十

九 淄州領縣四鎮六

萊州領縣五鎮一

登州領縣四鎮一

甯海州領縣二鎮二

元中書省路三州一屬州六縣三十一

山東東西道宣慰司

益都路領縣六州八州領十五縣

濰州領縣二

膠州領縣三

密州領縣二

博興州 謹按益都路領州八其莒沂滕嶧四州及所屬八縣詳後徐州

山東東西道肅政廉訪司

濟

南路領縣四州二州領七縣 謹按濟南路領棣濱二州及所屬七縣詳前兗州

般陽府路

即濰州

領縣四

州二州領八縣 甯海州領縣二

明山東布政使司府四屬州三縣三十八

濟南府領縣十五州四州領十一縣

青州府領縣十一州一州領二縣

萊州府領縣一州二州領四縣

登州府領縣六州一州領一縣

古徐州

徐州東至海北距岱南及淮其在天文奎婁爲魯之分野兼得宋齊吳之交宋分爲京東淮南諸路金改屬南京及山東東西三路其海泗二州屢得屢失元以其地隸中書省明惟兗州莒州隸山東布政使司餘州屬

南京但徐州屬邑往往侵溢他州如濟陰定陶等縣割載豫之曹州鉅野鄆城等縣割載兗之濟州考濟州至元代又增豐沛等縣則更逾兗而南矣茲特改歸本州其餘壤地相錯者則仍馬氏之舊云

宋京東西路府一州一縣十二

徐州領縣五 襄慶府 卽兗州 領縣七

京東東路州一軍一縣七

沂州 仍唐舊又爲鳳陽郡 領縣五 淮陽軍領縣二

淮南東路州三軍三縣十五

泗州領縣三 謹按宋志有虹淮平二縣而無盱眙招信蓋由紹興以後虹自宿州來屬又析臨淮地置淮平縣而盱眙招信二縣則并於揚州之天長置盱眙軍尋又改爲招信軍馬氏載盱眙招信而不載虹淮平從其始也然虹縣自存於原治之宿州而淮平遂以不著異日金之淮平何所自來故依宋志增 海州領縣四 宿州領縣五 濉水軍領縣一 淮安軍領縣一 清河軍領縣一

金南京路州二縣八鎮十四

宿州領縣四鎮八 泗州領縣四鎮六

山東東路州三縣十鎮九

沂州領縣二鎮三 海州領縣五鎮四 莒州領縣三鎮二

山東西路州四縣十三鎮六

徐州領縣三鎮五 邳州領縣三 滕州領縣三鎮一 兗州領縣四

元中書省路一屬州六縣二十二

燕南河北道肅政廉訪司 濟甯路領縣七州三州領九縣 濟州領縣三 兗州領縣四 謹按濟甯路

領州三其單州一州及所屬二縣詳後豫州 山東東西道宣慰司 益都路 本路治地在青詳見青州其屬州在徐者莒州沂州滕州

州

河南江北行中書省府一屬州六縣十三

河南江北道肅政廉訪司 歸德府 府治在豫詳見豫州其屬州在徐者徐州宿州邳州 淮東道宣慰司 江北淮東道肅政廉訪

司 淮安路 本路治地在揚詳見揚州其屬州並在徐地列後 海甯州 金海州 領縣三 泗州領縣五 安東州 金漣水縣隸海州

明南直隸州一屬州四縣十

鳳陽府 府治在揚詳見揚州其屬州在徐者泗州宿州 謹按元宿州屬歸德府歸德爲豫州之境而宿州合淮河之水自應入徐

然以隸鳳陽亦未合也 淮安府 府治在揚詳見揚州其屬州在徐者海州邳州 徐州 直隸京師 領縣四

山東布政使司府一屬州二縣十五

兗州府領縣十一州四州領十二縣 沂州領縣二 謹按兗州府領州四其擠甯東平二州及所屬八縣

詳前兗州曹州一州及所屬二縣詳後豫州 青州府 府治在青詳見青州其屬州在徐者皆州

古揚州

揚州北據淮東南距海其在天文斗爲吳之分野兼得楚及南越之交當宋全盛時爲淮南東西江南東西兩浙及福建諸路而廣南之潮州梅州亦屬其境南渡後遷都臨安與金以淮流爲界惟壽州下蔡一縣沒於金然下蔡在淮北本古豫州地故全揚之域金皆無與焉元以其地隸河南江北江浙江西等省明太祖發迹金陵建南京於應天府統府十四餘屬江西浙江福建布政司兼得河南湖廣之地此宋元明揚州疆域之大略也若其南廣東廣西二路皆非禹跡所及故馬氏置之南越部中但宋後開拓日多如雲南諸境皆在九州之外必盡分卷別敘似非以九州爲綱之義茲準馬氏隣接附入之例割其境連揚州者詳載於後

宋淮南東路州六軍一縣十八

揚州領縣二 泰州 唐揚州海陵縣 領縣三 通州 本唐鹽亭 領縣二 真州 本唐揚子縣白沙鎮 領縣二 高郵軍領縣二

楚州 唐淮陰郡 領縣四 滁州領縣三

淮南西路府一州六軍一縣二十九

濠州 仍唐舊又壽州 領縣一 壽春府 即唐壽州 領縣五 和州 仍唐舊又爲歷陽郡 領縣三 廬州領縣三 無爲軍領縣三

安慶府

即舒州
同安郡

領縣五

蕪州領縣五

光州領縣四

江南東路府二州五軍二縣四十三

甯國府領縣六

建康府領縣五

池州領縣六

太平府領縣三

廣德軍領縣二

徽州領縣六 饒

州領縣六

信州領縣六

南康軍領縣三

江南西路府一州六軍三縣五十三

江州領縣五

謹按江州本古荆揚二州之境彭蠡以東爲揚州九江以西爲荊州馬氏以其壤地相錯故

併列於此

隆興府

即洪州
豫章郡

領縣八

撫州領縣五

吉州領縣八

袁州領縣四 贛州

唐虔州南康郡

領縣十

建昌軍領縣四

臨江軍領縣三

南安軍領縣三

浙西路府五州二軍一縣三十九

鎮江府

即潤州又謂之南
霽州又爲丹陽郡

領縣四

常州領縣四

江陰軍領縣一

平江府

即蘇州

領縣六 嘉興府

即秀州

領縣六

臨安府

即杭州
餘杭郡

領縣九

建德府

即唐睦州
新定郡

領縣六

浙東路府三州四縣四十二

紹興府

即唐越州
會稽郡

領縣八

慶元府

即唐
明州

領縣六

台州領縣五

處州領縣七

瑞安府

唐溫州
永嘉郡

婺州領縣七

衢州領縣五

福建路府一州五軍二縣四十九

建甯府領縣七 福州領縣十三 泉州領縣七 漳州領縣四 汀州領縣六 南劍州領縣五 邵武

軍領縣四 興化軍領縣三

廣南東路州二縣四

潮州領縣三 梅州

本潮州程鄉縣領縣一

揚州南境 謹按以下所載郡縣自廣州至新州屬廣南東路自高州至萬安州屬廣南西路馬氏並列

南越部中茲準鄰接附入之例詳載本州然其地在九州之外故特標南境以別之後荆揚二州倣此

廣南東路府三州八縣三十六

廣州領縣十 韶州

仍唐舊又爲紹興郡領縣六 南雄州領縣二 英德府領縣二 又按以上三州一府舊以爲

古荆州地蓋因韶英二州曾屬桂陽郡而雄州又自韶分出故有此誤其實三州皆越故地漢以前因隸南

海郡班固以爲牽牛婺女之分野者是也一統志改爲揚州之域當矣但自古五嶺之南皆非禹跡所及故

不入揚州正域而附載於揚之南境 循州領縣三 惠州領縣四 南恩州領縣二 肇慶府領縣二

德慶府領縣二 封州領縣二 新州領縣一

廣南西路州十軍二縣二十一

高州仍唐舊又為高涼郡

領縣三

化州唐潯州陵水郡

領縣三

雷州仍唐舊又為海康郡

領縣三

南甯唐儋州安化郡

領縣三

吉陽

軍即崖州

領縣二

瓊州領縣五

萬安州領縣三

春州

寶州

羅州

潘州

崖州 謹按五州皆宋

已廢之州然既嘗建立州名不得概從刪略茲據馬氏所載列於諸州之後荊州南境倣此

元河南江北行中書省路大府一屬州十縣五十一

河南江北道肅政廉訪司

汝甯府

府治在豫詳見豫州其屬州在揚者光州

新州路領縣五

淮西江北道肅政廉訪司

廬

州路領縣三州三州領八縣

安豐路領縣五州一州領三縣

安慶路領縣六

淮東道宣慰司

淮東道肅政廉訪司

揚州路領縣二州五州領九縣

淮安路

宋楚州

領縣四州三州領八縣

謹按淮安

路領海甯泗安東三州及所屬八縣詳前徐州

高郵府領縣三

江浙行中書省路三十府一州二屬州二十六縣一百四十四

江南浙西道肅政廉訪司

杭州路領縣八州一

湖州路領縣五州一

嘉興路領縣一州二

平江路

領縣二州四

常州路領縣二州二

鎮江路領縣三

建德路領縣六

松江府領縣二

江陰州 浙

東道宣慰使司

慶元路領縣四州二

衢州路領縣五

浙東海右道肅政廉訪司

婺州路領縣六州

一 紹興路領縣六州二

温州路領縣二州二

台州路領縣四州一

處州路領縣七、江東建康道

肅政廉訪司

甯國路領縣六

徽州路領縣五州一

饒州路領縣三州三

江南諸道行御史臺

肅政廉訪司

甯國路領縣六

徽州路領縣五州一

饒州路領縣三州三

江南諸道行御史臺

集

慶路領縣三州二 太平路領縣三 池州路領縣六 信州路領縣五 廣德路領縣二 鉛山州 福建道宣慰使司 福建閩海道肅政廉訪司 福州路領縣九州二州領二縣 建甯路領縣七 泉州路領縣七 興化路領縣三 邵武路領縣四 延平路領縣五 汀州路領縣六 漳州路領縣五 江西行中書省路十二州二屬州十三縣四十七

江西湖東道肅政廉訪司 龍興路領縣六州二 吉安路領縣五州四 瑞州路領縣二州一 袁州路領縣三州一 臨江路領縣一州二 撫州路領縣五 江州路領縣五 南康路領縣二州一 贛州路領縣五州二州領三縣 建昌路領縣三 南安路領縣三 南豐州 廣東道宣慰使司 海北廣東道肅政廉訪司 潮州路領縣三 梅州領縣一

揚州南境 謹按以下所載郡縣自廣州路至循州皆屬江西行省兼設廣東道宣慰使司及海北廣東道肅政廉訪司因提明於前故此但標行省而不復列宣慰廉訪之目

江西行中書省路六州五縣二十九

廣州路領縣七 韶州路領縣四 惠州路領縣四 南雄路領縣二 德慶路領縣二 肇慶路領縣二 英德州領縣一 南恩州領縣二 封州領縣二 新州領縣一 循州領縣三

湖廣行中書省路三安撫司一軍三縣二十二

海北海南道宣慰使司 海北海南道肅政廉訪司 雷州路領縣三 化州路領縣三 高州路領縣三

乾甯軍民安撫司領縣七 南甯軍領縣三 萬安軍領縣二 吉陽軍領縣一

明南直隸府十四州三屬州七縣八十四

應天府領縣七 鳳陽府領縣六州五州領七縣 壽州領縣二 謹按鳳陽府領州五其泗宿二州及所

屬三縣詳前徐州穎亳二州及所屬二縣詳後豫州 淮安府領縣六州二州領三縣 謹按淮安府領海

邳二州及所屬三縣詳前徐州 揚州府領縣三州三州領四縣 蘇州府領縣六州一州領一縣 松江

府領縣三 常州府領縣五 鎮江府領縣三 廬州府領縣三州二州領三縣 安慶府領縣六 太平

府領縣三 池州府領縣六 甯國府領縣六 徽州府領縣六 滁州領縣二 和州領縣一 廣德州

領縣一

河南布政使司屬州一縣四

汝甯府

府治在豫詳見豫州
其屬州在揚者光州

江西布政使司府十三屬州一縣七十七

南昌府領縣七州一 瑞州府領縣三 九江府領縣五 南康府明初名西甯領縣四 饒州府明初名臨川領縣

七 廣信府領縣七 建昌府明初名豫慶領縣五 撫州府明初名臨川領縣六 吉安府領縣七 臨江府領縣

四 袁州府領縣四 贛州府領縣十二 南安府領縣四

湖廣布政使司屬州一縣二

黃州府府治在荊詳見荊州其所屬一州在揚者蘄州

浙江布政使司府十一屬州一縣七十五

杭州府領縣九 嚴州府領縣六 嘉興府領縣七 湖州府領縣五州一州領一縣 紹興府領縣八

甯波府領縣五 台州府領縣六 金華府領縣八 衢州府明初名龍游領縣五 處州府明初名安南領縣十

温州府領縣五

福建布政使司府八州一縣五十七

福州府領縣九 興化府領縣二 建甯府領縣八 延平府領縣七 汀州府領縣八 邵武府領縣四

泉州府領縣七 漳州府領縣十 福甯州成化九年直隸布政司領縣二

廣東布政使司府一縣十一

潮州府領縣十一

廣東布政使司府八州一屬州六縣六十四

廣州府領縣十三州一州領二縣 謹按廣州府領連州一州及所屬二縣詳後荊州 肇慶府領縣九州

一州領二縣 韶州府領縣六 南雄府領縣二 惠州府領縣八州一州領二縣 高州府領縣三州一
州領二縣 雷州府領縣三 瓊州府領縣七州三州領三縣 羅定州

元置水監隸德慶路萬曆五年升爲羅定州直隸布政司領縣

二原二百
三十二

古荊州

荊州北據荆山南及衡山之陽其在天文軫翼爲楚之分野兼得韓秦之交宋平荊湖及蜀分爲荆湖南北二
路及夔路之施黔思播等州他若京西之鄧州信陽軍淮南之黃州江南之興國軍廣南之連州皆屬荊州境
內元以其地隸河南江北湖廣二省間有屬四川江西者惟溪洞諸蠻別立思播二安撫司以統之明分黔州
隸重慶府應歸古梁州地餘屬湖廣布政司居多而思播二州改立郡縣則又分屬四川貴州二布政司至河
南之信陽州廣東之連州並依馬氏敘入此宋元明荊州疆域之大略也若其南廣西之地乃荆揚二州徼外
茲據一統志劃南越之境連荊州者附載於後

宋荊湖北路府三州九軍三縣五十六 謹按宋地理志序云自崇甯以來益梓夔黔廣西荆湖南北所建州
軍關城寨堡紛然莫可勝紀故前者於元符崇甯間州軍多所別擇其所領關城寨堡悉置不載非徒以數不
可紀亦由改廢不常故也其置自元豐以前者雖間有之馬氏亦復從略以就體例他如廢州縣爲城砦及升
砦堡爲縣則附見註中今並從之

江陵府即荆領縣八 荆門軍領縣二 峽州仍唐舊又領縣四 歸州仍唐舊又領縣三 復州仍唐舊

安陸郡領縣二 德安府唐安州領縣五 漢陽軍唐折江夏郡領縣二 鄂州即武昌亦領縣七 監一 壽昌

軍 岳州仍唐舊又領縣四 常德府唐朗州領縣四 澧州仍唐舊又領縣四 辰州仍唐舊又領縣四

城一 砦三 沅州唐初爲巫州後改領縣四 砦六 靖州唐十洞酋長之地領縣三 砦四 堡五

荆湖南路府一州六軍二縣四十二

潭州領縣十二 衡州領縣五 茶陵軍領縣一 永州領縣一 全州領縣二 道州領縣四 郴州領

縣六 桂陽軍唐於郴州境置監景領縣三 寶慶府即郴州領縣三 武岡軍領縣三

京西南路州一縣二

鄧州仍唐舊又領縣二

京西北路軍一縣二

信陽軍唐申州領縣二

淮南西路州一縣三

黃州仍唐舊又領縣三

江南西路軍一縣三

興國軍

太平興國二年
析鄂州地置

領縣三

廣南東路州一縣一

連州領縣三

謹按郴州亦有桂陽縣前考注本唐義昌縣改二縣皆屬漢桂陽郡地此則漢之舊縣也

夔州路府一州四縣九

紹慶府

即黔州
黔中郡

領縣二

謹按宋志紹慶府有羈縻州四十九南甯州達州隴州清州蔣州知州蠻州夔州

義州邕州鶴州勞州義州福州儒州合州郝州普州甯州綠州那州鸞州絳州敷州晃州侯州邛州焚州添

州瑤州雙成州訓州鄉州慶州茂龍州整州樂善州撫水州思元州逸州思州南平州勳州姜州穰州鴻州

和武州暉州毫州鼓州懸州附錄於黔江縣之後不入正文今從之又志云南渡後羈縻州五十六所益七

州不著名查前所錄州四十九實五十一州與提綱不合若核以南渡後之數則又不足意所稱知州蠻州

訓州鄉州之屬必有州本二名而析爲一字之誤然固不可以臆斷也 思州領縣三 施州領縣二 珍

州

唐珍州
改夜郎國

領縣二

播州 夷州

唐析思
州地置

涪州

本蠻
夷地

錦州

謹按馬考珍播以下有夷涪錦溪費業

六州並在荆梁二州之域宋志不收考夷涪錦北宋末始廢自應與珍播類載餘三州宋並不有其地故依

志刪

荊州南境

廣南西路府二州十七縣五十九

賀州

仍唐舊又領縣三

藤州

仍唐舊又領縣二

靜江府

唐桂管

領縣十二

昭州領縣四

謹按桂州

興安縣北有越城嶺卽五嶺之一嶺南有九州之外而昭州又在桂州之南其非古荆州地甚顯然一統志

謂桂昭二州並禹貢荆州之域蓋以古之時嶺南未闢故外之而非其地之必不可以入荆州也凡與荆州

壤接者自可以分星爲斷推而言之而論者遂以桂州爲荆州昭州爲荆南則非矣

梧州領縣一

潯州

領縣二

鬱林州領縣二

賓州領縣三

象州領縣四

柳州

仍唐舊又領縣三

融州領縣四

邕州

仍唐舊又爲永南都又號邕管

領縣二

若一

謹按宋志邕州有羈縻州四十四縣五洞十一兼於左右兩江分設太

平遷隆古萬永平橫山五若以轄之左江曰忠州凍州江州萬丞州思陵州左州思誠州潭州渡州龍州七

源州思明州西平州上思州祿州石西州思浪州思同州安平州良州廣源州勤州南源州西農州萬崖州

覆利州溫弄州武黎縣羅陽縣陀陵縣永康縣武盈洞古甌洞憑祥洞鐘洞卓洞龍英洞龍簪洞狗洞武德

洞古佛洞八魁洞右江曰思恩州鶴州思城州勤州歸樂州武義州倫州萬德州蒼州昆明州婪鳳州侯唐

州歸恩州田州功饒州歸城州

城似應作誠但羈縻州不可解之名甚多姑仍原文

武龍州龍川縣內安平州初名波州皇祐元年改

元祐二年又改懷化洞爲州以上共四十五州

貴州領縣一

橫州領縣二

容州領縣三

白州領縣

一 欽州領縣二

廉州領縣二

慶遠府

唐宜州龍水郡

領縣六

謹按慶遠府有羈縻州十軍一縣十有五溫

泉州環州鎮甯州領縣二番州金城州文州蘭州領縣三安化州領縣四迷昆州智州領縣五懷遠軍領縣一縣名史不載

愛州 福祿州 長州 驩州 蜂州 陸州 巖州 湯州 濱州 龍州 環州 古州 甲州 山

州 濱州 林州 景州 謹按前考南越之末有安南都護府及愛州等處皆云宋無其地既非宋有都

護官可不載惟愛州等居嶺南道十之七不可不存其名爲元明沿革之地附書於此其屬邑則概從刪略
內環州名見慶遠府羈縻州或是崇甯大觀間蠻戶納土時宋亦有之或同名異地皆未可知也

元河南江北行中書省路三府三州一屬州一縣二十八

河南江北道肅政廉訪司 汝甯府府治在豫詳見豫州其屬州在荆者信陽州 黃州路領縣三 荆湖北道宣慰司 山南江

北道肅政廉訪司 中興路宋江陵府領縣七 峽州路領縣四 安陸府宋鄧州領縣二 沔陽府領縣二 荆

門府領縣二 德安府領縣四州一州領二縣 謹按德安府領隨州一州及所屬二縣詳後豫州

四川行中書省府一屬州一縣二

四川南道宣慰司 紹慶府宋又名黔州領縣二 夔州路本路治地在梁詳見梁州其屬州在荆者施州

江西行中書省州二縣二

廣東道宣慰司 海北廣東道肅政廉訪司 桂陽州領縣一 連州領縣一

原书缺页

原书缺页

原书缺页

原书缺页

湖廣都指揮使司

施州衛軍民指揮使司領所一宣撫司四安撫司九長官司十三蠻夷官司五 永順軍民宣慰使司領州三長官司六 保靖州軍民宣慰使司領長官司二

四川布政使司府一屬州一縣四長官司二

遵義軍民府領縣二州一州領二縣 謹按元播州安撫司所屬諸地明萬曆中播曾楊應隆叛討平之以

其地隸遵義平越二府 平茶洞長官司 直隸布政使司 溶溪芝麻子坪長官司 改置同前

廣東布政使司屬州一縣二

廣州府 府治在揚州南境詳見揚州其屬州在荆者連州

荊州南境

貴州布政使司領府十宣慰司一屬州九衛十二縣十七長官司七十六所十三

貴陽軍民府領縣二州三長官司十六 貴州宣慰使司領長官司七 謹按乖西長官司明志謂本元乖

西軍民府改置而一統志謂乖西軍民府至元改爲開州此蓋元雍真乖西葛蠻等處所改未詳孰是至上

馬橋長官司則並謂本上馬縣改置者元志定遠府有上橋縣無上馬縣大抵本一地而隨呼互異也 都

勻 元志 府領長官司四州二州領一縣四長官司 平越軍民府領衛二州一州領三縣二長官司 黎平

府領縣一長官司十三 思南府領縣三長官司三 思州府領長官司四 鎮遠府領縣二長官司三

銅仁府

元銅仁大小江等處長官司

領縣一長官司五 石阡府領縣一長官司三 龍里衛軍民指揮使司領長官司

一 新添衛軍民指揮使司領長官司五 安南衛 威清衛 平燭衛 畢節衛領千戶所一 赤水衛

領千戶所四 數勇衛領千戶所四 鎮西衛領千戶所四 謹按元溪洞諸番長官經明代先後省併不

能悉詳其可考者如貴陽府及貴州宣慰司所治大率皆八番順元及管番民總管治地都勻平越與播州

土壤相錯黎平以下六府則皆元思州安撫所屬地也龍里等十衛亦元順元路及新添萬蠻安撫舊地居

多本在荊州徼外因元代領於湖廣行省諸蕃亦尚在羈縻之數祇從附錄故從馬氏以思播入荊州之例

牽連而書不更別爲徼外至明立貴州布政使以統之卽其地特設大員列置郡邑漸就整齊如內地矣應

實著其處入於荊州南境而改附錄爲正書亦體例應爾也 安順軍民府

元普定路

領長官司二州三州領四

長官司

廣東布政使司府一屬州一縣一

廉州府領縣一州一州領一縣

廣西布政使司府十一州九屬州三十九縣五十長官司四

桂林府領縣四州二州領三縣

平樂府領縣七州一

梧州府領縣五州一州領四縣

潯州府領縣三

柳州府領縣七州二州領三縣 慶遠府領縣三長官司三州四州領二縣 南甯府領縣二州七州領

一縣 思恩軍民府領縣二州一 奉議州 謹按明志奉議州元直隸廣西兩江道王氏續考以爲隸田

州路者田州路所屬尙有果化向武歸德都康等州皆元志所不載以類相推應從王氏 上映州 謹按

土夷考宋皇祐後廢上映州爲峒故元志及王氏續考俱不載然明志稱爲元隸鎮安路萬曆三十二年來

屬則元時旣已復矣而元志鎮安路下並無屬州可知爲史氏之失也 太平府領縣三州十七 思明府

領縣三 鎮安府 田州 謹按明志洪武五年廢恩城州而元志祇有思城無恩城豈後人訛思爲恩實

一地耶然王氏續考於元太平來安兩路條下並有思城州明太平府所屬亦有思城州已見前文則或元

實有思恩二州而明廢恩城存思城亦未可知據此則又訛恩爲思王氏誤也 歸順州 泗城州 向武

州 都康州 龍州 江州領縣一 思陵州 憑祥州 安隆長官司 謹按王圻續考有上林長官司

永樂七年本泗城州之上林洞置萬曆中廢故明志不載又元來安路本有上林安隆二長官司而明廢來

安入田州則二司當亦於是時廢爲洞寨後雖復而萬曆中又有偏廢也 原二百三十三

古豫州

豫州西南至荆山北距大河其在天文柳七星張爲周之分野房星爲宋之分野營壘 多爲魏之分野角亢氏

爲韓之分野兼得秦楚之交宋仍五代都於汴凡豫州之地俱爲京師輔郡置京 東路京西路兼得陝西路淮

京路南渡後俱沒於金惟京西之襄陽均隨棗陽光化等地金不得有其餘改隸南京路及山東京兆二路元以單曹二州隸中書省餘則盡隸河南江北行中書省明隸河南布政使居多而湖廣之襄陽均隨南京之棗毫山東之曹州並屬其境雖有錯見荆徐之地然以所領之郡為主則鄰接者皆得附載故並依馬氏敘入

宋京西北路府四州三縣五十六

河南府

唐洛州河南郡府名同郡宋因之改郡名洛陽又號西京

領縣十九

汝州領縣六

鄭州

仍唐舊又為滎陽郡

領縣五

潁昌府

唐許州潁川郡

元豐三年改升府又為許昌郡號南輔

領縣七

淮甯府

唐陳州淮陽郡

領縣五

順昌府

唐潁川汝陰郡元豐二年改順昌軍

領縣四

蔡州

仍唐舊又為汝

南領縣十

京西南路府一州四軍二縣二十一

唐州

仍唐舊又為淮安郡

領縣五

鄧州

仍唐舊又為南陽郡

領縣五

均州

仍唐舊又為武當郡

領縣二

襄陽府領縣六

隨州領縣

二 棗陽軍 光化軍

陝西承興軍路州二縣十二

陝州領縣八

虢州領縣四

京畿路府一縣十六

開封府

唐汴州陳留郡宋太祖因周之舊建都升為開封府號東京

領縣十六

京東西路府二州二軍十

應天府

唐宋州睢陽郡後唐改歸德軍宋升爲應天府軍仍舊號南京

領縣六

單州

唐鄆州後唐改今名宋因之又號碭郡

領縣四

謹按單州屬惟碭山

爲古豫州之地餘與曹州之濟陰乘氏二縣廣濟軍之定陶縣並屬古徐州地馬氏載入豫州者曹爲宋分

在豫州之域定陶又自曹改隸而單州與曹相接故也

拱州領縣二

興仁府

唐曹州濟陰郡

領縣四

廣濟軍

領縣一

淮南東路州一縣七

亳州

仍唐舊又爲譙郡

領縣七

金南京路府三州十七縣一百鎮八十四

開封府領縣十四鎮十五

睢州領縣三鎮一

歸德府領縣六鎮四

單州領縣四

壽州領縣二鎮一

謹按宋壽州尚有安豐六安壽春霍邱四縣並在古揚州淮南之域金以淮流爲界不有其地但得宋下

蔡一縣益以蒙城南置壽州故宋壽州列於揚而金列入豫也 陝州領縣四鎮七 鄧州領縣三鎮六

謹按鄧州尚有淅水順陽二縣元志謂元初省入內鄉考金志並無其名而穰城縣有順陽鎮當是金省淅

水入內鄉省順陽入穰城也

唐州領縣四鎮四

裕州

宋方城縣

領縣三鎮四

河南府領縣九鎮四

嵩州

領縣四鎮四

汝州領縣四鎮二

許州領縣五鎮七

鈞州領縣二鎮一

亳州領縣六鎮五

陳州領

縣五鎮二 蔡州領縣六鎮二 息州宋新領縣四鎮一 鄆州領縣七鎮三 潁州領縣四鎮十一

山東西路州一縣三鎮一

曹州領縣三鎮一

京兆府路州一縣三鎮五

虢州領縣三鎮五

元中書省州一關州一縣七

燕南河北道肅政廉訪司

濟甯路

本路治地在徐詳見徐州其屬州在豫州者單州曹州

河南江北行中書省路三府三屬州十六縣九十

河南江北道肅政廉訪司 汴梁路領縣十七州五州領二十一縣 河南府路領縣八州一州領四縣

南陽府領縣二州五州領十一縣 汝甯府領縣五州四州領十縣 潁州領縣三 息州領縣二 謹按

汝甯府領州四其光州一州其所屬三縣詳前揚州信陽一州及所屬二縣詳前荊州 歸德府領縣四州

四州領八縣 亳州領縣三 謹按歸德府領州四其徐宿邳三州及所屬五縣詳見徐州。襄陽路領縣

六州一州領四縣 鈞州領縣二 謹按襄陽路領州二其房州一州及所屬二縣詳後梁州 荆湖北道

宣慰司 山南北道肅政廉訪司 德安府

府治在荆詳見荆州其屬州在豫者隨州

明南直隸屬州二縣二

鳳陽府

府治在揚詳見揚州其屬州在豫者潁州亳州

山東布政使司屬州一縣二

兗州府

府治在徐詳見徐州其屬州在豫者曹州

河南布政使司府五州一屬州八縣七十三

開封府

宋京師元改汴梁路洪武元年復舊

領縣十七州四州領十三縣

河南府領縣十一州一州領二縣 歸德府領縣

六州一州領二縣

汝甯府領縣七州二州領五縣

謹按汝甯府領信陽光二州及所屬五縣信陽詳前

荊州光州詳前揚州

南陽府領縣六州二州領五縣

汝州

直隸布政司領縣四

湖廣布政使司府一屬州二縣七

德安府

府治在荆詳見荊州其屬州在豫者隨州

襄陽府領縣六州一

原二百三十四

古梁州

梁州東據華山之陽西距黑水在天文兼參之宿亦秦之分野又得楚之交宋平孟蜀盡得其地分爲利州夔州成都潼川四路而陝西路之商州京西路之房州並屬其境南渡後乃割商州與金至元以房州隸河南餘屬四川陝西二省明仍元舊惟多湖廣鄖陽一府此宋元明梁州疆域之大略也若其南濱黔之地宋時並沒

於蠻元憲宗始立雲南行省明分隸雲南四川貴州三布政司本非禹跡所及但考漢書地理志並州郡滇池有黑水祠黑水爲梁州界而滇池有祠是凡滇池毗連之域並應參列梁州此亦馬氏鄰接附入之意也

宋利州路府三州十三軍一縣六十三

興元府領縣六 大安軍 洋州領縣三 金州領縣五 謹按金州本隸京西南路南渡後來屬馬氏列

於商州之後未便省覽今類登於此又馬氏謂南渡後以商州之上津豐陽二縣來屬考宋志有上津無豐陽而金志上洛縣有豐陽鎮意始與上津改隸本州後歸金而廢爲鎮歟 巴州領縣五 謹按巴州屬利

州路馬氏列於房邕渠恭涪瀘六州之後未便省覽今類登於此又宋志有難江通江而無七盤其章考七盤其章二縣並廢於熙甯間難江縣本屬集州通江縣本屬壁州熙甯間州廢來屬 壁州領縣三 蓬州

領縣六 集州領縣二 閬州領縣九 鳳州領縣三 階州領縣二 同慶府領縣二 謹按鳳階成三

州本隸秦鳳路南渡後來屬馬氏列於果晉等州之後未便省覽今類登於此 沔州領縣二 文州仍唐舊又

爲除平郡領縣 龍州唐政州後改龍州江油郡領縣二 利州領縣五 隆慶府卽劍州領縣七

陝西永興軍路州一縣五

商州仍唐舊又爲上路卽紹興十二年割商秦之半界金以大散關爲界領縣五

京西南路州一縣二

房州仍唐舊又爲房設郡領縣二

夔州路府二州五軍三監一縣三十四

夔州領縣二 達州領縣八 重慶府唐禮州巴郡領縣三 涪州領縣五 咸淳府領縣六 萬州領縣二

開州領縣三 雲安軍領縣一 梁山軍領縣一 大甯監領縣一 南平軍領縣二

潼川府路府三州八軍三監一縣六十

潼川府唐梓州梓潼郡領縣十 梁州領縣四 瀘州領縣四 合州領縣五 順慶府領縣四 普州領縣四

榮州領縣五 資州領縣四 敘州領縣四 遂甯府領縣五 懷安軍領縣二 廣安軍領縣四 富順

監領縣一 昌州領縣三 長甯軍領縣一 謹按宋志潼川府路有昌州及長甯軍馬考未載并漏却所

領大足等四縣長甯軍本屬夔州熙甯八年夷人得箇祥獻其地因置濟井監政和四年建爲軍與瀘州相

接並古梁州之域今依志增

成都府路府三州十軍二監一縣六十五

成都府領縣九 嘉定府唐嘉州犍爲郡領縣六 簡州領縣二 仙井監即陵州唐仁壽郡領縣四 眉州領縣四 綿

州領縣六 漢州領縣四 彭州仍唐舊又爲涪陽郡領縣三 崇慶府領縣四 邛州仍唐舊又爲臨邛郡領縣七 雅州領

縣五 謹按雅州有羈縻州四十四附錄於後曰當馬三并來鋒名配鉗泰隸蕃重羅林龍羊林波林燒

龍蓬致川驚川禍眉木燭百坡營品巖城中川鉗矣昌磊鉗并百頗會暨富仁推梅作重禍林金林諾詐三
恭布鳳穴馬羅蓬論川讓川遠南卑盧夔龍輝川金川東嘉梁西嘉梁 茂州領縣二 威州領縣二 黎

州領縣二 永康軍領縣二 石泉軍領縣三

南州 宕州 扶州 松州 疊州 翼州 當州 悉州 靜州 柘州 恭州 秦州 嶺州 姚州

謹按以上十四州皆非宋有馬氏附載以存唐職方之舊今姑錄其州名而屬邑則概從刪略

金京兆府路州一縣二

商州領縣二鎮二 謹按宋紹興十二年金人求商州乃割其半與之以大散關爲界則是金地之在梁州
者惟此一州二縣而已

元河南江北行中書省屬州一縣二

河南江北道肅政廉訪司 襄陽路 本路治地在豫詳見豫州其屬州在梁者房州

陝西行中書省路一州七屬州四縣十四宣撫司一軍民府一

奉天路 本路治地在雍詳見雍州其屬州在梁者商州 興元路領縣四州三 鞏昌等處總帥府 徽州 宋鳳州 階州 河池縣 領縣一 階州

成州 金洋州 土番等處宣慰司都元帥府 雅州領縣五 黎州領縣一 茂州領縣二 礪門魚

通黎雅長河西甯等處宣撫司 諱脫思麻路 謹按元有長河西魚通甯遠三安撫司與此名目稍異考元志無

之又有松潘二州屬土番宣慰司志亦不載蓋土番在雅黎茂三州之外其地荒落難稽故記載疏略此外如朵甘斯烏斯藏之類尙多今皆不得而詳矣 禮店文州軍民元帥府隸關沙瑪路 謹按宋有文州曲水縣

考元志無之元有禮店文州軍民府意卽文州改置而以曲水縣省入然考明志禮文二縣註云禮縣本元禮店文州軍民府文縣本元文州是元別有文州也但史志既闕今亦無可詳考

四川行中書省路九府二屬府二屬州三十五屬軍一縣八十

西蜀四川道廉訪司 成都路領縣九州七州領十一縣 嘉定府路領縣四州二州領四縣 廣元路領

縣二府一州四府領三縣州領七縣 順慶路宋果州後升府領縣二府一州二府領二縣州領五縣 瀘川府領

縣四州二州領四縣 永寧路領州一州領一縣 四川南道宣慰司 重慶路領縣三州四州領十縣

懷德路領四州 謹按以上一府四州沿革未詳惟西陽一州至明玉珍僞改爲沿邊溪洞軍民宣慰司

夔州路領縣二州七州領五縣 敘南路領縣四州二 馬湖路古許州屬地舊名馬湖都至元

十三年蠻王內附 領軍一州一 上羅計長官司 下羅計長官司 元地理志云上羅計乃古夜郎境下

羅計境近烏蠻與敘州長甯軍相接均爲西南夷族前代置之化外宋設長甯軍十州族姓俱效順各命之

官其後分姓他居遂有上下之分蓋亦與唐羈縻之以爲西蜀後戶屏蔽至元十三年蠻夷宣撫皆順引本

部苗得賴阿當等內附尋授得賴阿當上羅計千戶得賴箇下羅計千戶二十二年諸夷皆叛惟本部無異

志 四十六國蠻夷千戶所 元地理志云豸蛾夷地唐羈縻定州之文江縣也至元十三年內附於慶符縣備置千戶所領之其名曰黃水口上下落骨山落半許滿吳麼落射麼落賢騰息奴屯莫面落搔麼落梅麼得辛上落松麼得會麼得惡落魂落昧下村落烏麼得亨落燕落得慮麼得了麼騰斛許宿麼九色落搔屯右麼得晏落能山落寡水落寡落得播麼得具麼得淵騰日影落昧上村賴屬許炤騰朗周頭賣落炎落女愛蒼落愛蒼速麼得姦阿耶頭下得辛上得辛愛得婁落鷗 諸部蠻夷 秦加大散等洞糾崖冒朱等洞隴隄糾皮等洞石耶洞散毛洞彭家洞黑土石等處市備洞藥化兀都刺布白亨羅等處洪望册得等族大江九姓羅氏水西鹿朝皆部設蠻夷長官 謹按諸部蠻夷所有散毛洞及後承順軍民安撫司至明改爲宣撫宣慰二司並在荊州之域其餘除石耶洞九姓羅氏可考外餘皆省廢不詳大都在荊梁二州之界阿承蠻部 謹按至元二十一年會長阿泥入覲自言阿承鄰境烏蒙等蠻悉隸皇太子位願依例附屬詔從其請以阿承蠻隸官府於是置師壁洞宣撫司承順等處軍民安撫司又設蠻夷官分領其族曰阿者洞謝里洞上安下場阿渠洞下役洞驢虛洞錢滿等處水洞下曲等寨必藏等處酌宜等處雍邦等寨崖筍等寨冒朱洞麻峽拓歌等寨新附鬼羅金井沙溪等處宙窄洞新容米洞

梁州南境

雲南行中書省

雲南古滇王國漢武開置益州蜀漢置雲南郡唐爲姚州後沒於南

路五十府三屬府三屬州

五十四縣四十九

雲南諸路肅政廉訪司

中慶路

大理國曰善屬府

領縣三州四州領八縣

謹按元志中慶路本唐姚州南詔閣

羅鳳叛取姚州其子鳳伽異增築城曰柘東六世孫券豐裕改曰善闡歷五代迄宋羈縻而已元世祖征大

理凡收府八善闡其一也郡西部三十有七考唐書夷語王爲詔其酋長有六自號六詔曰蒙濇越析浪穹

邊賤施浪蒙含蒙含詔在諸部南故稱南詔都羊苴咩城別都曰善闡府其王蒙氏開元中賜其王皮羅閣

名歸義是時五詔微歸義獨強乃併羣蠻破吐番合六詔爲一天子册爲雲南王自苴咩徙治太和城歸義

死閣羅鳳立姚州太守張虔陀多所求苟由是忿怨發兵攻殺虔陀取姚州領南節度使鮮于仲通自將討

之大敗引還會安祿山反閣羅鳳因并取濇州廣德初其子鳳伽異築柘東城鳳伽異前死子異牟尋嗣立

復徙治苴咩城後內附與四川節度韋皋共破土番異牟尋之孫豐裕復叛豐裕死垣綽會龍立僭號建元

自號大禮國數自將犯成都龍之子曰法法之子曰舜化建元中遣使款黎州修好昭宗不答後不復通據

此善闡府亦未見卽爲柘東城所改大禮之改爲理則自石晉時段氏也

威楚開南等路俄祿夷地鬱雷威楚居此後附

蒙氏領縣二州四州領一縣 武定路軍民府領州二州領四縣

鶴慶路軍民府大理國曰謀統領縣一郡本名鶴川標

雲遠路軍民總管府 徹里軍民總管府 謹按王圻續考云元征交趾經蠻地車里部降之因置徹里路

考元志大德中雲南行省言之徹里地與八百媳婦犬牙相錯勢均力敵今大徹里已降小徹里復控扼地

利多相殺掠大徹里日與相拒乞別置帥招其來附以爲進取之地乃立徹里軍民總管府是元已立徹里路於前而此處無路字乃專爲小徹里而設也又元宋更置耿凍川及耿當孟弄二州志並失載附錄於此

廣南西路宣撫司 謹按廣南西路元志闕其沿革王圻續考云宋時名特磨道儂智高之裔居之至元

中立宣撫司領路城等五州後來安路奪其路城上林羅佐三州惟領安甯富二州元志俱失載 麗江路

軍民宣撫司 以金沙得名漢至隋唐皆爲越嶲郡西徼地後爲越析詔所有繼入南詔憲宗四年立茶罕章管民官至元八年立宣慰司十三年改名置路 領府一州七州領一縣

東川路 茫部路軍民總管府 孟傑路 謹按王圻續考云元遣使招附八百媳婦置八百等處宣慰

司又云八百媳婦請官守置木安孟傑二路於其地考元志但有孟傑一路而無八百宣慰司及木安路又

明志元置孟絹路屬八百宣慰司志亦不載大抵元史多有漏失今特並存諸說以備參考 普安路 古夜郎地

唐爲盤州南詔之東節其後蠻酋據之號于失 部憲宗七年立萬戶至元十三年改名置路 曲靖等路宣慰司領縣一州五州領六縣 澂江路領縣

三州二州領三縣 普定路 本羅甸 普里部 謹按王圻續考及一統志皆有永甯鎮甯二州本古荒服地元始置

州隸普定路志並不載 仁德府領縣二 羅羅蒙慶等處宣慰司都元帥府 建昌路 唐中都府治越巂南詔立城曰建昌

府以烏自 二蠻居之 領縣一州九州領一縣 德昌路軍民府領州四 會川路領州五 臨安廣西元江等處宣慰

司兼管軍萬戶府 臨安路 唐隸州州蒙氏號通海郡段氏號秀山郡 領縣二千戶一州三州領二縣 廣西路 東蠻烏蠻羅刺等部所居唐爲

臨安州之南亦阿莫蠻 謹按元江路有羅樂馬龍步日思麼羅丑羅陀步騰步娑

台威台陽設柶你臨十二部又有磨容甸溪處甸和泥路柔版寨等名今志只列步日馬龍二部其餘並闕

大理金齒等處宣慰司都元帥府 大理路軍民總管府 即太和羊草等城地南爾蒙氏所都本號大理國後爲節趙楊三氏遞相襲奪至段思平改號

爲領縣一府二州五府領一縣州領二縣 騰衝府 蠻越地唐屬嶺南郡後爲白蠻所據 謹按唐姚州治在弄棟川元志

於中慶路既云唐姚州此復有姚州註云唐弄棟川都督府蓋元於姚州書閣府改立中慶路而又於舊州

治別立姚州存其舊名也 金齒等處宣撫司 本金齒自夷地 柔遠路 茫施路 鎮康路 鎮西路 平緬路

麓川路 南臘 本白蠻地 順甯府領縣一 謹按順甯在永昌騰衝二府之東王圻續考及一統志皆有之

元志不載 蒙憐路 蒙萊路 以上二路皆置軍民府 烏撒烏蒙宣慰司 謹按元志烏蒙部有大曰烏撒部阿頭

部易溪部易娘部烏蒙部闕畔部後蠻折怒强大盡得其地因取遠祖烏撒爲部名至元十年始附十三年

立烏撒路又按王圻續考及一統志並有烏蒙路亦至元中置元志不載然元志亦不於宣慰司外別立烏

撒路蓋舉其統轄之官而兩路在其中也 木連路 蒙先路 木邦路 孟定路 謀粘路 南甸路軍

民府 六難路甸軍民府 路字疑衍 晒麻和管民官 雲龍甸軍民府 縹甸軍民府 二十四寨達魯花赤

孟隆路軍民府 木朵路軍民總管府 金齒孟定各甸軍民官 孟愛等甸軍民府 蒙兀路 通西

軍民總管府 木來軍民府 謹按梁州南境並屬徼外夷地在漢爲益州兼屬牂牁越嶲三郡自唐至宋

爲蒙氏段氏所據元憲宗滅之金齒羅鬼緬中相繼歸附至元中列爲郡縣

明陝西布政使司府一州一屬州四縣二十

西安府

府治在雍詳見雍州其屬州在梁者商州

漢中府領縣七州二州領一縣

鞏昌府

府治在雍詳見雍州其屬州在梁者階州徽州

興安州

領縣六

四川布政使司府八州六屬州十五縣一百有七

成都府領縣十六州六州領九縣

保甯府領縣五州二州領三縣

順慶府領縣二州二州領六縣

夔

州府領縣十州一州領二縣

重慶府領縣十一州三州領六縣

敘州府領縣七州一州領二縣

龍安

府領縣二 馬湖府領縣一長官司四

潼川州

元潼川府洪武九年降爲州以州治鄰縣省入直隸布政司

領縣七

眉州

元隸嘉定府路洪武

十三年改隸布政司領縣三

邛州

元隸嘉定府路成化十九年改隸布政司

領縣二

嘉定州

元嘉定府路洪武九年降爲州以州治龍游縣省入直隸布政司

領縣六

瀘州

元隸重慶路洪武九年改隸布政司

領縣三

雅州

元隸土蕃宣慰司洪武四年以州治嚴道縣省入直隸布政司

領縣三

謹按元有長河西魚通

甯遠三安撫司承樂初合爲一宣慰司隸雅州明志不載

永甯宣撫司領長官司二 謹按一統志洪武

四年析元永甯路地置永甯衛初隸貴州都司後隸敘州府明志不載

天全六番招討司

潘衛領千

戶所一長官司十六安撫司五

疊溪守禦軍民千戶所領長官司二

黎州守禦軍民千戶所

安甯宣

撫司領長官司二

西陽宣慰司

元西陽州隸懷德府明玉珍僞號沿邊溪洞軍民宣慰司

領長官司三

石碛宣慰司

湖廣布政使司府一縣七

鄆陽府領縣七

梁州南境

四川布政使司府四衛五所八長官司十

鎮雄府

元茫部路

領長官司五

烏蒙軍民府

烏撒軍民府

東川軍民府

四川行都指揮使司

建昌衛軍民指揮使司領千戶所四長官司三

甯番衛軍民指揮使司領千戶所一

越嶲衛軍民指揮使司領千戶所一

鹽井衛軍民指揮使司領千戶所一長官司一

會川衛軍民指

揮使司領千戶所一

雲南布政使司府二十一州三宣慰司九宣撫司四安撫司六屬州四十二縣二百七十

雲南府領縣四州四州領五縣

曲靖軍民府領縣二州四

尋甸府

臨安府領縣五州六長官司九

謹按明志甯遠州元至治三年置直隸雲南行省洪武十五年來屬宣德元年與安南又於建水州注云西

有甯遠州萬曆十四年析置四十八年廢彼此互異今考元志無甯遠州當是洪武初置宣德初廢萬曆中

復置後省入建水州也

澂江府領縣三州二

廣西府領州二

廣南州領州一

元江軍民府領州二

楚雄府

元威楚開南路

領縣五州二

姚安軍民府領縣一州一

武定府領縣一州二

景東府

鎮沅府

元江路

領長官司一

大理府領縣一長官司一州四州領二縣

鶴慶軍民府

麗江軍民府

永甯府

領長官司四 北勝州 永昌軍民府領縣二州一安撫司四長官司三 蒙化府 順甯府領州一州領

長官司一 車里軍民宣慰使司 緬甸軍民宣慰使司 本籍中地有江頭太公馬來安正國蒲甘緬王五城元於蒲甘備王城置邦牙宜慰司 領長

官司一 木邦軍民宣慰使司 八百大甸軍民宣慰使司 孟養軍民宣慰使司 老撾軍民宣慰使司

俗呼 南甸宣撫司 千崖宣撫司 隴川宣撫司 孟定禦夷府領安撫司一 孟良禦夷府 威遠禦

夷州 灣甸禦夷州 鎮康禦夷州 孟密宣撫司 蠻莫安撫司 者樂甸長官司 鈕兀禦夷長官司

芒市禦夷長官司 孟連長官司 大古刺軍民宣慰使司 底馬撒軍民宣慰使司 小古刺長官司

茶山長官司 底板長官司 孟倫長官司 八家塔長官司 以上五司在雲南極邊皆永樂四年置 刺河莊長官司

促瓦長官司 散金長官司 麻里長官司 八寨長官司 底兀刺宣慰使司 廣邑州

貴州布政使司府一屬州三長官司六

安順軍民府領長官司二州三州領長官司四 謹按明志安順府本元安順州萬曆中升為府考元志無

安順州而王圻續考及明一統志並云洪武十六年置今從之 又按安順普安本元普定普安二路所改

二路在元隸雲南行省故編入梁州至明立貴州布政司因並改隸貴州從其所隸類錄於此又貴州省志

明有普定普安二衛而明志不載但附見府州條下今從之 原一百三十五

雍州西據黑水東距西河其在天文東井與鬼爲秦之分野兼得魏趙之交宋爲陝西路及河東路慶曆初分陝西緣邊爲秦鳳涇原環慶鄜延四路熙甯間又以熙河洮岷州通達軍爲一路後又省五路爲永興軍秦鳳兩路南渡後惟存岷州一州改名西和屬利州路餘俱入於金分爲京兆鳳翔鄜延慶原臨洮五路而廓鄜瀘麟府西安六州定邊懷德震武三軍割與西夏元平金滅夏盡得其地分立陝西甘肅二省內麟府二州併入葭州應歸冀州部內若嶺北一路雖非禹跡所及然以境相鄰接故亦附入本州至明和甯及亦集乃兀刺海三路並屬邊外餘隸陝西布政使司及行都指揮使司其地西接羌戎素尙武勇控馭之方蓋自古重之矣

宋陝西永興軍路府一州十三軍三縣七十二

京兆府領縣十一軍一軍領一縣 謹按宋志永興軍路有清平軍大觀三年以鳳翔府蓋屋縣之清平鎮升建隸京兆亦見前考鳳翔府總序此軍既有領縣未便祇從附錄宋志與京兆平列亦非今依屬州之列

增載 耀州領縣六

醴州領縣五

華州仍唐舊又爲華陰郡領縣五

同州即漢左馮翊領縣七

邠州領縣五 甯

州領縣四 慶陽府領縣二 定邊軍

元符二年築環慶路定邊城等改爲軍

領縣一

鄜州領縣五 坊州領縣三

延安

府領縣十 保安軍 丹州領縣三 綏德軍

銀州

環州

本西番邊界

領縣一

陝西秦鳳路府一州十七軍五縣四十六

秦州仍唐舊又爲天水郡領縣四

鳳翔府即漢右扶風

領縣九

隴州仍唐舊又爲開陽郡

領縣四

謹按馬考隴州下有儀州領

儀州領縣四

華亭崇信安化三縣又云熙甯五年州廢以所領三縣改隸渭州與宋志合似可毋庸覆出今刪 涇州領

縣四 渭州仍唐舊又領縣五 原州仍唐舊又領縣三 鎮戎軍領縣一 謹按宋志惟原州有彭陽縣

而本軍但有城無縣考九域志亦云鎮戎軍有彭陽城咸平六年置則此非縣明矣馬氏誤也 懷德軍

西安州 德順軍領縣一 鞏州古雍州地唐領縣三 蘭州領縣一 熙州領縣一 會州領縣一 河

州領縣一 積石軍 洮州本吐谷領縣三 岷州秦築長城領縣三 謹按岷州紹興元年入金改祐州十二年

復來歸移治長道縣界改名西和屬利州路故宋志兩處並載今依馬氏列此 麻州 西甯州即鄯州古

樂州即溫 震武軍政和六年築湟州古骨龍

河東路州三縣四

麟州領縣三 府州地在河領縣一 豐州

夏州漢屬朔方郡後魏置夏州唐拓跋思恭以功鎮夏州世有夏宥銀綏靖五州之地 靈州唐靈 勝州

鹽州 宥州 涼州 甘州 肅州 瓜州 沙州 伊州 西州 庭州 謹按以上十三州分設安

北安西兩都護府統之皆唐舊版內惟靈夏二州宋嘗得其地未久仍沒於西夏故宋志俱不載今依前者

姑錄其名於諸州之後而屬邑則概從刪略

遼西京道州二軍一

豐州領縣二

雲內州

本唐中受降城地遼初改置

天德軍

即唐中受降城太祖既改天德軍立豐州及破党項復建軍於此

金京兆府路府一州四縣三十一鎮三十

京兆府領縣十二鎮十

乾州領縣四鎮三

同州領縣六鎮九

耀州領縣四鎮二

華州領縣五鎮六

西京路州三縣四鎮二

豐州領縣一鎮一

雲內州領縣二鎮一

甯邊州

遼天德軍

領縣一

鳳翔路府二州四縣三十三鎮十六

鳳翔府領縣九鎮四

德順州領縣六寨一堡一

平涼府領縣五鎮五寨一

鎮戎州領縣二寨八堡三

謹按宋代城關寨堡前考多不收說見宋荊州部而金志載雍州各路於此獨詳蓋初得之於宋經理秦密非若宋元符崇甯間之紛更無紀也故酌變前例依史氏備書之 秦州領縣八鎮二城一寨三 隴州

領縣三鎮五

鄜延路府一州五縣十五鎮四

延安府領縣七鎮一寨五堡二

丹州領縣一鎮一關一

保安州領縣一鎮二城一寨三堡一

綏德府

領縣一城一寨十堡一關一

鄜州領縣四鎮一

坊州領縣二鎮一

慶原路府一州五縣十九鎮二十三

慶陽府領縣三鎮七城二寨三堡一 環州領縣一鎮三寨六堡三 甯州領縣四鎮五 邠州領縣五鎮
三寨一 原州領縣二鎮三寨五 涇州領縣四鎮二寨一

臨洮路府一州六縣十五鎮六

臨洮府領縣三鎮一城一堡四 積石州領縣一城三堡三 洮州領堡二 蘭州領縣三鎮三城二堡三
關一 鞏州領縣五鎮一寨四 會州領縣一寨二關一 謹按會州尋陷河西以州僑治會川城名新會
州並置會川縣金志所載猶仍其舊 河州領縣二鎮一城一寨三

元陝西行中書省路五府四州十九屬州八縣七十三

陝西諸道行御史臺 奉元路

金京兆府領縣十一州五州領十五縣

謹按元志唐改醴泉爲奉天元又改奉

天爲醴泉考宋金二志乾州治本省奉天又別有醴泉則醴泉非奉天明矣 又按奉元路領州五其商州

一州及所屬一縣詳前梁州

延安路領縣八州三州領八縣 陝西漢中道肅政廉訪司 鳳翔府領縣

五 邠州領縣二 涇州領縣二 開成州領縣一州一 鞏昌等處總帥府 鞏昌路領縣五 謹按元

志金爲鞏昌府考金志止稱鞏州則鞏昌之名當從元始 平涼府領縣三 臨洮府領縣二 慶陽府領

縣一 秦州領縣三 隴州領縣二 甯州領縣一 定西州 鎮原州 西和州 謹按宋志西和州開

禧二年入於金考金志無此州今從元志沿革自宋始 環州 金州 靜甯州領縣一 蘭州 會州

土番等處宣慰司都元帥府

河州路元以拖罕縣省入

領縣三 洮州領縣一

貴德州金積石州

脫思麻路 岷

州 鐵州

甘肅行中書省路七州二屬州五

河西隴北道肅政廉訪司

甘州路唐甘州張掖郡

永昌路唐涼州武威郡

領州一

肅州路唐酒泉郡

沙州路唐沙州鐵煌郡領

州一

亦集乃路在甘州北外接沙漠

甯夏府路即唐夏州朔方郡

領州三

山丹州唐刪丹縣屬甘州

西甯州

謹按前考西

甯州建炎後與樂州並沒於金考金志無此二州今按其地與西涼相接意宋時亦入西夏至元復以樂州

省入西甯

兀刺海路元太祖四年由黑水城北兀刺海西關口入河西獲西夏將高令公克兀刺海城

雍州北境

嶺北行中書省路一

和甯路

舊名和林元初建都於此立元昌路皇慶元年更名

謹按嶺北統路一元世祖遷都後此爲巨鎮常以動蕩領之其地本非

禹跡所及以在雍州之北故卽附於其後

明陝西布政使司府七州一屬州十六縣七十六衛十所五

西安府領縣十四州六州領十七縣 謹按西安府領州六其商州一州及所屬四縣詳前梁州 鳳翔府

領縣七州一 延安府領縣九州三州領七縣 慶陽府領縣四州一 平涼府領縣五州三州領二縣

鞏昌府領縣九州三州領五縣 謹按元志有禮店文州軍民府沿革俱闕據明志禮縣卽禮店文州所改
考明統志云元文州洪武四年改爲文縣而元志別無所謂文州則是禮店文州本屬兩地而元志牽連書
之致明志誤并爲一參之統志而後明也 又按鞏昌府領州三其階微二州及所屬二縣詳前梁州 臨
洮府領縣二州二州領一縣 靈州 洮州衛 岷州衛領千戶所一 榆林衛 甯夏衛領千戶所四
甯夏前衛 甯夏左屯衛 甯夏右屯衛 甯夏後衛 甯夏中衛 靖虜衛 謹按明志洮州衛以下或
云屬陝西都司或不云屬都司蓋都司本與布政使司同治而前綱不書衛所之數此又偏舉數衛屬之都
司其餘竟不知何屬未便省覽今姑從志原文附注其實此十衛皆屬都司而布政司亦得治之者也故於
提綱處增入其數復識其大凡於此至下所載行都指揮使司則別自一官與駐劄布政司城之都司不同
其衛所自有專屬而布政司不得而侵之矣

陝西行都指揮使司衛十三所四

甘州左衛元甘州路 甘州右衛 甘州中衛 甘州前衛 甘州後衛 肅州衛 山丹衛 永昌衛 涼州

衛 鎮番衛 莊浪衛 謹按明統志元置莊浪縣屬永昌路明改爲衛考元志陝西行省所屬有莊浪州

金改爲縣隸平涼府元永昌路無莊浪縣今從明志 西甯衛 碾伯守禦千戶所 沙州衛 鎮夷守禦

千戶所 古浪守禦千戶所 高臺守禦千戶所

原二百三十六

欽定續文獻通考輯要卷二十六

山陰湯壽潛撰先恭輯

四裔考臣等謹案馬者各述其國俗與夫中土交通者所以誌區寓之攸分也粵稽禹貢五服周官九畿皆爲侯甸以迄要荒自古疆域率視政教所及爲限而聲靈之所震疊德化之所覃被則荒徼絕域琛盡畢至圖經載記由來尙矣若乃淮徐吳楚在成周胥爲蠻夷孟子謂舜爲東夷之人文王爲西夷之人上天篤生神聖固不擇地無足爲諱者彼鴻濶判東西長江限南北島夷索虜交相詆讎坐井面牆方隅自域蓋出自史氏拘墟之見烏觀所謂大無外之規乎

聖朝肇興東土本金源女直境實居其地而非其部追我

列祖

奄一區宇薄海內外悉主悉臣幅員之廣亙古未有前代所列爲四裔者今則燕隸版圖制同郡縣自不得更以徼外目之第歷代史冊惟就一朝形勢以爲哇咻據事直書用志沿革爰採摭舊文敷之 大清一統志以徼往代紀載之實且昭 聖朝會同之盛焉

東夷

高麗

附

謹案高麗卽朝鮮馬者載高麗事終於宋甯宗慶元五年七月詔禁商人持銅錢入其國蓋

絕之也若高麗與遼相爲終始二百餘年天祚帝天慶十年遼乞兵於高麗以禦金人責之未幾而遼亡

顧炎武日知錄曰遼史外紀有高麗王子三韓國公勳三韓國公暉三韓國公俱其地理志有高州三韓縣辰韓爲扶餘弁韓爲新羅北史以辰韓爲新羅馬韓爲高麗開泰中聖宗伐高麗俘三國之遺人置縣據此乃俘三國之人

蓋縣內地而取三韓之名

正如漢時上郡有龜茲縣不可便以爲西域之國

今人乃謂遼東爲三韓是以內地而目之爲外國非也

金穆宗

世祖弟

時高麗始通使

時戚屬有疾高麗有善醫者居女直之完顏部使診視之卽愈乃送之歸因謂

高麗人金部屬日強兵益精悍年穀豐稔高麗王聞之乃通使康宗

亦世祖弟

時高麗殺金使者阿果星根二人太

祖將兵大破之進圍其城高麗復請和許歸亡入之民罷九城之戍復所侵故地遂與之和太祖收國元年九

月克遼黃龍府遂攻保州保州近高麗遼侵高麗置保州至是盡降

元太宗三年八月命將薩喇達征高麗設官分鎮所取四十餘城之地而還

憲宗末遣其世子僞入朝

世祖中統元年三月命高麗世子僞歸國爲王 陝西宣撫使廉希憲言高麗遣僞入覲會憲宗將兵伐宋僞

留三年不遣今其父已死若立僞遣歸國彼必懷德於我是不煩兵而得一國也帝是其言故有是命 元史

外夷傳曰高麗之與國耽羅元世祖旣臣服高麗以耽羅爲南宋日本衝要亦甚注意至元十年命將平之卽

其地立耽羅國招討司

明太祖卽位之元年遣使齎書賜高麗國王 二年封高麗國王暉爲王秋帝以暉惟知崇信佛氏故以書

諭之大略謂王公設險未嘗去兵民以食爲天國必有出政之所因賜六經四書通鑑

成祖承樂元年朝鮮請冕服書籍許之 帝嘉其能慕中國禮賜金印圭冕及經籍綵幣十二月又從芳遠請

立其子禔爲世子

宣宗宣德八年朝鮮請遣子弟入學不許 其王禰奏遣子弟詣太學或遼東學帝不允賜五經四書性理通

鑑綱目諸書至英宗正統元年三月放朝鮮婦女金黑等五十三人還其國金黑等自宣德初至京師至是還中官送回 世宗嘉靖

三十一年冬以洪承問所賜樂器敝壞奏求律管更乞遣樂官赴京校習許之

神宗萬曆二十年七月以朝鮮被倭難命出師東征 先是倭酋平秀吉者薩摩州人初隨倭關白信長會信

長為其下所弑秀吉遂統信長兵自號關白劫降六十餘州朝鮮與日本對馬島相望時有倭夷往來互市十

九年十一月朝鮮奏平秀吉聲言明年三月入犯詔兵部申飭海防至是年五月秀吉遂分渠帥行長清正等

率舟師逼釜山鎮潛渡臨津時朝鮮承平久兵不習戰略又酒酒弛備猝島夷作難望風皆潰松棄王城令次

子瑋攝國事奔平壤已復走義州願內屬部議令駐劄險要以待天兵圖恢復而是時倭已入王京毀墳墓劫

王子陪臣剽府庫八道幾盡沒且暮且渡鴨綠江請援之使絡繹於道廷議以朝鮮為國藩籬在所必爭由是

出師東征并有封貢之議自倭亂朝鮮七載喪師數十萬糜餉數百萬中朝與屬國迄無勝算至二十六年七

月平秀吉死而禍始息 王圻曰高麗之釜山去日本之對馬島僅一日程相傳舊屬日本為大海限隔棄於

朝鮮先是日本以歲獻借朝鮮穀萬斛迨遣使往索日本乃以釜山地為言朝鮮所遣使謂之曰我鴨綠江

北有朝鮮地因三道江阻絕久為大唐所有大唐指中國也汝能助我復此地則釜山亦可歸也日本人以為然平秀

吉果領兵赴朝鮮未至京而廢遣走一國為墟特命重臣提兵往救踰年相持不退兵部尚書石星輕聽沈惟

敬言惟敬嘉興人市中無類也加遊擊銜往諭日本罷兵惟敬陰許議和且許復甯波實道事泄逮惟敬下獄與星皆擬重典更調兵增餉費至百萬彼此互有勝負倭衆盤據釜山蓋屋治田爲久留計至平秀吉病死倭始退歸而其時疲中國以捍外藩七八年矣

愍帝崇禎十年正月朝鮮告急命調各鎮舟師赴援三月山東巡撫顏繼祖奏屬國失守江華已破世子黻擒國王出降宜敕鎮臣以堅守皮島爲第一義帝以不能協國匡救切責之亡何皮島亦破王圻曰高麗分八道中曰京畿東曰江源本濊貊地西曰黃海古朝鮮馬韓舊地南曰全羅本弁韓地東南曰慶尙乃辰韓地西南曰忠清皆古馬韓域東北曰咸鏡本高句麗地西北曰平安本朝鮮故地其忠清慶尙全羅三道地廣物衆州縣雄巨最爲富庶俗尙詩書人才之多倍於諸道平安咸鏡二道境接赫鶻俗尙弓馬士卒精強東西南瀕海北隣女直西北抵鴨綠江東西二千里南北四千里

日本

元世祖至元三年八月遣使往日本先是元年從高麗人趙彝等言以日本國可通擇可奉使者至是命兵部侍郎赫德等充國信使持國書道由高麗高麗國王禮遣使導詔使往不至而還十一年三月命以舟師征日本十月入其國敗之而官軍不整又矢盡惟搆掠四境而歸十七年二月日本殺國使杜世忠等十八年正月命日本行省右丞相阿爾哈右丞范文虎及征東元帥實都洪察球爾等率十萬人征之行省官議事不相

下全師盡喪十萬之衆得還者敗卒於闕莫青吳萬五三人耳 明史外國傳曰日本古倭奴國宋以前皆通中國朝貢不絕元數遣使招之不至乃命舟師征之至五龍山遭暴風軍盡沒後終元世未嘗通明興方國珍張士誠相繼隸服諸臺亡命往往糾島人入寇山東濱海州縣

明太祖洪武二年三月遣行人楊載往日本請以入寇之故其王良懷不奉命復寇山東轉掠溫台明州旁海民遂寇福建沿海郡三年又遣萊州府同知趙秩責讓之良懷禮遇甚優遣其僧奉表稱臣且送還被掠人口帝念其俗佞佛可以西方教誘之乃命僧祖闢等至其國國人頗敬信而王則傲慢無禮拘之二年而後還京時良懷年少有持明者與之爭立國內亂又頻入寇掠命移牒責之自後胡惟庸謀逆欲藉日本爲助乃厚結甯波衛指揮林賢佯奏賢罪謫居日本令交通其君臣尋奏復賢職遣使召之其王遣僧如瑤率兵四百餘人詐稱入貢且獻巨燭藏火藥刀劍其中既至而惟庸已敗計不行越數年其事始露乃族賢而怒日本決意絕之專以防海爲務後著祖訓列不征之國十五日本與焉自是倭使不至而海上之警亦漸息

成祖永樂三年十一月日本王源道義遣使獻賊俘於朝 先是對馬臺岐諸島賊掠濱海居民因倭使諭其王捕之王發兵盡殲其衆斃其魁二十人以獻十七年倭船入王家山島都督劉榮率精兵疾馳入望海埭賊數千人分乘二十舟直抵馬雄島進圍望海埭榮發伏出戰奇兵斷其歸路賊奔櫻桃園榮合兵攻之斬獲千二百九十餘榮封廣甯伯自是倭不敢窺遼東武宗正德五年春時劉瑾竊柄納其王源義澄所使朱素卿黃

金千兩賜飛魚服前所未有也素卿鄞縣朱氏子名縞幼習歌唱倭使見悅之而縞叔澄負其直因以縞償至是充正使 謹案王圻謂永樂初西洋之役雖威震海表而華人習知遠夷饒金寶夷人亦知我海道姦闖出入彼此相糾故海中寇盜復起若非廣甯之捷厥禍未已然以明史考之則倭之搆禍實與明代相終始矣

世宗嘉靖二年五月議絕倭使 時其使宗設先抵甯波未幾素卿偕瑞佐復至互爭真僞素卿賄市舶太監

賴恩宴時坐素卿於宗設上船後至又先爲驗發宗設怒與之鬪殺瑞佐焚其舟追素卿至紹興城下素卿竄

匿他所免凶黨迴甯波所過焚掠奪船出海都指揮劉錦戰沒二十三年巡按御史高節請治沿海文武將吏

罪嚴禁姦豪交通內地諸姦利其交易多爲之齟齬終不能盡絕二十六年十二月倭犯甯台二郡大肆殺掠

二郡將吏並獲罪時各島諸倭歲常侵掠濱海姦民又往往勾之浙江巡撫兼制福興等軍事朱執乃嚴爲申

禁獲交通者不俟命輒以便宜斬之由是浙閩大姓素爲倭內主者失利而怨執執又數騰疏於朝顯言大姓

通倭狀以故浙閩人皆怨之而閩尤甚巡按御史周亮閩產也上疏詆執請改巡撫爲巡視以殺其權其黨在

朝者左右之竟如其請又奪執官羅織其擅殺罪執自殺自是海禁復弛亂益滋甚三十二年三月諸倭大舉

八寇初浙江設市舶以中官主之駐甯波帝卽位盡撤中官并撤市舶海濱姦人遂操其利始猶商主之及嚴

禁通番遂移之貴官家負其直者愈甚索之急則以危言嚇之或以好言給之倭喪其資不得返已大恨而

大姦若汪直徐海陳東麻葉輩素窟其中以內地不得逞悉逸海島爲主謀倭聽指揮入寇海中巨盜遂襲倭

服飾旗號並分艘掠內地無不大利倭患日劇廷議復設巡撫三十一年七月以僉都王忬任之而勢已不可撲滅至是汪直勾引諸倭連艦數百蔽海而至浙東西江南北濱海數千里同時告警三十三年以李天寵代忬又命兵部尙書張經總督軍務徵兵四方協力進剿

三十四年九月官軍殲倭賊於楊林橋先是倭賊抄掠四出復合新倭突犯嘉興至王江涇乃爲張經擊斬千九百餘級餘奔柘林其他倭復掠蘇州境出入太湖大抵真倭十之三從倭者十之七倭法嚴人皆致死官軍素怯所至奔潰帝遣工部侍郎趙文華督察軍情文華顛倒功罪諸軍益解體經天寵並被逮代以楊宜胡宗憲時賊勢蔓延江浙無不蹂躪新倭來益衆益肆毒每自焚其舟登岸劫掠自杭州北新關西剿迄安突徽州至太平府復犯南京又抵許墅爲官軍所圍追及於楊林橋殲之是役也賊不過六七十人而經行數千里殺傷幾四千人歷八十餘日始滅應天巡撫曹邦輔以捷聞文華忌其功以倭巢於陶宅乃大集浙直兵與宗憲親將之又約邦輔合剿並營於松江之甌橋倭悉銳來衝遂大敗文華氣奪賊益熾自樂清登岸流劫黃巖諸縣被殺擄者無算至縣乃殲之亦不滿二百人而深入三府歷五十日始平

三十五年遣使諭日本從總督胡宗憲請遣甯波諸生蔣洲陳可願往諭日本國王蔡戩島寇招還番姦商許立功免罪乃留洲傳諭各島而送可願先還時兩浙皆被倭竄焚殺獨慘餘姚次之浙西柘林乍浦烏鎮皂林間皆爲賊巢前後至者二萬餘人七月宗憲言賊首毛海峯自陳可願還一敗倭寇於舟山再敗之懸

表徐海陳東麻葉方連兵攻圍桐鄉宗憲設計問之海遂擒東葉以降盡殲其餘衆於下浦未幾復躡海於梁莊海亦授首餘黨盡滅江南浙西諸寇略平而江北浙東新倭大至屢被攻燬其患移於福建湖廣間矣

四十年浙東江北諸倭寇以次平 明年十一月倭陷興化府大殺掠移據平海衛遠近震動亟徵俞大猷戚繼光劉顯諸將合擊之其侵犯他州縣者亦爲諸將所破福建亦平其後疆吏懲嘉靖之禍海防頗飭賊來輒失利其犯廣東者爲蠶賊梁本豪句引勢尤猖獗總督陳瑞集衆軍擊之斬首千六百餘級沈其船百餘艘本豪亦授首帝爲告謝郊廟宣捷受賀 王圻曰國初懲倭之詐緣海備禦幾於萬里其大爲衛置軍四千六百四十人其次爲所置軍一千一百餘人又次爲巡檢司置弓兵百人少亦不下數十人皆大小相維經緯相錯所以禦之者密矣歲久人玩法去盜生二十年來山積瀾倒當事者見不可用遂別募以充遠徵以禦改造巨艦一切從宜而舊法因廢不講則亦懲咽之過矣自頃客兵騷暴鮮克宣勞故中外爭言鄉兵似矣然徇名弗思終屬具文夫所謂鄉者對客兵而言豈謂是荷鋤秉耜穡奴牧豎然哉竊謂衛所縣司軍壯弓兵之類宜因舊法損益之務足故伍或抽羨丁或僉壯士無論軍會通融濬攢優與津給而以其半哨守其半團練更迭肄之傳皆可戰或慮一時未習不足應猝則量留舊募以備緩急久之或可盡罷此目前儲禦長策也

神宗萬曆十九年倭酋陷朝鮮命出師東征 日本故有王其下稱關白者最尊時朝鮮奏倭酋關白平秀吉聲言明年來犯不知其謀已也二十年遂陷朝鮮中國亦喪師糜餉垂七載關白死禍始休終明之世通義之

蔡其巖閩巷小民至指倭相害罵甚以曉其小兒女云

雞籠山

明史傳曰世宗嘉靖末倭寇擾閩大將戚繼光敗之倭遁居於雞籠山之淡水澤其黨林道乾

從之已道乾懼爲倭所併又懼官軍追擊揚帆直抵浮泥據其邊地以居號道乾港而雞籠遭倭焚掠國殘破
初番居海濱既遭倭難稍稍避居山後忽中國漁舟從烟港飄至遂往來通販以爲常至萬曆末紅毛番泊舟
於此因事耕鑿設關稱臺灣爲崇禎八年給事中何楷陳靖海之策言自袁進李忠楊祿楊策鄒芝龍李魁
奇鍾斌劉香相繼爲亂海上歲無甯息今欲靖寇氛非墟其窟不可其窟維何臺灣是也臺灣在澎湖島外距
漳泉止兩日夜程地廣而腴初貧民時至其地規魚鹽之利後見兵威不及往往聚而爲盜近則紅毛築城其
中與姦民互市屹然一大部落墟之計非可干戈從事必嚴通海之禁俾紅毛無從謀利姦民無從得食出
兵四犯我師乘其虛而擊之可大得志紅毛舍此而去然後海氛可靖也時不能用

佛郎機

武宗正德十三年正月佛郎機遣使請封

地近滿刺加時據其地逐其王遣使臣加必丹末等請封始知其

名十五年御史邱道隆言滿刺加乃敕封之國而佛郎機敢併之且昭吾以利邀求封貢決不可許宜却其使

臣明示順逆令還滿刺加疆土方許朝貢倘執迷不悛必檄告諸番聲罪致討御史何察言佛郎機最凶狡兵

械較諸番獨精前歲駕大舶突入廣東會城礮聲殷地留驛者違制交通入都者桀驁爭長今聽其往來貿易

勢必爭鬪殺傷南方之禍殆無紀極祖宗朝貢有定期防有常制故來者不多近因布政吳廷舉謂缺上供香
不問何年來卽取貨致番舶不絕於海濫蠻人雜遝於州城禁防既疎水道益熟此其所以乘機突至也乞悉
驅在澳番舶及番人潛居者禁私通嚴守備庶一方獲安疏下禮部言道隆先宰順德蔡卽順德人故深晰利
害宜俟滿刺加使臣至廷請佛郎機侵奪鄰邦擾亂內地之罪奏請處置其他悉如御史言報可

世宗嘉靖二年佛郎機入寇官軍擊走之先是其將別都盧以巨礮利兵肆掠滿刺加諸國橫行海上復率

其屬疎世利等駕五舟擊破巴西國至是遂寇新會之西草灣指揮柯榮百戶王應恩禦之轉戰至稍州向化
人潘丁苟先登衆齊進生擒別都盧疎世利等四十二人斬首三十五級獲其二舟餘賊復率三舟接戰應恩
陣亡賊亦敗遁官軍得其礮卽名爲佛郎機副使汪欽進之朝九年秋鏖累官右都御史上言塞上墩臺城堡
當用其所進佛郎機坐收不戰之功帝悅卽從之火礮之有佛郎機自此始然將士不善用迄莫能制寇也二
十六年佛郎機犯漳州初廣東文武官月俸多以番貨代時貨至者寡有議復許佛郎機通市者給事中王希
文力爭乃定令諸番貢不以時及勘合差失者悉行禁止由是番船幾絕巡撫林富以粵中公私諸費多資商
稅番舶不至則公私皆窘因言許佛郎機互市其利有四

一供御用一充軍餉一粵西仰給粵東有微費可從
濟措辦一小民懸遷爲生得以販易衣食其中

之自是佛郎機得入香山澳爲市而其徒又越境商於福建往來不絕朱統爲巡撫嚴禁通番統被逮自殺海
禁復弛遂縱橫海上無所忌而其市香山澳瓊境者至築室建城踞海畔若一國然將吏不肖者反視爲外

府矣 明史佛郎機傳曰嘉靖四十四年僞稱滿刺加入貢已改稱蒲都歷家守臣以聞下部議言必佛郎機假託乃却之萬曆中破滅呂宋盡擅閩粵海上之利勢益熾至三十四年又於隔水青州建寺高六七丈闕敞奇闕非中國所有知縣張大猷請毀其高墻不果明年番禹舉人盧廷龍請盡逐澳中諸番出居浪白外海還我壕鏡故地當事不能用番人既築城聚海外雜番廣通貿易至萬餘人吏其土者皆畏懼莫敢詰甚有利其寶貨伴禁而陰許之者總督戴耀在事十三年養成其患番人又潛匿倭賊敵殺官軍四十二年總督張鳴岡檄番人驅倭出海因請申明約束從之居三年設參將於中路雍陌營調千人戍之防禦漸密天啟元年守臣慮其終爲患遣監司馮從龍等毀其所築青州城番亦不敢拒其時大西洋人來中國亦居此澳蓋番人本求市易初無不軌謀中國疑之過甚迄不許其朝貢又無力以制之故議者紛然終明之世此番未嘗爲變也

明神宗實錄萬曆四十二年總督張鳴岡上言粵之有澳夷猶疽之在背也澳之有倭賊猶虎之傅翼也今檄番人驅倭出海一旦斥遣不費一矢此聖天子威德所致惟是倭去而番尙存有謂宜剷除者有謂宜移之浪白外洋就船貿易者顧兵難輕動而壕鏡在香山地官軍環海而守彼日食所需咸仰於我一懷異志我卽致其死命若移之外洋則巨海茫茫奸宄安詰制禦安施不如申明約束內不許一姦闖出外不許一倭闖入無敢毀無弛防相安無患之爲愈也部議從之

按明史佛郎機傳壕鏡在香山縣南虎跳門外先是暹羅占城瓜哇琉球浮泥諸國互市俱在廣州設市舶司領之正德時移於高州之電白縣嘉靖十四年指揮黃慶

納賄請於上官移之據鏡歲輸課二萬金佛郎機遂得混入高棟飛囊櫛比相望閩粵商人趨之若鶩久之其來益衆諸國人畏之遂專爲所據矣

美洛居 明史傳曰神宗萬曆時爲佛郎機所攻其酋戰敗請降乃宥令復位歲以丁香充貢不設戍兵

而去已紅毛番橫海上知佛郎機兵已退乘虛直擣城下執其酋語之曰若善事我我爲若主殊勝佛郎機也酋不得已聽命復位如故佛郎機會聞之大怒率衆來攻道爲華人所殺語具呂宋傳時紅毛番雖據美洛居率一

二歲率衆返國既返復來佛郎機會子既襲位欲竟父志大舉兵來襲值紅毛番已去遂破美洛居殺其酋立己所親信主之無何紅毛番又破其城逐佛郎機所立酋而立美洛居故王之子自是歲擣兵人不堪命華人流寓者遊說兩國令各罷兵分國中萬老高山爲界山以北屬紅毛番南屬佛郎機始稍休息而美洛居竟爲兩國所分

渤海 嶺羅雜編 微貊附

遼太祖天贊四年十二月舉兵親征渤海大誣謾 閏月圍扶餘府次年正月拔其城誅其守將又遇誣謾老相兵破之遂圍輝罕城誣謾素服素牽牛率僚屬三百餘人出降帝優禮而釋之越數日誣謾復叛攻其城破之駕幸城中誣謾請罪馬前詔以兵衛誣謾及族屬以出二月改元天顯又改渤海國爲都木達輝罕城爲天福册太子倍爲人皇王以主之七月衛送大誣謾於皇都西築城以居之其後又改扶餘爲黃龍府 按契

丹國志四至隣國謂東南至新羅國西以鴨綠江東八里黃土嶺爲界至保州一十一里若蘇曷則謂爲東北境與鐵驪爲界無君長統轄春夏居室中秋冬則穿地爲洞深可數丈居以避寒不進貢契丹亦不爭戰惟以細鷹等與契丹交易西南至上京五千里而濊貊則不載

哈斯罕鐵驪博羅滿達烏舍富珠哩 謹按哈斯罕鐵驪博羅滿達烏舍富珠哩等俱不知其所自始惟見於遼史遼後亦無可述者又按渤海以下諸國王圻續考皆列爲東南夷今考遼之建國東至高麗南至宋登萊州西至雲中府北至蒙古以契丹國志地理圖及鄰國四至考之則渤海新羅蘇曷在其東鐵驪烏舍在其東北故改附於東夷之後

原二百三十七

東南夷

琉球

三考附

元世祖至元二十八年遣使持詔諭琉球 是年九月從海船副萬戶楊祥請以六千軍往降之不聽命則遂伐之繼有書生吳志斗生長福建熟知海道利病以爲若欲收附且就澎湖發船往諭相水勢地利然後興兵未晚乃命祥充宣撫使給金符吳志斗禮部員外郎阮鑒兵部員外郎並給銀符往使琉球

二十九年三月自汀路尾澳舟行四月至澎湖而還 謹按琉球在南海之東漳泉興福四州界內澎湖諸島與彼相對天氣清明時望之隱約若煙若霧西南北岸皆水至澎湖漸低近琉球則謂之落際際者水趨下而

不回也凡西岸漁舟到澎湖以下遇颶風發漂流落際回者百一蓋琉球在外夷最小而險云 又元史外國傳曰三峴國近琉球世祖至元三十年命選人招誘之平章政事巴延等言此國之民不及二百戶時有至泉州爲商賈者去年軍船入琉球過其國國人餉以糧食館我將校無他志也乞不遣使從之

明太祖洪武五年正月命以卽位建元詔告琉球 琉球國有三王曰中山曰山南曰山北皆以尙爲姓而中山最强是年遣行人楊載使其國至九年夏前所遣刑部侍郎李浩自其國歸言琉球不貴絨綺惟貴磁器鐵釜自是賞賚多用諸物二十五年中山山南王從子及寨官子借肄業國學二十九年春令山南生肄國學者歸省冬復來中山亦遣寨官子及女官生姑魯妹二人先後來肄業其感慕華風如此 王圻曰其國有大琉球小琉球

和蘭 又名紅毛番地近佛郎機永樂宣德時鄭和七下西洋歷諸番數十國無所謂和蘭者其人深目長鼻髮眉鬚皆赤足長尺二寸頤偉倍常時福建商人歲給引往販大泥呂宋及咬囉吧者和蘭人就諸國轉販未敢窺中國自佛郎機市香山據呂宋和蘭開而慕之

明神宗萬曆二十九年駕大艦攜巨礮直薄呂宋呂宋人力拒之則轉薄香山澳澳中人數詰問言欲通貢市不敢爲寇當事難之稅使李道卽召其酋入城遊處一月不敢聞於朝乃遣還澳中人慮其登陸謹防禦始引

三十二年七月和蘭艦抵澎湖 海澄人李錦及姦商潘秀郭震久居大泥與和蘭人習語及中國事錦曰
若欲通賈市無若漳州者漳南有澎湖喚去海遠誠奪而守之賈市不難成也其僉麻章曰守臣不許奈何
曰稅使高案嗜金銀甚若厚賄之彼特疏上聞天子必報可會曰善錦乃代爲大泥國王書一移案一移兵備
副使一移守將俾秀震齎以來守將陶拱聖大駭亟白當事擊秀於獄震遂不敢入初秀與會約入閩有成議
當追舟相聞而會卞急不能待卽駕二大艦直抵澎湖時汛兵已撤如入無人之墟遂伐木築舍爲久居計錦
亦潛入漳州偵探詭言被獲逃還當事已廉知其狀并繫獄已而議遣二人諭其會還國許以自贖且拘震與
俱三人既與會成約不欲自彰其失第云我國尙依違未定而當事所遣將校齷齪忠齷齪往諭者乃多攜幣
帛食物覬其厚酬海濱人又潛載貨物往市會益觀望不肯去當事屢遣使諭之見會語輒不競愈爲所慢而
案已遣心腹周之範詣會說以三萬金餽案卽許賈市會喜與之盟已就矣會總兵施德政令都司沈有容將
兵往諭有容負膽智大聲論說會心折乃曰我從不聞此言其下人露刃相詰有容所懾盛氣與辨會乃悔
悟令之範還所贈金止以哆囉囉玻璃器及番刀番酒餽案乞代奏通市案不敢應而撫按嚴禁姦民下海犯
者必誅由是接濟路窮番人無所得食十月末揚帆去巡撫徐學聚劾秀錦等罪論死遣戍有差

熹宗天啟三年巡撫商周祚以紅毛番遵諭遠徙聞 紅毛侵奪臺灣地築室耕田久留不去海上姦民闖出
貨物與市已又出據澎湖築城設守漸爲求市計守臣懼禍說以毀城遠徙卽許互市番人從之果毀其城移

舟去周祚以聞然其據臺灣自若也

四年正月巡撫南居益發兵攻破紅毛番澎湖之警以息而其據臺灣者猶自若也

熈帝崇禎十年紅毛番薄廣州旋遁去先是紅毛番爲鄭芝龍所破不敢窺內地者數年乃與香山佛郎機通好私貿外洋至是駕四船由虎眺門薄廣州聲言求市其酋招搖市上好民視之若金穴蓋大姓有爲之主者當道鑿壕鏡事議驅斥或從中撓之會總督張鏡心初至力持不可乃遁去

呂宋

明永樂三年十月遣官齎詔撫諭其國至萬曆時佛郎機強與呂宋且市久之見其國弱可取乃奉厚賄遣王乞地如牛皮大建屋以居王不虞其詐而許之其人乃裂牛皮聯屬至數千丈圍呂宋地乞如約王大駭然業已許諾無可奈何遂聽之而稍徵其稅如國法其人既得地卽營室築城列火器設守禦具爲窺伺計資乘其無備襲殺其王逐其人民而據其國名仍呂宋實佛郎機也明史傳曰呂宋居南海中去漳州甚近閩人以其地近且饒富商販者至數萬人往往久居不返至長子孫佛郎機既奪其國遣酋來鎮處華人爲變多逐之歸留者悉被其侮辱然華商嗜利趨死不顧久之復成聚迫曠稅使者四出姦宄蠱起冒利有闕應龍張巖者言呂宋機易山素產金銀歲可采金十萬兩銀三十萬兩者卽納其奏懇朝駭異都御史溫純等連章力爭皆不聽遣人往勘實妄言而呂宋疑中朝將襲其國諸流寓者將爲內應先後殺死者二萬五千餘人朝廷不

能計其後華人復稍稍往蠻人利互市亦不據久之復成聚而佛郎機時已併滿刺加益以呂宋勢愈強橫遂據廣東香山澳築城互市患復中於粵矣

合貓里 明史傳曰海中小國也土瘠多山山外大海饒魚蠶人知耕稼其國又名貓里務近呂宋商舶往來漸成富壤華人入其國不敢欺陵市法最平故華人爲之語曰若要富須往貓里務

婆羅

明永樂四年十二月其國東西二王並遣使奉表朝貢 明史傳曰婆羅又曰文萊東洋盡處西洋所自起也唐時有婆羅國高宗時常入貢其地負山面海崇釋教惡殺喜施禁食豕肉犯者罪死有禮拜寺每祭用犧其王薙髮裹金縵巾佩雙劍出入徒步從者二百餘人萬曆時爲王者閩人也或言鄭和使婆羅有閩人從之留居其地後竟據其國而王之邸旁有中國碑王有金印一篆文上作獸形言永樂朝所賜民間嫁娶必請此印印背上以爲榮後佛郎機橫舉兵來擊王率國人走入山谷中放藥水流毒殺人無算王得返國佛郎機遂犯呂宋

瓜哇

元世祖至元二十九年二月詔出師征瓜哇 先是遣使臣右丞孟珙往其國乃大舉兵西征十二月福建江西湖廣三省軍會泉州自後渚啟行明年正月水陸並進破其國而還

三佛齊文節馬神
賈哇柔附

明太祖洪武三年遣使詔諭三佛齊 明年其王馬哈刺札八刺卜遣使奉表入貢時其國有王曰怛麻沙那阿者曰麻那哈寶林邦曰僧伽烈字蘭九年怛麻沙那阿者卒子麻那者巫里嗣明年遣使言嗣子不敢擅立請命於朝敕封爲三佛齊國王時瓜哇強已威服三佛齊而役屬之聞天朝封與已埒則大怒遣人誘朝使邀殺之天子亦不能問罪其國益衰三十年瓜哇據其國改其名曰舊港三佛齊遂亡國中大亂瓜哇亦不能盡有其地華人流寓者往往起而據之有梁道明者廣州南海縣人久居其國閩粵軍民泛海從之者數千家推道明爲首雄視一方會指揮孫鉉使海外遇其子挾與俱來永樂三年以行人譚勝受與道明同邑命齎敕招之道明及其黨鄒伯可隨入朝四年舊港頭目陳祖義遣子士良道明遣從子觀政並來朝祖義亦廣東人雖朝貢而爲盜海上貢使往來者苦之詐降於中官鄒和有施進卿者告之爲和所禽獻於朝伏誅時施進卿適遣婿邱彥城來朝命進卿爲舊港宣慰使雖受朝命猶服屬瓜哇其地狹小非故時三佛齊比也 明史傳曰其地爲諸蕃要會在瓜哇之西順風八晝夜可至轄十五洲土沃宜稼語云一年種穀三年生金言收穫盛而寶金多也俗富好淫習於水戰隣國畏之地多水惟部領陸居庶民皆水居編筏築室繫之於樁水漲則筏浮無沈溺患欲徙則拔樁去之不費財力下稱其上曰詹卑詹言國君也後大會所居卽號詹卑國改故都爲舊港初本富饒自瓜哇破滅後漸至蕭索商舶鮮至 明史文節馬神傳曰其國以木爲城其半倚山曾蓄織女數

百人出乘象則繡女執衣服刀劍及檳榔盤以從或泛舟則會跌坐牀上繡女列坐其下與相向或用以刺舟威儀甚都民多縛木水上築室以居如三佛齊女苦髮短問華人何以致長給之曰我用華水沐之故長耳其女僑之競市船中水以沐華人故靳之以爲笑端其深山中有一村名烏籠里憚其人盡生尾見人輒掩面走避然地饒沙金商人持貨往市者擊小銅鼓爲號置貨地上卽引退丈許其人乃前視當意者置金於旁主者遙諾欲售則持貨去否則懷金以歸不交言也 又曰文那馬神鄰境有買哇柔者性兇狠每夜半盜斬人頭以去裝之以金故商人畏之夜必嚴更以待始文那馬神曾有賢德待商人以恩信乎三十一人恐擾商船不令外出其妻乃買哇柔會長之妹生子襲父位聽其母族之言務爲欺詐多負商人價直自是赴者亦稀

蘇門答刺

明成祖永樂三年蘇門答刺會宰奴里阿必丁遣使來朝詔封爲國王 先是其王之父與隣國花面王戰中矢死王子年幼妻號於衆曰孰能爲我報仇者我以爲夫與共國事有漁翁聞之率國人往滅其王而還王妻遂與之合稱爲老王既而王子年長潛與部領謀殺老王而襲其位老王弟蘇幹刺逃山中連年率衆侵擾十三年中官鄧和至其國蘇幹刺以頒賜不及已怒統數萬人邀擊和勒部卒及國人大破之追至南渤利國俘以歸其王遣使入謝宣德九年王弟哈利之漢來朝明年遣弟哈尼者罕入朝言王老不能治事請傳位於子乃封其子阿卜養亦的爲王 明史傳曰蘇門答刺在滿刺加西順風九晝夜可至或言卽漢條枝唐波斯大

食二國地西洋要會也

蘇祿高藥
附

明永樂年蘇祿國三王來朝 東王巴都葛叭哈刺西王麻哈刺叱萬刺麻丁峒王妻叭都葛巴刺卜並率其家屬頭目凡三百四十餘人浮海朝貢禮之若滿刺加尋並封爲國王居二十七日辭歸東王卒於德州賜祭葬諡爲定留妻妾僮從十人守墓俟畢三年喪歸卽封其長子都馬舍爲蘇祿國東王至二十一年東王妃還國厚賜遣之 明史傳曰蘇祿地近淳泥閣婆洪武初發兵侵淳泥大獲以閣婆援兵至乃還萬曆時佛耶機屢攻之城據山險迄不能下其國常熱有珠池夜望之光浮水面土人以珠與華人市易大者利數十倍商舶將返輒留數人爲質冀其再來其旁近國名高藥出玳瑁原二百二十八

南夷

安南

宋理宗景定三年國王陳日昃表請世襲從之

元世祖中統二年封日昃子光骨爲安南國王

明太祖洪武二十一年國相黎季犛竊柄廢其主煒尋弑之立叔明子日焜主國事越數年中朝始覺命絕其使二十八年季犛告前王叔明之訃帝以叔明本篡弑弔祭則獎亂止不行移檄使知之惠帝建文元年季犛

大祿陳氏宗族而自立更姓名爲胡一元名其子蒼曰胡查謂出帝舜裔胡公後僞國號大虞年號元聖尋自稱太上皇傳位查朝廷不知也

成祖永樂元年遣使封胡查爲安南國王 查既自署權理安南國事表言高皇帝時安南王日燧率先輸

誠不幸早亡嗣絕臣陳氏甥爲衆所推於今四年望賜封爵帝命敕諭其陪臣父老凡繼嗣之有無推戴之誠

僞具以實聞既而查遣使進陪臣父老所上表如查所以誑帝者乃遣使封之然帝其國中自若也帝又惡其

侵奪思明逼掠占城方遣官切責而故陪臣裴伯耆詣闕告難又老撾送陳天平至

天平前王日燧孫
天明子日燧弟也

言黎賊

盡滅其族後裔止天平一人與賊不共戴天乞迅發師用章天討查方遣使賀正旦帝出天平示之皆錯愕下

拜有泣者伯耆責其使以大義惶恐不能答帝以查父子悖逆三年命官齎刺責查令具篡弑之實以聞查遣

其臣入朝謝罪祇言未嘗僭號改元請迎天平歸奉爲王帝不虞其詐乃令天平還國以兵五千送之四年三

月護天平入雞陵關將至岸站查伏兵邀殺天平帝大怒決意討之七月命督師南征夷將軍張輔等分道

進兵所至皆克十二月拔多邦城遂擣東都據之焚賊西都賊走入海五年正月大破季犛於木丸江宣詔訪

求陳氏子孫耆老千餘詣軍門言陳氏爲黎賊殺盡無可繼者安南本中國地乞仍入職方同內郡五月獲季

犛及僞太子安南盡平

五年六月詔改安南爲交趾設郡縣 設布都按三司以都督僉事呂毅等爲之設交州北岸等十五府分轄

三十六州一百八十一縣又設太原宣化等五州直隸布政司分轄二十九縣其地要害咸設衛所控制之黎
氏詩政一切蠲除遭刑者悉放免禮待高年碩德鰥寡孤獨無告者設養濟院懷才抱德者敦遣赴京又詔訪
求山林隱逸明經博學下及方技等凡奏舉九千餘人

七年二月復命英國公張輔帥師討交趾賊 時中朝所置吏務以寬厚輯新造而蠻人自以非類數相驚恐
陳氏故官簡定與化州僞官鄧悉阮帥等謀亂定乃僭大號紀元興慶國曰大越伺大軍還卽出扼三江府寇
交州近境皆響應守將出討無功命沐晟爲征夷將軍與賊戰於生厥江大敗乃敕輔統兵討之先敗賊於鹹
子關又敗之於太平海口時阮帥等推簡定爲太上皇別立陳季擴爲帝改元重光乃遣使自稱南安王孫
求封爵輔叱斬之進兵抵清化水陸軍會定及僞將相等俱就擒晟遣季擴至靈長海口季擴大感奉表乞降
帝心知其詐姑許之詔授交趾布政使其黨阮帥等各授以官賊究無悛心復命輔督軍合晟軍討之擒季擴
他賊盡平十三年班師入京復命輔出鎮十四年召還明年命豐城侯李彬代之交人故好亂時中官馬騏以
采辦至大索境內珍寶人情騷動桀驁者鼓煽之大軍甫還卽並起爲亂彬遣將討滅之而反者猶不止二十
年春彬卒詔榮昌伯陳智代彬時中官山壽言利未叛壽方鎮守與己相信遂遣壽齎敕授清化知府及得敕
卽借撫愚守巨智素無將略因借撫賊以愚中朝且與都督方政迂政寡謀多忌素不相能而山壽專招撫擁
兵又安不救是以屢敗宣德元年命成山侯王通等討之又詔大赦交趾罪人通素庸劣一戰而敗命安遠侯

柳升及沐晟等兩路進兵二年四月賊懼大軍至致書請和九月諸軍始抵隘留關利既與通有成言乃詭稱陳氏有遺詞誘乞罷兵立其後裔心知爲詐欲藉此息兵遂納其言

宣宗宣德二年十一月遣使撫諭安南盡撤軍民北還初帝嗣位卽欲棄交趾及利與壽表至示諭廷臣以罷兵意楊士奇楊榮力贊之惟蹇義夏原吉不可然意已決廷臣不敢爭至是命使齎詔盡赦安南人民罪令兵陳氏後人之寶以開因敕利以興滅繼絕意并諭王通北還詔未至通已棄交趾由陸路還廣西天下舉疾通棄地殃民而帝不怒也

六年六月遣使齎敕印命黎利權署安南國事利雖受敕命其居國稱帝紀元順天建東西二郡分十三道

各設官擬中國三司東都在交州府西都在清華府置百官設學校以經義詩賦二科取士彬彬有華風僭位六年私諡太祖子麟繼

英宗正統七年麟卒子濬繼其庶兄諒山王琮弑之而自立琮爲國人所誅以濬弟灝繼武宗正德四年灝庶子嗣誼在位四年改元端慶嗣一名灃七年受封多行不義十一年社堂燒香官陳嵩作亂殺嗣而自立詭言前王陳氏後仍稱大虞皇帝改元應天嗣臣都力士莫登庸初附嵩後與黎氏大臣阮弘裕等起兵討之嵩敗奔諒山道據地自保登庸乃共立嗣兄灝之子諱嗣徒擁虛位登庸擁兵權潛蓄異志黎氏臣鄭綬別立其族子酉榜發兵攻都城諒出走登庸擊破綬兵捕酉榜殺之益恃功專恣遂逼妻調母迎歸十六年率兵攻陳

嘉靖敗走死旋謀弑譚奔清華登庸立其庶弟慶遷居海東長慶府

世宗嘉靖十八年安南莫方瀛上表乞降 先是六年安南莫登庸令其黨僞為黎應禪詔篡其位改元明德

立子方瀛為皇太子旋既殺應九年禪位子方瀛自稱太上皇移居都齊海陽為方瀛外援作大誥五十九條頒之國中方瀛改元大正其年九月黎譚卒於清華國亡十五年帝以安南叛逆宜遣官往勘并議征討十六年安南黎甯遣國人鄧惟儉等備陳登庸篡狀言甯即譚子誦卒國人立甯為世孫權主國事屢赴邊告難俱為登庸邀殺乞師亟除賊八月雲南巡撫汪文盛謂登庸必可破即傳檄安南登庸父子乃具表乞降而黎甯懼天朝寬納其降備以本國篡弑始末及軍馬之數水陸進兵遣里來上俱下廷臣議不能決至是年方瀛又上表降並籍其土地戶口聽天朝處分凡為府五十有三州四十有九縣一百七十有六帝納之

十九年命削安南國為安南都統使司改十三道為十三宣撫司 萬曆時莫氏漸衰黎氏復興維潭世居清

華自為一國

神宗萬曆二十五年詔授黎維潭安南都統使 先是維潭漸強莫氏勢益衰二十一年廣西巡撫陳大科等

上言黎邦易姓如奕棋不當以彼之叛服為順逆止以彼之叛我服我為順逆今維潭雖圖恢復而茂洽固天朝外臣安得不請命而攔然戮之竊謂黎氏擅興之罪不可不問莫氏子遺之緒亦不可不請聽黎氏緝款而乃存莫氏比諸漆馬江亦不翦其祀於計為便廷議如其言至是款議既成詔授維潭都統使一如莫氏故

事自是安南復爲黎氏有而莫氏但保高平一郡終明之世兩姓分據終不能歸於一。明史傳曰安南都會在交州卽唐都護治所其疆域東距海西接老撾南渡海卽占城北連廣西之思明南甯雲南之臨安元江土膏腴氣候熱穀歲二稔人性獷悍驩滇二州多文學交愛二州多僞儒士較他方爲異

占城實重龍附

元世祖至元十九年十月命右丞索多等卽占城地立省以安撫之

明太祖洪武二年遣官以卽位詔諭占城國。時其王阿答阿者先已遣使來朝尋命使齋詔封爲占城國王三年遣使往祀其山川頒科舉於其國自後占城與安南國屢構兵天子輒遣使諭解之。明史傳曰國不解朔望但以月生爲初月晦爲盡不置閏分晝夜爲十更非日中不起非夜分不臥無紙筆用羊皮撻薄熏黑削細竹蘸白灰爲字狀若蚯蚓有城郭甲兵人性狠而狡貿易多不平戶皆北向民居悉覆茅檐高不得過三尺部領分差等門高卑亦有限崇釋教歲時采生人贖入酒中與家人同飲且以浴身曰通身是膽其國人采以獻王又以洗象目每伺人於道出不意急殺之取膽以去若其人驚覺則膽以先裂不足用矣置衆膽於器華人膽輒居上故尤貴之五六月間商人出必戒備王在位三十年則避位入深山以兄弟子姪代而已持齋受戒告於天曰我爲君無道願狼虎食我或病死居一年無恙則復位如初國中呼爲音黎馬哈喇乃至尊至聖之稱也有鱉魚潭獄疑不決者令兩造騎牛過其旁曲者魚輒躍而食之直者卽數往返不食也有尸頭變者

一名屍致魚本類人惟無瞳神爲異夜中與人同寢忽飛頭食人穢物來卽復活若人知而封其頸或移之他所其類卽死國設厲禁有而不告者罪及一家 又賓童龍國傳曰其國與占城接壤或言如來入舍衛國乞食卽其地氣候草木人物風土大類占城惟遭喪能持服葬以僻地設齋禮佛婚姻偶合曾出入乘象或馬從者百餘人前後讚嘯民編茅覆屋貨用金銀花布有崑崙山飾然大海中與占城及東西竺巽峙相望其山方廣而高其海卽曰崑崙洋諸往西洋者必待順風七晝夜始得過故舟人爲之諺曰上怕七州下怕崑崙

真臘

宋甯宗慶元中真臘滅占城并有其地 時改其國名曰占臘至元代仍稱真臘 明史傳曰在占城南順風三晝夜可至其國城隍周七十餘里輻員廣數千里國中有金塔金橋殿宇三十餘所王歲時一會羅列玉猿孔雀白象犀牛於前名曰百塔洲盛食以金盤金碗故有富貴真臘之諺刑有剗剔刺配盜則去手足番人殺唐人罪死唐人殺番人則罰金無金則鬻身贖罪 唐人者諸番呼華人之稱也凡海外諸國皆然以十月爲歲首閏悉用九月夜分四更亦有曉天文者能算日月薄蝕其地謂儒爲班詰僧爲苾芻道爲八思班詰不知讀何書由此入仕者爲華貴先時項掛一白練以自別既貴曳白如故俗尙釋教僧皆食魚肉或以供佛惟不飲酒其國自稱甘學智後訛爲甘破蘇萬歷後又改爲柬埔寨

明成祖永樂元年十月遣中官尹慶使滿刺加其地無王亦不稱國服屬暹羅歲輸金四十兩爲賦尹慶使至宣示威符及招徠意其會拜里迷蘇刺大喜遣使至京帝嘉之封爲滿刺加國王其使者言王慕義願同中國列郡請封其山爲一國之鎮御製碑文勒山上末綴以詩九年王率妻子陪臣來朝宴賜甚厚十二年王子母幹撒子的兒沙來朝告其父訃卽命襲封十七年率妻子陪臣來朝并訴暹羅見侵狀帝愍敕諭暹羅二十四年西里麻哈刺以父歿嗣位來朝宣德六年暹羅謀使其國遣使三人附蘇門答刺貢舟入訴復使齎敕諭暹羅正德末佛耶機強舉兵侵奪其地王蘇端媽未出奔遣使告難時世宗嗣位敕責佛耶機令還故土諭暹羅諸國王以救災恤鄰之義迄無應者滿刺加竟爲所滅後改名麻六甲 明史傳曰在占城南順風八日至龍牙門又西行二日卽至或云卽古頓遜唐哥羅富沙有山出泉流爲溪土人淘沙取錫煎成塊曰斗錫田瘠少收民皆淘沙捕魚爲業氣候朝熱暮寒男女椎結身體黝黑間有白者唐人種也俗淳厚市道頗平自爲佛耶機所破其風頓殊商舶稀至多直詣蘇門答刺然必取道其國率被邀劫海路幾斷其自販於中國者則直達廣東香山澳接跡不絕云

彭亨

柔佛丁
機宜附

明洪武永樂間遣使至十年十四年兩遣鄭和報之 明史傳曰彭亨一作澄亨在暹羅西其國土田沃氣候常溫米粟饒足煮海爲鹽釀柳漿爲酒上下親狎無寇賊然感於鬼神刻香木爲像殺人祭賽以禱災祈福至

萬曆時有柔佛國副王送其子至彭亨娶王女王置酒親戚會宴羅國王子爲彭亨王妹婿舉觴獻副王而手指有巨珠甚美副王欲之許以重賄靳不與副王怒卽歸國發兵來攻彭亨人出不意不戰自潰王與婆羅王子奔金山浮泥國王彭亨國王妃兄也率衆來援副王乃大肆焚掠而去 又柔佛傳曰柔佛近彭亨一名烏木礁林

永樂中鄭和過歷西洋無柔佛名或言和曾經東西竺山今此山正在其地疑是東西竺萬曆間其酋好構兵隣國丁機宜彭亨屢被其患華人販他國者多就之貿易時或邀至其國中覆茅爲屋列木爲城環以池無事通商於外有事則召募爲兵稱強國焉 又丁機宜傳曰瓜哇屬國也幅員甚狹僅千餘家柔佛黠而雄丁機宜與接壤時被其患後以厚幣求婚稍獲甯處其國以木爲城酋所居旁列鐘鼓樓出入乘象以十月爲歲首性好潔酋所食啜皆躬自剖烹民族類瓜哇物產悉如柔佛酒禁甚嚴有常稅然大家皆不飲惟細民無籍者飲之其曹偶咸非笑婚者男往女家持其門戶故生女勝男喪用火葬華人往商交易甚平自爲柔佛所破往者亦鮮

巴喇西 在南海去中國絕遠明武宗正德六年使臣沙地白自言始奉王命舟行四年半遭風飄至西瀾海舟壞止存一小艇又飄流八日至得吉零國居一年至祕得居八月乃遵陸行閱二十六日抵暹羅以情告王獲賜日給且賜婦女四人居四年迄今年五月始附番舶入廣東得達闕下

阿魯 亦名亞魯近滿刺加順風三日夜可至風俗氣候大類蘇門答刺 謹按王圻續考阿魯後載九

州山謂與滿刺加隣永樂七年鄭和往諭諸番遣官兵入山采香其山人皆駭歎天朝之兵威力若神原二百三十九

西南夷 明史土司傳曰西南諸蠻有虞氏之苗商之鬼方西漢之夜郎靡莫邛笮僂之屬皆是也自巴

夔以東及湖湘嶺嶠盤踞數千里種類殊別歷代以來自相君長原其爲王朝役使自周武王時孟津大會而庸蜀羌蠻微盧彭濮諸蠻皆與焉及楚莊躡王滇而秦開五尺道置吏治及漢武置都尉縣屬仍令自保此卽土官土吏之所始歟迨有明踵元故事大爲恢拓分別司郡州縣額以賦役聽我驅調而法始備然其道在於羈縻彼大姓相擅世積威約而必假我爵祿寵之名號乃易爲統攝奔走惟命然調發日繁急而生變恃功怙過侵擾益深故歷代徵發其害各半要在於撫綏得人恩威兼濟則得其死力而不足爲患 又曰初西南夷來歸卽授原官其土官襲替必奉朝命雖在萬里外皆赴闕受職天順末許土官呈繳勘奏則威柄漸弛成化中令納粟備賑則規取日陋孝宗雖發憤釐革而因循未改嘉靖九年始復舊制以府州縣等官隸驗封宣慰招討等官隸武選隸驗封者布政司領之隸武選者都指揮領之於是文武相維比於中土矣 又按憲宗成化十八年馬平主簿孔性嘗上言溪峒蠻獠雖常梗化亂豈無因昔陳景文爲令犛犛皆應差徭厥後撫字乖方始仍反側誠使守令得人示以恩信諭以禍福亦當革心帝嘉納之

湖廣土司 謹按明史湖廣土司曰施州曰永順曰保靖今以一統志考之則施州卽今之施南府屬湖南永順卽今之永順府屬湖南保靖則今爲縣屬永順府在明世則皆謂之湖廣蠻者也

明太祖洪武三年湖廣慈利土官覃屋構諸蠻入寇征南將軍周德興討平之五年復命鄧愈爲征南將軍率師平散毛等三十六洞而副將軍吳良復平五開古州諸蠻凡二百二十三洞籍其民一萬五千收聚潰散士卒四千五百餘人平其地未幾五開五谿諸蠻亂討平之十八年五開蠻吳面兒反勢熾甚命楚王椿等擊斬九谿諸處蠻獠俘獲四萬餘人諸苗始懼而靖沅道澧之間十年內亦尋起尋滅雖開國之初師武臣力實帝控制之道恩威備焉永樂初苗告繼絕襲冠帶益就銜勒垂百年而五開銅鼓間又紛紛多警

景帝景泰初年蠻賊侵掠黔楚諸郡邑 時英宗北狩中原所在侵擾苗勢殊熾至天順元年總督石瑄調總兵官方瑛始尅期征剿於是苗患漸平 明史土司傳曰苗患萌發於貴州而蔓衍於湖南皆生苗爲梗諸土司初無動搖而永保諸宣慰世席富強每遇征伐輒願荷戈前驅國家亦賴以捷伐故永保兵號爲雄嘉隆以遣徵符四出而湖南土司均備臂指矣

施州

明太祖洪武十四年改施州爲衛 隋爲清江郡改施州至是改衛置軍民指揮使司屬湖廣都司領軍民十戶所一曰大田領宣撫司三曰施南曰散毛曰忠建領安撫司八曰東鄉五路曰忠孝曰金峒曰龍潭曰大旺曰忠峒曰高羅領長官司七曰搖把峒曰上愛茶峒曰下愛茶峒曰劍南曰木冊曰鎮南曰唐崖領蠻夷長官司五曰鎮遠曰隆奉曰西坪曰東流曰臘壁峒又有容美宣撫司者在境內領長官司四曰椒山瑯

璠曰五峯石寶曰石梁下峒曰水靈源通壇

成祖永樂四年三月命改散毛施南仍爲宣撫司 先是洪武初諸土司長官來降者皆予原官蠻苗吳面兒之難諸土司地多荒廢長官亦罷承襲至永樂故土官之子等以覲職請

宣宗宣德二年設劍南長官司等皆以其酋長爲之 先是忠路安撫司等各奏前元故土官子孫率酋蠻等各擁蠻民久據谿洞今就招撫請設官司授以職事帝以取蠻當順其情所授宜有等殺都議四百戶以上設長官司四百戶以下設蠻夷官司元土官子孫量授以職遂設劍南長官司隸忠路安撫搖把峒上愛下愛二茶峒三長官司及鎮邊隆奉二蠻夷官司皆隸東鄉五路安撫東流臘壁峒二蠻夷官司隸散毛宣撫石關峒長官司西坪蠻夷官司隸金峒安撫皆授其酋長從所招官司管屬

世宗嘉靖三十三年詔湖廣川貴總督并節制容美十四司 初容美土司田世爵與把隘土官向元楫累世相仇元楫幼世爵佯爲講好以女嫁之謀奪其產因誣元楫以姦有司恐激變令自捕元楫下獄論死世爵遂發兵盡俘向氏并籍其土皆沒入之久之撫按知其謀責與元楫對狀世爵不出陰與羅峒土舍黃中等謀叛於是湖廣巡按周如斗請移荆南道分巡施州衛以便控制調廣西清浪等戍軍實行伍督臣馮岳等言施州地勢孤懸不可久居戍軍亦非一時可集當移荆襄守備於施州九永守備於九谿上荆南道備巡歷至世爵驕橫有司不能攝治獨久繫元楫何爲宜假督臣以節制容美之權問世爵抗違之罪如不悛卽繩以法從之

神宗萬曆十一年命施州衛施南等宣撫各官仍聽鎮守參將節制 明史土司傳曰崇禎十二年容美宣撫田元疏言六月間撫治兩臣調用土官臣卽捐行糧戰馬立遣土兵七千令副長官陳一聖等將之前行悍軍鄧維昌等憚征調遂與譚正賓結七十二村鳩銀萬七千兩賂巴東知縣蔡文陞以逼民從軍之文上報阻忠義而敗邊釁命撫按核其事時中原寇盜充斥時事日非卽土司徵調不至亦不能問矣

永順

明太祖洪武五年置永順等處軍民宣慰使司 領湖廣都指揮使司領州三曰南渭曰施洛曰上溪長官司六曰臘惹洞曰麥著黃洞曰臘遲洞曰施洛溪曰白崖洞曰田家洞

武宗正德六年永順土舍彭世麟以計擒四川賊捷開獎賚有差 四川賊藍廷瑞鄒本恕等及其黨二十八人倡亂兩川烏合十餘萬人僭王號置四十八營攻城殺吏流毒黔楚總制尙書洪鍾等討之不克已而爲官軍所逼乏食乃伴聽撫劫掠自如廷瑞以女結婚於世麟世麟僞許之因與約期廷瑞本恕及王金珠等二十八人皆來會世麟伏兵擒之餘賊渡河官兵追斬及溺死者七百餘人總制巡撫以聞各加獎賚論者以是役世麟爲首功

世宗嘉靖三十三年十二月調永順土兵協剿倭賊於蘇松 明史傳曰先是永順兵剿新墟倭故不出保靖兵爲所誘遽先入永順土官田益田豐等亦爭入爲賊所圍皆死之及王江涇之戰保靖踏之永順角之斬

覆一千九百餘級倭爲奪氣蓋東南戰功第一云

神宗萬曆二十五年調承順兵赴援遼東 時東事棘調承順兵萬人赴援宣慰彭元錦請自備衣糧聽調既而支吾有要挾之迹命罷

保靖

明太祖洪武元年升保靖安撫司爲宣慰使 唐溪州地宋置保靜州元爲保靖安撫司太祖初起時彭世雄率屬歸附命仍其舊官洪武元年以彭萬里朝貢乃升爲宣慰

宣宗宣德四年七月命擇衆所推服者爲保靖宣慰司 兵部奏保靖舊有二宣慰一爲人所殺一爲殺人當死其同知以下官皆缺請改流官治之帝以蠻性難馴流官不諳土俗故有是命

世宗嘉靖三十三年詔調保靖土兵征倭 命宣慰彭盡臣帥所部三千人赴蘇松明年遇倭於石塘灣大戰敗之賊北走平望諸軍尾之於王江涇大破之錄功以保靖爲首敕賜盡臣銀幣并三品服令統兵益擊賊先是保靖兵追倭至新塢倭二千人伏不出土舍彭翹引軍探之中伏與所部皆死贈翹一官并賜棺殮具及王江涇捷進盡臣爲昭毅將軍既復加右參政管宣慰司事

原一百四十

四川土司

明太祖洪武初置四川布政司使招諭諸蠻 帝略定邊方首平蜀置布政司使招諭諸蠻次第歸附 明史

傳曰四川土司諸境多有去蜀遠去滇黔近者如烏蒙東川近於滇烏撒鎮雄播州近於黔太祖首平獨摺諭諸蠻故烏蒙烏撒東川芒部舊屬雲南者皆隸於四川不過歲輸貢賦示以羈縻然夷性犷悍嗜利好殺爭相競尚焚燒劫掠習以爲恆去省窻遠莫能控制附近邊民咸被其毒皆由規模草創未嘗設立文武爲之鈐轄聽其自相雄長雖受天朝爵號實自王其地以故終明之世常煩撻伐惟建昌松茂等處設立衛所播州改遊義平越二府以後稍安輯云 謹按明史四川土司曰烏撒烏蒙東川鎮雄曰馬湖曰建昌南番越曰茂

州曰松潘曰天全六番曰黎州曰播州曰永甯曰西陽曰石砬今以一統志考之雲南之昭通府卽昔日之烏

撒烏蒙地鎮雄本稱府降爲州屬昭通府東川今爲府屬雲南布政使司若馬湖則昔爲府今併入四川之敘

州建昌則昔爲衛今改置甯遠府甯番越爲衛並井爲鹽源縣會川爲會理州茂州直隸四川布政使司松潘舊爲衛今改屬龍安

府天全六番今爲天全州治碶門城屬雅州府黎州今爲清溪縣亦屬雅州播州今爲遵義平越二府地永甯

今爲縣屬湖南西陽今爲永順縣屬湖南永順府石砬今爲宣慰司在明世則皆謂之四川蠻者也

烏撒烏蒙東川鎮雄

元世祖至元二十四年立烏撒烏蒙宣慰使以東川芒部隸之二十八年立東川路又置芒部路軍民總管府

明太祖洪武十五年置東川烏撒烏蒙芒部諸衛指揮使司 時以雲南已降附諭諸部長率土人墮疆界遠

近開築道路各廣十丈準古法以六十里爲一驛又敕征南將軍以諸部雖降恐大軍一還仍復囁聚宜悉送

其會長入朝

十六年以雲南所屬烏撒芒部三府隸四川布政使司 明年皆改爲軍民府而定其賦稅并定茶鹽布疋易馬之數

二十一年命西平侯沐英頌國公傅友德等征東川 帝敕友德等曰東川芒部諸夷種類皆出於獯豸厥後子弟蕃衍各立疆場乃異其名曰東川烏撒烏蒙芒部祿釐水西無事則互起爭端有事則相爲救援若唐時閣羅鳳亡居大理唐兵追捕道經芒部諸境羣蠻聚衆據險設伏唐將不備遂墮其計喪師二十萬皆將帥無謀故也須預爲之備

二十三年烏撒土知府阿能及烏蒙芒部上官各遣子弟入監讀書 至宣德八年以烏蒙通判黃甫越言元時尙有學校今文廟雖存師儒未建乞除教官選俊秀子弟入學讀書以廣文治從之

世宗嘉靖五年以芒部隴氏無人承襲改設鎮雄府流官 兵部奏隴氏聲起蕭牆騷動南省王師大舉始克蕩平今其本屬親支已盡乏人承襲請改爲鎮雄府設流官知府統之分屬夷良毋讐落角利之地爲懷德歸化威信安靜四長官司使隴氏疎屬阿濟白壽祖保阿萬四人統之以通判程洸爲試知府明年芒部賊沙保等謀復隴氏擁隴壽子勝糾衆攻陷鎮雄城執程洸奪其印殺傷數百人洸奔畢節

九年四月革鎮雄府流官以隴勝爲通判署府事 先是沙保之亂言者以初設流官蠻情未服有司不亟收

遣裔隴勝而合沙保煽禍宜速剿寇議者或謂用兵爲失計或謂用流非長策又時值荒饑帝亦軫念災傷令罷芒部兵俟有秋再議征誅於是川貴撫按等以烏蒙烏撒東川諸土官故與芒部爲唇齒自芒部改流諸部內懷不妄反者數起今懷德長官阿濟等雖自詭擒賊固望隴勝得一職以存隴後請俯順輿情又首惡如毋響祖保等宜剿誅以折其驕氣始下撫處之令許生獻沙保等得阿濟以不死然後復隴勝故職或降爲知州其長官或因或革或分隸庶操縱得宜恩威並著乃革流官知府而以勝署事令三年後果能率職奉貢準復知府舊銜

神宗萬曆三十八年詔東川土司並聽雲南節制 時巡按鄧灑疏稱蜀之東川偏處武定尋甸諸郡只隔一嶺出沒無時朝發夕至其酋長祿壽祿哲兄弟安忍無親日尋干戈其部落以刦殺爲生不事耕作蜀轄遠遼法紀易疎滇以非我屬內號令不行以是驕蹇成習目無漢法請改勅滇撫兼制東川因條三利以進詔從之 應按明史土司傳萬曆四十三年雲南巡按吳應琦言東川土官祿壽祿哲爭襲以來各縱部衆越境刦掠擁衆千餘剽掠兩府澆旬之間村屯並掃荼毒未有如此之甚者或撫或剿毋令養禍日滋下所司勘奏泰昌元年雲南巡撫沈儼炳等言蜀之東川業奉朝命兼制然事權全不相關祿千鍾祿阿伽縱賊披猖爲患不已是東川雖隸蜀而相去甚遠雖不隸滇而禍實震鄰宜特勅蜀撫按凡遇襲替務令兩省會勘蜀察其世次滇亦按無侵犯方許起送亦屬縻緩靜之要術也詔下所司蓋東川雖聽雲南節制而終不能靖如此 又案土

司傳萬曆四十三年貴州巡按御史楊鶴言烏撒土官自安雲龍物故安阻與安效良爭官奪印仇殺者二十
年夷民無統盜寇蜂起堡屯焚燬行賈梗絕者亦二十年是爭官奪印者蜀之土官而蹂踐糜爛者黔之赤子
誠改隸於黔則彈壓既便于戈可戢又言烏撒者滇蜀之咽喉要地臣由普安入滇七日始達烏撒見效良之
父紹慶據霪益當曲靖之門戶效良據烏撒又扼滇蜀之咽喉父子各據一方且壤地相接無他郡縣上司以
隔絕鈐制之將來尾大不掉實可寒心蓋黔有可制之勢而無其權蜀有遙制之名而無其實誠以爲屬黔中
便時雖命所司速議而未及行此今改隸貴州名威甯州所由發其端也

馬湖

元世祖至元十二年置馬湖路 漢牂牁郡內地有龍馬湖因名焉唐爲羈縻州四總名馬湖部宋時蠻主屯
湖內至是內附立總管府遷於夷部溪口瀕馬湖之南岸創府治其民散居山箐無縣邑鄉鎮領軍一曰長甯
州一曰戎

明太祖洪武四年冬授馬湖土官知府世襲 孝宗弘治二十年改流官

建昌 本古邛部地漢武帝置越巂郡隋唐皆爲嶺州至德初沒於吐蕃貞元中復之懿宗時爲蒙詔所

據改建昌府以烏白二蠻實之其後諸酋爭強不能相下分地爲四推段興爲長其裔浸強遂併諸酋自爲府
主大理不能制傳至阿宗娶落蘭部建蒂女沙智元世祖至正十二年立建昌路憲宗朝建蒂因附以其婿阿

宗守建昌至是析其地置總管府五州二十三建昌爲其一路領縣一曰中州九曰建安永甯瀘禮領一縣曰瀘沽里
關印部隆姜 明太祖洪武十五年置衛 附甯番越嶲鹽井會川四衛皆洪武間置

茂州 古冉駝國地漢武帝置汶山郡宣帝爲北部都尉隋爲蜀州尋改會州唐貞觀改茂州宋元仍舊

治汶山縣元武宗大德二年改安撫司爲宣撫遷治文川縣時武靖王搆思班與朶思麻宣慰司言宣撫司官
皆他郡人不知蠻夷事宜縱至成濯州畏懼卽返何以撫治宜改安撫爲宣撫遷治茂州徙松州軍千人鎮邊
爲便 明史土司傳曰茂州長官司三一曰隴木茂州通西域要路爲桃坪卽右桃關其長官卽隴木里人洪

武時歸附世襲長官歲貢馬二匹所屬玉亭神溪十二寨俱爲編氓有保長統之一曰靜州卽唐之悉唐縣地

其長官亦靜州里人正德間與岳希蓬土酋節孝爲亂攻茂州斷水道七日節孝弟車勺潛引水以濟我軍事

平使車勺襲賊轄法虎核桃溝八寨俱編戶爲民亦有保長統之疊溪千戶所領長官司二永樂四年置一曰疊溪

在治北一里洪武十五年郁氏歸附給印世襲所轄河東熟番八寨皆大姓及馬路小關七族其土舍轄河西

小姓地土廣遠饒畜產稞麥路積人皆梟黠名雖熟番與生番等一曰鬱卽在治西十五里萬曆十八年長官

嗽保與黑水松坪稱兵攻新橋明年伏誅漢關墩附近諸小姓舊屬鬱卽至是改屬疊溪初都督方政平曆日

諸寨設長甯安撫司隸松潘至正統元年以其遼闊亦改隸於疊溪守禦千戶 又曰茂州地方數千里自唐

武德改郡會川領羈糜州九前後皆蠻族向無城郭宋熙甯中范百常知茂州民請築城而蠻人來爭百常與

之拒且戰且築城乃得立自宋迄元皆爲羌人所據不置州縣者幾二百年洪武十一年平蜀置疊溪右千戶所隸茂州衛而置威茂道開府茂州分遊擊以駐疊溪規防始立然東路生羌白草最強又與松潘黃毛韃相通出沒爲寇相沿不絕云

松潘 古氏羌地漢置護羌校尉唐初置松州都督廣德初陷於吐蕃宋時吐蕃將潘羅支領之名潘州

元世祖時內附置松潘宕蠻威茂州等處軍民安撫使領於吐蕃宣慰司

明太祖洪武十二年命平羌將軍丁玉定松潘地 敕之曰松潘僻在萬山接西戎境以屢寇邊故征之今知松州已克徐將資糧於容州進收播州若盡三州之地則疊州自當來服須擇勇士守納都疊溪路其驛道無阻過者不可定也遂併潘州於松州置松州衛城其地十三年帝以松州遠在山谷屯餉爲難命罷之未幾指揮耿忠奏松州爲番蜀要害地不可罷命復置十四年置松潘等處安撫司以龍州知州薛文勝爲安撫使又置十三族長官司曰勒都曰阿昔洞曰北定曰牟力結曰貉匝曰祈命曰山洞曰麥匝曰者多曰占藏先結曰包藏先結曰班班曰白馬路其後復隸松潘者長官司四白阿思曰思囊兒曰阿用曰潘幹寨安撫司四曰八郎曰阿角寨曰麻兒匝曰芒兒者後又以思囊日安撫司附焉

宣宗宣德二年四月四川巡按等奏蠻寇擁衆萬餘傷敗官軍帝意邊將必有激之者旣而都司奏實由千戶錢宏因調軍征交趾衆憚行宏詭言番寇至當追捕冀免調又領軍突入麥匝諸族逼取牛馬番人忿怨復以

大軍將致討懼之番衆驚潰約黑水生番爲亂圍松潘疊溪茂州斷索橋出掠綿竹諸縣官署民居皆被焚燬命官軍亟討之而梟寇於松潘以徇并竄諸將之貪淫玩寇者次年松潘平九年敕官剿撫松潘榜諭福威茂諸衛俱聽命惟松潘疊溪所轄任昌巴豬黑虎等寨梗化官軍以次進平龍溪等三十七寨班師還

世宗嘉靖五年命都督僉事何卿鎮守松潘先是正德十六年松潘熟番八大驢作亂官軍平之至是黑虎五寨及烏都鶴鶴諸番叛卿次第平之降者日至卿有威望在鎮十七年松潘以甯二十三年以北警召卿入衛繼之者皆爲巡撫劾罷二十六年復命卿往鎮時白草番亂卿會巡撫張時徹討擒渠惡數人俘斬九百七十餘級克營寨四十七毀礮房四千八百獲馬牛器械儲積無算終帝之世松潘鎮號得人邊境安堵焉明史傳曰松潘以孤城介絕域寄一綫饋運路於龍州制守爲難洪武時欲棄者數以形勝扼險不可罷乃內修屯務外輯羌戎因時拊循擇人爲理番衆相安者四十餘年及宣德初調兵起釁致動干戈自是置鎮建牙宿重兵以資彈壓亦時叛時服自漳臘以北卽爲大荒斯籌邊者之所亟圖也

天全六番

古

氏

地五代孟蜀時置礮門黎雅長河西魚通甯遠六軍安撫司宋因之隸雅州元置六安

撫司屬土番等處宣撫司後改六番招討又分置天全招討司世祖至元二年雅州礮門宣撫使高保四言礮門舊有城邑中統初爲宋人所廢衆依山爲柵去礮門半舍欲復戍故城便於守佃敕秦蜀行省相度得宜城如可復當助成之十六年詔發新附軍及蒙古漢軍千人戍礮門魚通黎雅次年又敕東西兩川發蒙古漢軍

成魚通黎雅

明太祖洪武二十一年詔更天全六番招討司爲武職 明史傳曰初宣慰余思聽王德貴歸附始降司爲州

設雅州千戶所而設關門百戶近天全六番之界蓋其地爲南詔咽喉三十六番朝貢出入之路三十六番者皆西南諸部

落所謂三十六種也其貢道皆由雅州入

黎州 漢沈黎郡地史記稱越嶲以東北君長以十數徭部最大自唐蒙通夜郎邛笮之君請爲內臣因

置筰都縣復曰旄牛縣元鼎中以爲沈黎郡唐割雅嶲二州置黎州天寶初改爲洪源郡尋改漢源宋屬成都路元至元十三年後立嘉定路以周雅黎邛隸之二十年又割二州領於吐蕃招討使

明太祖洪武八年省漢源縣置黎州長官司以苻德爲長官 明史傳曰黎雅諸蠻宋時屢爲邊患明興以諸蠻皆天全六番諸部散居於二州之境遂於黎州設安撫天全六番設招討以示羈縻 又曰初與安撫司同置者有大渡河守禦千戶所唐時河平廣可通漕戍將一不守則黎雅邛嘉成都皆動搖宋建隆三年王全斌平蜀以圖來上議者欲因兵威復越嶲藝祖以玉斧畫圖曰外此吾不有也自後河中流忽陷下五六十丈水至此洶湧如空落船筏不通名爲噎口殆天設險以限內外云

播州 秦爲夜郎且蘭地漢屬牂牁唐貞觀中改播州乾符初南詔陷播太源楊端應募復其城爲播人

所懷服歷五代子孫世有其地宋大觀中楊文貴納土置遵義軍元世祖至元十二年從四川行樞密院皆順

官播州楊邦憲未知逆順降詔使之自新並許世紹封爵十四年邦憲言本族自唐至宋世守此土將五百年
昨奉旨許令仍舊乞降璽書又借思州安撫使田景賢請降詔禁戍卒毋擾思播之民

明太祖洪武五年置播州宣慰使司 時宣慰使楊鏗同知羅琛總管何嬰蠻夷總管鄒瑚等相率來歸納元
所授金牌銀印銅章詔賜鏗衣幣鏗琛皆仍舊職領安撫司二曰草塘曰黃平長官司六曰貞州曰播州曰餘
慶曰白泥曰容山曰重安以嬰等爲長官七年復置播州黃平宣撫司播州江渡蠻黃安作亂貴州官軍討平
之十五年城播州沙溪以官兵三千戍之改宣慰司隸貴州改黃平衛爲千戶所

成祖永樂四年設重安長官司隸播州 時以張佛保嘗招輯重安蠻民卽以爲長官

神宗萬曆十九年播州楊應龍反命總督李化龍討平之 先是貴州巡撫葉夢熊等疏論應龍凶惡諸大罪
四川巡撫按李化龍疏請寬之由是川貴撫按相爭辨廷議從公會勘夢熊主議播州所轄五司改土爲流悉
屬重慶與化龍意復相左蓋應龍本雄猜阻兵嗜殺所轄五司七姓悉叛離髮妾田屠妻張氏并及其母妻叔
張時照與所部何恩宋世臣等告應龍反夢熊請剿之蜀中士大夫咸謂蜀三面臨播屬裔以什伯數皆其彈
壓且兵騎勇數征調有功剪除未爲長策會倭大入朝鮮徵天下兵應龍因奏辨願將兵征倭自贖詔釋之而
仍抗不聽勘於是蜀撫用兵之議遂決 明史傳曰化龍於二十八年二月十二日督師分八路每路約三萬
人官兵三之土司七之旗鼓甲仗森立苗大驚疑破其前鋒朝棟僅以身免賊膽落遂克桑本烏江假三關奪

天都三百落諸國又破九盤入婁山關關爲賊前門萬峯插天中通一綫從問道攀藤毀柵入陷焉四月朔師屯白石賊決死戰縱親衝中堅分兩翼夾擊追奔至養馬城連破龍爪海雲險國壓海龍國賊所倚天險謂飛鳥騰猿所不能逾者時偏沅師已破青蛇國水西兵亦奪落濠關至大水田焚桃溪莊賊見勢急每路投降文緩師總兵吳廣入崖門關營水牛塘賊詐報應龍仰藥死廣益厲兵攻燒二關奪樵汲路八路師齊集海龍國更番迭攻化龍念前國險不能越令勦兵并力攻其後天苦雨將士馳泥淖中苦戰六月四日天忽霹靂先士卒克土城應龍見火光燭天大兵已登國入倉皇問二妾閨室自焚廣獲其子朝棟急覓應龍屍出陷中賊平至三十一年播州餘逆吳洪等叛官軍討平之分播地爲二屬蜀者爲遵義府屬黔者爲平越府

永甯 唐瀘州地宋爲瀘州江安合江二縣境元世祖至元十四年詔諭瀘州西南番蠻王阿永筠連騰串等處諸族蠻夷使其來附二十年右丞伊蘇岱爾招撫筠連州定州阿永都掌等蠻遂置路領州二曰筠連曰騰川後改爲永甯宣撫司

明太祖洪武四年詔置永甯衛 時方平蜀永甯歸附故有是詔

憲宗成化四年永甯宣撫奢貴開通運道擒獲賊首降聖書獎賚之 先是元年山都掌大壩等寨蠻賊分劫江安等縣二年國子學錄黃明善奏山都掌蠻屢歲寇掠近宣撫奢貴赴大壩招撫亦未效宜早爲定計三年明善復言宋時多剛縣蠻爲寇用白芩子兵破之白芩子者卽今之民壯多剛縣者今之都掌多剛寨也前代

用鄉兵有明效宜急募民壯以助官軍都掌水稻十月熟宜督兵先時取其田禾則三月之內蠻必餒矣軍宜分三路南從金鵝池攻大壩中從戎縣攻箐前北從高縣攻都掌小寨破大寨自拔又大壩南百餘里爲芒都西南二百里爲烏蒙令二府土官截其險要更用火器自下而上順風延燒寨必可攻且征調土兵須處置得宜招募民壯須賞罰必信詔總兵官參用之至是奢貴有功乃加獎賚從總督尙書程信奏也

十六年白蠶蠻孛子與都掌大壩蠻相攻禮部侍郎周洪謨言臣叙人也知敘蠻情戎珙筠高諸縣在前代皆土官國朝始代以流用激變洪永宣正四朝四命將徂征隨服隨叛景泰初益滋蔓都御史汪浩徼幸邊功誣殺所保土官及寨主二百餘人諸蠻痛恨轉肆劫掠尙書程信統大兵僅能克之宜及今順變情擇衆所推服者爲大寨主俾世襲庶可相安又言白蠶蠻者相傳爲廣西流蠻有衆數千無統屬景泰中糾戎珙苗攻破長甯九縣今又侵擾都掌其所居崖險警深旣難蕩滅亦宜立長官司治之地近芒都宜卽隸之孛子者永甯宣撫所轄而永甯乃雲貴要衝南跨赤水畢節六七百里以一柔婦人制數萬強梁之衆故每肆劫掠臣以爲宜撫土獠仍令宣撫奢貴治之其南境寨蠻近赤水畢節要路者宜立二長官司仍隸永甯宣撫夫土官有職無俸無損國儲有益邊備從之

熈宗天啟元年永甯土官奢崇明據重慶以叛圍成都僞號大梁布政司朱璽元等分門固守石柱女土官秦良玉統精兵至諸援兵亦漸集相持百日會賊將羅乾象輸款自效夜縱火焚賊營崇明父子倉皇奔錢帛

米穀委棄山積窮民賴以活時燮元已授巡撫率川卒追崇明汪安新都遵義諸郡邑皆復

三年川師平蘭州先是樊龍收餘衆數萬據重慶險塞燮元督良玉等募二郎關又破佛國關官軍與平茶

西陽石砦三土司兵合圍重慶城中乏食燮元遂以計擒樊龍殺之

愍帝崇禎初年起朱燮元總督貴湖雲川廣諸軍務會師剿賊燮元前總督川師平蘭州請以赤水河爲界

河東龍場屬黔河西赤水永甯屬蜀永甯設道府與遵義建武聲勢聯絡未幾以交喪去崇明邦彥得稽誅崇

明稱大梁王邦彥號四裔大長老諸稱元帥者不可勝計合兵十餘萬規先犯赤水至是燮元大會師定計誘

賊深入永甯邀之於五峯山桃紅壩令總兵侯良柱大敗之崇明邦彥皆授首

酉陽 漢武陵郡酉陽縣地宋爲酉陽州元至元時置紹慶府領州四一爲酉陽泰定四年紹慶路四洞

首阿者等降並命爲蠻夷長官仍設巡檢司以撫之

明太祖洪武八年命置酉陽宣撫司以冉如彪爲使

神宗萬曆四十六年調酉陽兵四千命宣撫冉躍龍將之援遼兵部尙書張鶴鳴言臣前在貴州時躍龍捐

餉征紅苗屢建奇功今又著節於邊宜加優卹以諷諸邊

石砦 本漢牂牁郡地以石澶關徑蒲關而名後周置施州唐改青江郡宋末置石砦安撫司元改石砦

軍民府尋仍爲安撫司

明太祖洪武八年改石砭安撫爲宣撫司隸重慶府

神宗萬曆二十二年石砭女土官覃氏行宣撫事 時土吏馬邦聘謀奪其印與其黨馬斗斛等集衆數千圍

覃氏縱火焚公私廬舍八十餘所殺掠一空覃氏奏言臣自從征疊茂擊賊大雪山皆著成勞今邦聘無故虐

劉孤寡臣以未有朝命不敢出兵角勝請比先年楚金洞會覃碧謀篡事與邦聘同就吏會次年楊應龍反播

州覃與楊爲姻而斗斛亦結應龍兩家觀望獄遂解 明史傳曰覃氏有智計性淫故與應龍通長子千乘失

愛暱次子千駟謂應龍可恃因聘其女爲千駟妻千駟入播同應龍反千乘襲馬氏爵應調與西陽冉御龍同

征應龍應龍敗千駟伏誅而千乘爲宣撫如故千乘卒妻秦良玉以功封夫人

察宗天啟二年授石砭女土官秦良玉都督僉事充總兵官 良玉饒膽智善騎射兼通詞翰儀容嫺雅而取

下嚴峻戎伍肅然所部號白桿兵爲遠近所憚先是萬曆時征播州秦昌時援遼天啟時赴榆關及復崇慶援

貴州屢建大功良玉初舉兵卽以疏聞命封夫人至是復有是命崇禎三年奉詔勤王出家財濟餉帝優詔褒

美召見平臺賜采幣羊酒賦四詩旌其功七年歸自京師不復援剿專辦蜀賊二月賊陷夔州圍大平良玉至

乃走十二年敗羅汝才兵斬其魁東山虎又破之仙寺嶺奪汝才大纛擒其渠副場天賊勢漸衰當是時督師

楊嗣昌盡驅賊入川川撫邵捷春提弱卒二萬守重慶所倚惟良玉及張令二軍十月張獻忠連破官軍令爲

賊所殘良玉趨救不克轉鬪復敗所部三萬人略盡乃單騎見捷春陳辦賊計旣又圖全蜀形勢上巡撫陳士

奇巡接劉之物皆不能用十七年春全蜀盡陷夏玉約所部分兵守四境賊逼招土司獨無敢至石砭者後以
壽終原二百
四十一

雲南土司 明史傳曰大理臨安以下元江永昌以上皆府治也孟良孟定等處則爲司新化北勝等處

則爲州或設流官或仍土職今以諸府州槩列之土司者從其始也蓋滇省所屬多蠻夷雜處卽正印爲流官亦必以土司佐之而土司名目淆雜難以縷析故係之府州以括其所轄而於土司事迹止據其大綱有關於治亂興亡者俾控馭者識所鑒焉 謹按雲南卽滇國也馬考始於頃襄王使莊躑略地至滇終於蜀漢諸葛

孔明置雲南郡今以明史雲南土司傳考之則隋置昆州

隋志無昆州唐志昆州注本隋志隋亂廢考隋書南甯州蠻蠻既拜昆州刺史叛服不常故志不載耳

唐仍之後爲南詔蒙氏所據改鄯闡府歷鄯趙楊三氏至大理段氏以高智昇領鄯闡牧遂世其地元初置鄯闡萬戶府既改置中慶路封子和克爲雲南王鎮之仍錄段氏子孫守其土和克死其子嗣封爲梁王蓋雲南自古爲遐荒僻裔蠻獍所居漢武始開置郡縣隋唐之際羸糜而已迄於蒙段專制一方元時乃入版圖同內地而道里荒遠史籍無徵者多矣茲若不從明土司傳體例則名目淆雜誠難辨晰故雖參稽他書而仍係之府州等分列於後

雲南

明太祖洪武十四年征南將軍傅友德等率師至雲南城定其地改中慶路爲雲南府至是友德等分兵攻諸

蠻寨之未服者土官楊直乘隙作亂集蠻衆二十餘萬攻雲南城時城中食少士卒多病寇至都督謝鵬馮誠等據城固守時沐英方駐師烏撒聞之將驍騎還救諸部悉定

二十六年命西平侯沐英子春襲封仍鎮雲南 自英平雲南在鎮十年恩威著於蠻徼子孫亦皆能以功名

世其家每大征伐輒以征南將軍印授之沐氏未嘗不在行間數傳而西平裔孫當襲侯守臣爭之謂滇知有黔國公不知西平侯也孝宗以爲然許之自是遂以公爲佩印爲故事諸土司之進止予奪皆咨稟及承平久文網周密凡事必與太監撫按三司會議後行動多掣肘土官子孫承襲有積至二三十年不得職者土官復慢令玩法無所忌憚待其罪大惡極然後興兵征剿致軍民日困地方日壞大學士楊一清等因武定安銓之亂痛切陳之黔國公沐紹勳亦以爲言雖得旨允行亦不能更革馴至神宗之世朝廷憐媿封疆敗壞日甚一日緬莽之叛皆土官之失職者導之雖稍奏膚功而滇南喪敗卒由上官沙定洲之禍 謹按明史土司傳及

雲南通志沙定洲之父源驍勇有將材萬曆中數從征調有功加至宣撫使時號沙兵定洲其仲子也崇禎三年元謀士知州吾必奎叛黔國公沐天波調定洲從征定洲不欲行出怨言會姦徒饒希之全錫朋者遁天波金無以償錫朋常出入土司家誇黔府富盛定洲心動陰結都司阮韻嘉諸人爲內應既定洲入辭行天波以家諱日不視事定洲謀而入焚劫其府天波聞變由小寶遁其母妻皆走城北自焚而死定洲據黔府盤踞會城劫巡撫吳兆元使題請代天波鎮滇傳檄州縣全滇震動天波走楚雄從金滄副使楊長知言走永昌定洲

至楚雄城閉不得入乃遣黨王翔李日芳等攻陷大理蒙化畏知乘間檄城外居民盡入城築障濬隄調土漢兵守之定洲不敢至永昌恐畏知截其歸路急遣兵攻楚雄畏知輒出奇兵殺賊甚衆賊引去攻石屏不下還攻甯州賊計進東稍稍定乃復攻楚雄分兵爲七十二營環城掘濠爲久困計會張獻忠部將孫可望率餘衆由遵義入黔稱黔國焦夫人弟來復仇民久困沙兵喜其來迎定洲臨楚雄圍迎戰於草泥關大敗遁阿迷可望分遣李定國徇迤東諸府定洲歸屯兵洱草龍且借南安援自固會可望與定國不協聲其罪杖之百責以取定洲自贖定國既至定洲土目楊嘉方迎定洲就其營宴定國偵知之率兵圍營遂械定洲及妻萬氏數百人回雲南剝其皮市中可望遂據滇而天波卒走死於緬甸

大理

宋甯宗慶元六年南詔段智連立 南詔卽大理唐葉榆縣境也自明皇時南詔蠻蒙氏閣羅鳳叛國於此號

大蒙國後改爲大禮國昭宗時其臣鄭買賜篡位改爲大長和後唐明宗時其臣趙善政篡立改爲大天興尋

又爲其臣楊子真篡立改爲大義甯至晉高祖時段思平得之更號大理國思平死子思英立未幾死其叔思

良立死傳子素順宋太祖建隆四年立時王全斌欲乘平蜀後取之具圖以進帝以玉斧畫大渡河曰此外非

吾有也由是二百年不通中國皇祐中以儂智高走死大理函首至京始通中國神宗熙甯八年其臣楊義纂

位四年段氏臣高智昇遣子昇太起兵討滅之而立段壽輝立二年傳子正明元豐五年立後避位爲僧國人

皆歸心高氏遂奉昇太爲王哲宗元符二年立改國號曰大中臨終屬其子太明日段氏不振國人推我不得已從之今其子已長可還其故物爾後人勿效尤也太明遵遺言求段氏子正潛立之而段氏復興號曰後理國高氏世相之人稱爲高國王

元憲宗二年命呼必賚征大理次年九月次忒刺地分兵三道以進冬十二月高太祥拒戰大敗太祥被擒不屈斬於五華樓下時白日當午忽雲起雷震世祖異之曰忠臣也遂有其地設大理都元帥府

臨安 古句町國漢置縣唐爲羈縻州地天寶末南詔蒙氏於此置通海郡元憲宗時內附置阿楚部萬戶府世祖改臨安路屬臨安廣西元江等處宣慰司明改府 明史傳曰長官司有九曰納樓茶甸曰教化三部曰溪處甸曰左能寨曰王弄山曰虧容甸曰思陀甸曰落恐甸曰安南其地皆在郡東南西平侯征安南取道於此蓮花灘之外卽交荒外而臨安無南面之虞者以諸甸爲之備也但地多瘴流官不欲入諸長官亦不請代襲自相冠帶日尋干戈納樓部內有曠場三曰中場鵝黃摩訶封閉已久亡命多竊取之其安南長官司本阿楚蠻所居舊名襲古後名捨資元爲捨資千戶所以地近交趾安南屬臨安路正德八年蒙自土酋祿祥爭襲父職鳩殺其嫡兄祿仁安南長官司土舍那代助之以兵遂稱亂守臣討平之事聞命革蒙自土官改長官司爲新安守禦千戶所調臨安衛中所官軍戍之

楚雄 晉咸康後爲雜蠻耕牧之地蠻蠻築城名威楚宋時段氏改威楚郡元憲宗至元六年內附置萬

戶府八年改威楚路後置威楚開南路宣撫司 明改置楚雄府 時南雄侯趙庸取其地改爲府永樂元年
楚雄府言所屬蠻民不知禮義惟賦種賦性溫良有讀書識字者府州已嘗設學教養其縣學未設縣所轄六
里蠻人過半請立學置官訓誨從之

澂江 唐爲南蠻昆二州天寶末沒於蠻號羅伽甸宋時大理段氏號羅伽部元憲宗四年內附六年置
羅伽萬戶府十六年改澂江路 明改府地居滇省之中山川明秀羸衣耕食民安於業近郡之獯獵性雖頑
狠然恭敬官長至則爭迎到家割羊擊豕饗所有以供之婦女皆出羅拜故於諸府獨號安靜

景東

明太祖洪武十五年置府以土官俄陶知府事 明史傳曰景東古柘南也漢尙未有其地唐南詔蒙氏始置
銀生府後爲金齒白蠻所據元中統三年討平之以所部隸威楚萬戶至元中置開南州太祖平雲南景東土
官俄陶先歸附故卽以爲知府

宣宗時景東奏所轄孟緬孟梳地方遐遠屢被外寇侵擾乞并孟梳於孟緬授把事姜嵩爲長官隸景東

熹宗天啟六年景東土官陶明卿以象陣敗貴州水西叛蠻 明史傳曰景東部皆麴種性淳樸習弩射以象
戰歷討鐵索米魯那鑑安銓鳳繼祖諸役皆調其兵及戰象每調兵二千必自效千餘餉士之費未嘗仰給公
家土司中最稱恭順其府治東有邦泰山頗險峻土官陶姓所世居也

廣南 宋時名特磨道土酋儂智高之裔居之元立宣撫司領路城等五州後惟領安甯富二州
明太祖洪武十七年置廣南府 時廣南西道歸附改爲府以土官儂郎金爲同知 明史土司傳曰儂氏自
文學藉四門會目推擁之力得授職後儂氏襲替必因之土官之政出於四門租稅僅取什之一

廣西 隋屬牂州後爲東甌烏蠻等部所居唐隸黔州後師宗彌勒二部凌盛蒙段皆莫能制元世祖時
置路

明太祖洪武十四年廣西歸附以土官普德署府事

鎮沅

明成祖永樂三年升州爲府 先是洪武十五年元元江路總管刀平與兄那直歸附授千夫長時置鎮沅州
以平爲知州至是以從征八百及從攻石崖者達寨外部有功故有是命 明史土司傳曰鎮沅古濮洛雜蠻
所居元史謂是和泥昔樸二蠻也唐南詔蒙氏銀生府地其後金齒獠蠻據之元時爲威遠蠻柵府屬元江路
總管

永甯

明成祖永樂四年升州爲府 先是永甯州隸北勝府洪武平雲南時屬鶴慶府二十九年改屬瀾滄衛

順甯 大侯等附

本蒲蠻地名慶甸不以前不通中國雖蒙氏段氏不能制元奉定開始內附文宗天曆元年

置順甯土府 明史傳曰順甯與大侯接境宣德中大侯土舍奉赦奉學兄弟不相能奉學倚妻父土知府猛廷瑞與兄赦日攜兵巡撫陳用賓檄參將李先著副史邵以仁勘處以仁執執廷瑞因請改順甯爲流官先著被檄極言不可討被謗語逮下獄瘐死然廷瑞實無反謀以參將吳顯忠覘其富誣以助惡索金不應遂隲於巡按張應揚轉告用賓廷瑞大恐不得已斬奉學以獻顯忠益誣其險事傳以反狀撫按會奏得旨大剿廷瑞出獻印獻子以候命不從顯忠帥兵入其寨盡取猛氏十八代善賞數百萬誘廷瑞至會城執之獻捷於朝於是所部十三寨盡憤始聚兵反官兵悉剿除之并殺其子以仁超擢右都御史廢子未幾坐大辟繫獄應揚亦病卒人以爲天道云 又曰順甯附境有猛猛撒猛緬所爲三緬也猛猛最强部萬人時與二猛爲難其地田少譬多射獵爲業猛緬地雖廣而人柔弱部長最忠順猛撒微弱後折入於耿馬

蒙化 唐屬姚州蒙氏時細奴邏築城居之號蒙舍詔段氏改開南縣元憲宗七年置蒙會千戶隸大理世祖改爲蒙化路二十年降爲州 明史土司傳曰蒙化所部江內諸蠻性柔頗馴擾江外數枝以勇悍稱每應征調多野戰無行伍

孟良

明成祖永樂三年設府 蠻名孟措自古不通中國至是來歸乃設府以土酋刀哀爲知府至正統間孟良地多爲木邦所并景泰中入貢知府名慶馬辣不知於刀氏何屬也 明史土司傳曰孟良在姚關東南二千里

外沃野千里最殷富地多虎農者於樹杪結草樓以護稼雲南知府趙混一嘗入其境待之禮慢後無復至者
孟定 蠻名景麻元世祖至元中立孟定路置民總管府領二甸隸大理金齒等處宣德司 明設孟定

府 明史土司傳曰其地自姚關南八日程西接隴川東達孟璉木邦北鎮康土瘠人稀有馬援城在焉

曲靖 隋恭協二州地唐置南甯州改恭州爲曲州分協州置靖州元世祖至元初置磨彌都後改爲曲

靖路

明太祖洪武二十年越州土酋阿資叛命沐英等討之阿資窮感請降

二十四年徙越州衛於陸涼州 初阿資之道也揚言曰國家有萬軍之勇我地有萬山之險豈能盡滅我輩

至是以英言徙越州衛於陸涼以後西南晏然

熹宗天啟初年移平夷右所於交水 撫臣議曲靖鎖鑰全滇交水當黔滇之衝乃扼塞要地平夷右所宜移

交水去險築城俾與平夷衛相望互爲聲援使報可

姚安 本漢弄棟青蛉二縣地唐置姚州都督府以民多姚姓也天寶間南詔蒙氏改弄棟府宋時段氏改姚州

元憲宗三年姚州內附七年置統矢大姚堡三千戶所至元十二年罷統矢千戶置姚州罷大姚千戶置大姚

縣天曆時升爲路 明政府 明史土司傳曰所屬大姚縣有鐵索警者本裸種依山險以剽掠爲業旁郡皆

受其害弘治間稍有歸命者分隸於姚安姚州嘉靖中乃專屬姚安其渠羅思者有幻術造僞印稱亂萬曆元

年巡撫鄒應龍與總兵官沐昌祚討平之諸郡乃安

○鶴慶 唐時名鶴川南詔置謀統郡元憲宗三年置鶴州七年立千戶三乃稱謀統又置義督千戶至元十一年罷謀統爲鶴州改義督爲劍川縣二十三年升爲路

明太祖洪武十七年以土酋董賜等爲鶴慶知府等官

英宗正統八年鶴慶改設流官 先是二年鶴慶土知府高倫與弟純屢逞凶惡屠戮士庶與母楊氏並叔宣互相賊害黔國公沐晟等奏當倫等皆伏誅高氏族人無可繼者帝命於流官中擇人以綏遠蠻乃權瀘州知府林道節爲知府鶴慶之改流官自此始

武定

元世祖至元十一年改羅婺都爲武定路 南詔三十七部之一

明太祖洪武十四年武定女土官商勝首先歸附 明年改路爲府以勝署府事

十五年命土知府瞿氏掌武定府印 初府印自洪武以來俱掌於土官正德間有司議以畀流官同知土知

府職專巡捕徵糧而已及鳳詔死瞿氏以母襲子官所屬四十七馬頭阿台等數請以印屬瞿氏吏部覆係舊例從之四十二年瞿氏老舉鳳詔妻索林自代比索林襲遂失事姑禮瞿氏大恚乃收異姓兒繼祖入鳳氏宗於是婦姑嫌隙益甚 四十五年繼祖及其黨皆伏誅

神宗萬曆三十五年武定置流官 先是繼祖餘黨伏誅守臣議改設流官猶不欲絕鳳氏授索林支屬鳳歷子思堯經歷給莊百餘鳳歷以不得知府怨望陰結四川七州及水西宣慰安國亨謀作亂流官知府劉宗寅遣諭之不聽遂聚眾稱思堯知府夜襲府城城中嚴備不能入退屯魯墟宗寅夜出兵砍其營賊潰追至馬刺山擒鳳歷伏誅至是繼祖姪阿克久徙金沙江外賊黨擧等誘阿克作亂陰結江外會川諸蠻直陷武定大肆劫掠連破元謀羅次諸城索府印鎮撫以兵未集懼差人以府印授之賊入武定立阿克爲知府鎮撫調集土兵分五路進剿克復武定元謀羅次祿豐嵩明等州縣擒阿克及其黨至京師磔於市武定平遂悉置流官

尋甸 古滇國地獫狁蠻居之號仲剗溢源部後爲烏蠻裔斯丁所奪號斯丁部蒙氏爲尋甸至段氏改仁德部元初置仁德萬戶後改府明太祖改軍民府十七年以尋甸土官沙琛爲知府二十三年置木密關守禦千戶所於尋甸之甸頭易龍驛交置屯田所於甸頭里果馬里聯絡耕種以爲邊備

憲宗成化十四年土知府安晟死兄弟爭襲遂改置流官

麗江 南詔蒙氏置麗水節度宋時麼些蠻釁據之段氏不能制元憲宗四年討平之立茶罕章宣慰司至元八年改麗江路

明太祖洪武十五年置麗江府萬曆三十一年巡按宋興祖奏稅使內監楊榮欲責麗江土官退地聽探竊以麗江自太祖令木氏世官守石門以絕西域守鐵橋以斷吐蕃滇南藉爲屏藩今使退地聽探必失遠蠻之心

卽令譴諭已使國家歲歲有吐蕃之防備或不聽豈獨有傷國體疏上事得寢 明史傳曰雲南諸土官知詩書禮守義以麗江水氏爲首

元江 古西南夷極邊境曰惠館甸又名因遠部南詔蒙氏以屬銀生節度徙白蠻蘇張周段等十姓戍之又開威遠等處置威遠後和泥使據其地宋時儂智高之黨竄居於此和泥又開羅槃甸居之後爲麼些徙蠻阿剌諸部所據元憲宗時內附復叛至元二十五年討平之於威遠更置元江路 明改府

永昌 古哀牢國漢武帝時置不韋縣東漢置瀾滄郡尋改永郡唐屬姚州後爲南詔蒙氏所據歷段氏高氏皆爲永昌府至是置爲州尋改府隸大理路置金齒等處宣撫司治

明太祖洪武十六年永昌州土官申保來朝尋以爲府同知
宣宗宣德五年置騰衝土知州 時騰衝土官張銘言其地遠在極邊麓川宣慰思任發不時侵擾乞設州治從之部以銘爲知州

新化 本馬龍他耶二甸阿剌諸部蠻據之元憲宗時內附隸甯州至元間以馬龍等甸并於他耶甸隸元江路

明太祖洪武十七年以新化州土酋普賜爲馬龍他耶甸副長官 明史土司傳曰其地有馬龍諸山居摩沙勒江右兩岸東隘如峽地勢極險

威遠 唐南詔銀生府地舊爲濮落雜蠻所居大理時爲百夷所據元世祖至元中置爲州

明太祖洪武三十五年命土官刀算黨爲威遠知州 明史土司傳曰其俗勇健男女走險如飛境內有河汲水簾炭上卽成鹽無秤斗以箕計多寡量之

北勝 唐貞元中南詔異牟尋始開其地名北方賧徙瀾河白蠻及羅落麼些諸蠻以實其地號成偈賧又改名善巨郡宋時大理段氏改爲成紀鎮元初內附至元中置施州尋改北勝州後爲府隸麗江路 明改爲州 時隸鶴慶府後屬瀾滄衛至正統七年北勝州設流官吏目以州蠻苦於瀾滄衛官軍侵漁也萬曆四十八年北勝州土同知高世懋死異母弟世昌襲其族姪闕妄稱世昌姦生訟之官不聽世昌懼逼走麗江避之爾自稱欽授把總大掠麗江知府木壇請討之謂法紀弁髦尾大不掉不治將有隱憂上官嘉其義調增率其部進剿獲爾梟之

灣甸 蠻名細賧地多瘴有黑泉漲時飛鳥過之輒墮元世祖中統初內附屬鎮康路

明太祖洪武十七年置縣 永樂元年以西平侯沐晟奏其地近麓川地廣人稠設長官司尋改爲州以土官刀景發爲知州

瀾滄 元爲北勝州地

明太祖洪武二十八年置衛明年於州南築城領北勝瀾渠永甯三州福建布政李紹以前任雲南參議知土

俗事宜疏言瀾滄衛與北勝州同一城地域廣遠與四川建昌西番野番相通又姚安府大羅衛賓川州地方有賊穴六七軍民受害請添設兵備副使於瀾滄衛城以姚安大羅賓川鶴麗大理洱海景東諸府州衛所皆令屬之於野番則用撫流民法於賊巢則用立保甲法朝夕經理則內外寇患皆可弭矣因從其議

麓川

麓川與平緬連境元時皆屬緬甸古朱波地也宋甯宗時緬甸波斯等國進白象緬甸之名自此始在雲南之西南與八百國占城相接元分置兩路以統其所部

明太祖洪武十五年大兵下雲南進取大理下金齒平緬與金齒壤地相接土蠻思倫發聞之懼遂降因置平緬宣慰使司即以思倫發爲之至是以其遣使來貢又改爲麓川平緬宣慰使司命兼統之

三十年倫發部長刀幹孟叛官軍禽之

初緬俗不好佛有僧至自雲南善爲因果報應之說倫發信之又有金齒戍卒逃入其境能爲火銃火礮之具倫發喜其技能傳金齒與僧

位該部長上刀幹孟等不服遂與其屬叛

成祖永樂十一年思行發請以其弟思任發代職從之思任發連年累侵右都督方政至軍欲出戰法晟不

可政不勝憤乃獨率麾下與賊將緬簡戰破賊酋大寨賊奔景罕指撫唐清復擊破之又追至高黎共山乘勝深入逼任發上江上江賊重地也政進攻疲甚求援於晟晟不救賊出象陣衝擊軍殲政死焉晟聞敗懼罪暴

卒

英宗正統六年七年十三年兵部尙書靖遠伯王驥凡三征麓川十四年大軍踰孟養至孟那孟養在金沙江

西去麓川千餘里諸部皆震聳曰自古漢人無渡金沙江者今王師至此真天威也驥還兵其部衆復擁任發少子思祿據孟養地爲亂驥等慮師老度賊不可滅乃與思祿約許土目得部勒諸蠻居孟養如故立石金沙

江爲界誓曰石爛江枯爾乃得渡思祿亦懼聽命乃班師捷聞帝爲告廟

原二百四十二

緬甸 爲西南夷不知何種其地有接大理及去成都不得者又不知其爲方幾重其人有城郭屋廬以居有象馬以乘舟筏以濟其文字進上者用金葉寫之次用紙又用檳榔葉蓋騰譯而後通也宋甯宗時與波斯國等進白象爲通中國之始

元世祖至元二十年詔宗王桑格達喇右丞台布參知政事伊克德濟將兵征之

入嶺有三道一由天步馬一由驪甸一由阿郭地界俱會

頭城 斷緬水路桑格達喇自將一軍從驪甸徑抵其國與台布軍會諸將分地攻取破其江頭城別令將以兵守其地積糧餉以給軍士遣使持輿地圖奏上至二十四年緬始平

千崖 在柔遠路正西東隔麓川其地曰千賴朕曰渠瀾朕曰夷蠻居之元中統初內附至元十三年立爲路隸宣撫司

明成祖永樂元年設千崖長官司 東北接南甸西接隴川有平川衆岡境內甚熱四時皆蠶以其絲織五色土錦充貢至正統九年升宣撫司

潞江 在大理之西永昌之南其地曰潞江曰普坪臉曰申臉剌寨曰烏摩坪剌蠻卽通典所謂黑獺也

元中統初魏魯阿八思入朝至元十三年與茫施鎮康鎮西平緬麓川俱立爲路立宣撫司

明成祖永樂元年設潞江長官司 地在永昌騰越之間南負高崙山北臨潞江爲官道咽喉多瘴癘蠻名怒江甸至是內附其地舊屬麓川平緬西平侯奏其地廣人稠遂設長官司治之

南甸 舊名南宋在騰越南半箇山下其山嶺北多霜雪南則炎瘴如蒸元至元二十六年置路領三甸

明太祖洪武十五年改南甸爲府 永樂十一年改爲州 正統九年升宣撫司

芒市

者樂甸茶山孟魏里麻紐兀東儒瓦甸促瓦散金附

在柔遠路之南瀘江之西其地曰怒謀曰大枯賤曰小枯賤卽唐史所謂茫施蠻也

元中統初內附至元立芒市路隸宣撫司

明太祖洪武十五年置茫施府

木邦

老獨附

元世祖至元二十六年立木邦路軍民總管府領三甸 明一統志木邦舊名孟都一名孟邦其風俗男貴女

賤云

明太祖洪武十五年平雲南改木邦路爲府

憲宗成化十年木邦所轄孟密蠻婦曩罕弄等侵掠隴川 曩罕弄者故木邦宣慰罕揆法之女嫁其孟密部長思外法地有寶井揆法卒孫罕落法嗣曩罕弄以尊屬不樂受節制曩族人與爭景泰中叛木邦遂宣慰據

公署殺掠隣境隴川孟養兵力日盛自稱天娘子其子思柄自稱宣慰黔國公琮奏委三司官往撫不服詔廷臣集議皆以孟密與木邦仇殺並未侵犯邊境止宣撫諭因命副都御史程宗馳傳往勝成化十年也諭年孟密奏爲木邦所擾乞別設安撫司兵部尙書張鵬以太監覃平御史程宗撫取已有成緒遂命宗巡撫雲南敕平借請金齒勸諭之

二十年命設孟密安撫司 明史傳曰弘治二年雲南守臣奏孟密曩罕弄先後占奪木邦地二十七處又誘其頭目故卓孟等叛其勢必盡吞後已乞敕八百宣慰司俾與木邦和好互相救援亦敕木邦宣慰收復人心親愛骨肉勿使孟密得乘間誘叛自致孤弱如孟密聽諭方許曩罕弄孫承襲報可并敕雲南守臣親詣金齒曉諭復降敕詣賈前鎮巡官所以受賂召侮敢聾者

孝宗弘治六年仍以孟密安撫隸布政司 時雲南守臣奏孟密侵奪木邦兵連禍結垂四十餘年屢撫屢叛勢愈猖肆請調兵往討兵部議以孟密安撫初隸布政司今改隸木邦以致爭殺仍如初隸可息兵從之 明史傳曰初孟密竄井朝廷每以中官出鎮司采辦武宗朝錢能最橫至嘉靖隆慶時猶然萬曆二十年巡撫陳川賓言緬甸擁衆直犯蠻莫其執詞以奉開采使命令殺蠻莫思正以開道路全滇之禍皆自開采啟之時稅使楊榮縱其下以開采爲名恣暴橫蠻人苦之且欲令麗江退地聽采緬甸因得執詞深入巡按宋興祖極言其害請追還蠻等帝皆不納凡采辦必先輸官然後與商貿易每往五六百人其屬有地羊寨在孟密東往

來道所必經人工幻術采辦人有強索其飲食者多腹痛死所乘馬亦斃割之則馬腹皆木石也思真嘗刺之殺數千人不得絕至是議剽以兵少中止老撾俗呼爲撾家古不通中國其俗與木邦同部長不知姓有三等一曰招木弄一曰招木牛一曰招木化而爲宣慰者招木弄也代存一子絕不嗣其地東至木尾南至交趾西至八百北至車里西北六十八程至雲南布政司成祖卽位土官刀線歹貢方物始置老撾軍民宣慰使司永樂二年以刀線歹爲宣慰使至成化十七年安南黎灝率兵九萬開山爲三道進兵破哀牢入老撾境殺宣慰刀板雅及其子二人其季子怕雅賽走八百宣慰刀攬邦遣兵送至景坎黔國公沐琮以聞命怕雅賽舅父職及怕雅賽欲報安南之仇覬中國發兵爲助帝以老撾交趾皆服屬中國久恤災解難中國體也令琮慎遣人諭之嘉靖二十四年雲南巡撫汪文盛言老撾土舍怕雅開征討安南首先思番且地廣兵多可獨當一面八百車里與老撾相近孟良在老撾上流皆多兵象請備征討可免其察勘就令承襲以備征調從之四十四年時緬勢方張翦除諸部老撾亦折而入緬符印俱失萬曆二十六年緬敗老撾來歸復鑄印給之

孟養

元成宗元貞二年置雲達路軍民總管府

明太祖洪武十五年改路爲府 成祖永樂二年升軍民宣慰司

景帝景泰二年思機發之子思卜發據孟養舊地 時思卜發遣使求管孟養舊地廷臣議已與緬甸豈可移

易時朝命雖不許然思卜發已潛據之卽緬甸不能奪也思卜發死子思洪發嗣每朝貢輒誓孟養地名儼然自有其地成化中太監錢能鎮雲南思任發之遺孽思陸發數以珍寶遺能因得入貢稱孟養金沙江思陸發常規立功以襲祖職適孟密安撫土舍思撲侵據木邦地爭殺累年守臣議征之思陸發乃請自效鎮巡官許之思陸發兵未至思撲解去巡撫張浩遣使促發兵思陸發遣大陶孟倫索領蠻兵象馬過江時思撲令陶孟思英以兵守蠻莫孟養兵至思英堅守不出已而請和孟養兵聞官軍聽思英約降頗有怨言官軍糧絕遽引退倫索亦恐思英絕其歸路取道千崖而還初靖遠伯王驥與之約誓非總兵官符檄不得渡江自是遂犯約數興兵過江與孟密戰

孝宗弘治七年孟養思陸作亂 思陸本麓川叛種竄居金沙江外成化中嘗據緬甸之聽蓋至是征調其兵渡江遂據騰衝之蠻莫又糾木邦兵攻燒孟密安撫司殺掠蠻民二千餘人劫象馬金寶有并吞孟密覬覦故土之志迺西人恭們騰衝人段和爲之謀主屢撫不聽十二年雲南巡按謝朝宣奏請馳歸江外而先是鎮守太監吉慶已爲思陸請朝貢乃因朝宣疏并下鎮巡官議剿撫之宜數年不決巡撫陳金遣金騰參將盧和撫諭思陸和至騰衝諭以禍福令掣兵過江歸所占蠻莫等地且調隴川千崖南甸三宣撫司蠻兵及戰象隨官軍分道至金沙江思陸乃遣大陶孟倫索怕卓等率所部來見和等再申諭之思陸聽命退還前所據蠻莫等地十三處撤回象馬蠻兵渡金沙江而歸鎮巡官奏言蠻莫等地原隸木邦成化間始爲孟密所有近又爲思

陸所據連年搆禍今始平定既不可復與木邦孟密又不可割界隴川千崖南甸三宣撫宜暫於騰衝戡撥官軍四百分番守之思陸前有助平思撲功今悔禍納款請賜以名目冠帶仍降敕獎諭部議以蠻莫等處本木邦分地在大義宜歸之木邦其名目冠帶實使已言思陸不願受不宜輕畀請賜敕厚勞遣歸之報可時思陸覲得宣慰司印部報不予於是仍數出兵與木邦孟密仇殺無甯歲

車里 卽古產里爲倭沙貂獠諸蠻雜居之地古不通中國

元成宗元貞二年立徹里軍民總管府雲南行省言大徹里地與八百媳婦犬牙相錯

明太祖洪武十五年改置車里軍民府 時蠻長刀坎來降卽以爲知府

嘉靖十一年車里折入緬 時緬酋莽應裏據擺古靈食諸蠻車里宣慰刀糯猛折而入緬有大小車里之稱以大車里應緬小車里應中國天啟七年巡撫閔洪學奏緬人侵孟良孟良就車里求救宣慰刀糯猛遣兵象萬餘赴之緬人恨車里興兵報復韃猛父子不能支遁至思毛地緬追執之以去中朝不及問車里遂亡

八百

元世祖至元成宗大德仁宗皇慶敕軍從雲南王討八百媳婦蠻

順帝至正六年復立八百宣慰司以土官韓部襲其父爵

明太祖洪武二十一年設八百宣慰司 明史土司傳曰世傳部長有妻八百各領一寨因名八百媳婦其地

乘至車里南至波勒西至大吉喇與緬鄰北至孟良白姚關東南行五十程始至平川數千里有南格刺山下有河南屬八百北屬車里好佛惡殺寺塔以萬計有見侵乃舉兵得仇卽已俗名慈悲國嘉靖間爲緬所并其酋避居景練名小八百緬酋應裏以弟應龍居景邁城倚爲右臂初四譯館通事惟譯外國而緬甸八百如之蓋二司於六慰中加重焉

原二百四十三

貴州土司

古羅施鬼國漢西南夷牂牁武陵諸傍郡地元置八番順元諸軍民宣慰使司以攝縻之

明太祖初克陳友諒兵威遠振思南宣慰思州宣撫率先歸附卽令以故官世守之洪武五年宣慰獨舉與宋蒙古友及普定府女總管適爾等來歸皆予原官世襲帝方北伐中原未遑經理南荒又田仁智等歲修職貢最恭順永樂十二年思南州相仇殺始以兵執送京師分其地爲八府四州設貴州布政使司而以長官司七十五分隸焉屬戶部置貴州都指揮使領十八衛而以長官司七隸焉屬兵部府以下參用土官其土官之朝貢符信屬禮部承襲屬吏部領土兵者屬兵部其後府并爲大州并爲四長官司或分或合釐革不一 明史傳曰其地西接滇東連荆粵崇山深箐鳥道靈叢諸蠻種類嗜淫好殺叛服不常田仁智入朝太祖諭之曰天下守土之臣皆朝廷命吏人民皆朝廷赤子汝歸善撫之使各安其生則汝可長享富貴夫禮莫大於敬上禮莫盛於愛下能敬能愛人臣之道也二十九年清水江之亂旣平守臣以賊首匿宣慰家宜并拜帝曰蠻人爲蠻鼠伏自其常態勿復問明初御蠻之類其後世之龜鑑也夫

貴陽 舊爲程番長官司

明洪武置貴州宣慰司隸四川永樂十一年改隸貴州成化十二年置程番府至是移爲貴陽府與宣慰司同城府轄城北司轄城南萬曆時改爲貴陽軍民府領安撫司一曰金筑領長官司十八 明史傳曰自蜀漢時灑火從諸葛亮南征有功封羅甸國王後五十六代爲宋普貴傳至元阿蓋世有土於水西宣慰司繼其裔也後爲安氏洪武初同宣慰宋蒙古歹來歸賜名欽俱令領原職世襲及設布政使司而宣慰司如故安氏領水西宋氏領水東八番降者皆令世其職

神宗萬曆二十六年水西宣慰安國亨子疆臣助討楊應龍增其秩 國亨既革任日遣人至京師納賂爲起復地旋乞如播州宣慰楊應龍獻大木例給冠帶誥封至是疆臣謁職會應龍反疆臣亦以戕殺安定事爲有司所案科臣有言其逆節漸萌者詔不問許殺賊圖功巡撫郭子章許疆臣以應龍平後還播所使水西烏江地六百里以酬功於是疆臣兵從沙溪入有蜚語水西佐賊者總督李化龍檄詰之疆臣遂執賊二十餘人率所部奪落濠關至大水田焚桃溪莊應龍伏誅遂增官進秩 明史傳曰初應龍之祖以內難走水西客死宣慰萬銓挾之索水煙天旺地聽還葬其地遂爲水西所據及播州平分其地爲遵義平越二府分隸獨黔以渭河中心爲界總督王象乾代李化龍命疆臣歸所侵播州地子章奏言侵地始於萬銓而非疆臣安氏迫取於楊相喪亂之時非擅取於應龍蕩平之日且臣曾許其裂土今反奪故地臣無面目以謝疆臣願罷去象乾言

疆臣征播獵應龍子惟棟不實首功可知至佯敗棄陣送藥往來欺君助逆迹已昭然合還侵地不咎既往已屬國家寬大若因其挾而予之彼不爲恩我且示弱疆臣既無功不與之地正所以全疆臣之信宜留撫臣羅臣以爲重臣無能與蕞爾苗噲膏者之感於是清疆之議累年不決然議者多右疆臣尙書蕭大亨遂主巡按李時華疏謂征播之役水西不惟假道且又助兵矧失之土司得之土司播固輸糧水亦納賦不宜以土地之故傷宇小之仁地宜歸疆臣於是疆臣增官進秩其母得賜祭水西尾大之患於是不可割矣

愍帝崇禎元年詔起朱鑾元總督貴雲川廣分兵剿賊貴陽平 奢崇明自號大梁王安邦彥自號四裔大長老其部衆悉號元帥悉力趨永甯先犯赤水鑾元授意守將佯北誘深入度賊已抵永甯分遣別將林兆鼎從三岔入王國楨從陸廣入劉養繼從遵義入邦彥分兵四應力不支羅乾象復以奇兵繞其背急擊之賊大驚潰崇明邦彥皆授首邦彥亂七年而誅鑾元乃移檄安位赦其罪許歸附位暨子不能決其下謀合潰兵來拒鑾元扼其要害四面迭攻斬首萬餘級復得嚮導輒發密粟就食賊益饑復遣人至大方燒其室廬位大恐遂率四十八日出降而前助邦彥故宣慰宋萬化之子嗣殷亦至是始剿滅乃以宋氏洪邊十二馬頭地置開州建城設官鑾元復遣兵平擺金五洞諸叛苗水西勢益孤十年安位死無嗣族屬爭立朝議欲乘其敝郡縣之鑾元奏未可驟乃傳檄土目諭以威德諸苗爭納土獻印貴陽甫定而明亦旋亡矣

明太祖洪武二年命思南土官田仁智率其部入朝 九年仁智入覲時思州宣撫田弘正亦與其弟弘道等來朝帝命禮部皆優賜

成祖永樂十一年命思南三十九長官地更設州縣 設貴州布政使司總轄之命顧成剿蠻羅諸寨成斬苗賊普亮思州乃平十二年遂分其地爲八府四州貴州爲內地自是始兩宣慰廢田氏遂亡 明史傳曰思南卽唐思州宋宣和中番部田祐恭內附世有其地元改宣慰司明洪武初析爲二宣慰屬湖廣永樂十一年置思南府屬貴州

鎮遠 故爲豎眼大田溪洞元初置鎮遠沿邊溪洞招討使後改爲鎮遠府洪武五年改爲州隸湖廣永樂十一年仍改府屬貴州領長官司二曰偏橋曰印水十五洞領縣二曰鎮遠曰施秉

孝宗弘治十年改鎮遠金容金遠長官司爲鎮遠州設流官

銅仁 元爲仁人大小江等處軍民長官司明洪武初改爲銅仁長官司永樂十一年置爲府萬曆二十六年始改爲縣治領長官司五曰省溪曰提溪曰大萬山曰烏羅曰平頭營可

黎平 元潭溪地初洪武三年辰州衛指揮劉宣武率兵招降湖耳潭溪新化萬平江歐陽諸洞納元所授印敕帝命皆仍其原官以轄洞民隸辰州衛既改龍里長官司爲龍里衛又增立五開衛以鎮之隸思州

安順 普里部蠻所居元世祖置普定府成宗時改普安路又爲普安路並屬雲南明洪武初爲普定府

十六年改爲安順州隸於四川正統三年改屬貴州萬曆中改安順軍民府以普安等州屬焉

都勻 元曰都雲明洪武十九年置安撫司二十九年改軍民指揮使司屬四川永樂十一年隸貴州弘

治七年置府領州二曰麻哈曰獨山卽合江洲陳蒙爛土長官司地領縣一曰清平卽清平長官司地領長官司八屬府書曰都勻曰平浪曰邦水曰平州六洞屬獨山者曰九名九姓曰豐甯屬麻哈者曰樂平曰平定

平越 古黎峨里元爲平月長官司初洪武八年貴州江力江松刺回四十餘寨苗把具播共桶等連結

苗獠二千作亂命指揮同知胡汝討之九年黃平蠻獠都麻腰亂命重慶諸衛合擊大破之平其地十四年始置衛十九年平越衛麻命苗楊孟等作亂命傅友德平之二十二年察隴牛場乾溪苗亂傅友德平之二十三年命延安侯唐勝宗往黃平平越鎮遠貴州諸處訓練軍士提督屯田相機剿寇 明史傳曰初黔楚之交羣苗嘯聚連寨相望而香鑪山周迴四十里高數百尋四面陡絕其上平衍向爲叛苗巢穴阿傍等據之糾諸寨苗作亂巡撫鄒文盛等分漢土兵爲五克其前柵密遣人援崖先登殺賊守路者衆蟻附而上焚賊巢禽阿傍餘賊猶堅守不下參將洛忠等詭言招撫自山後擊之殲焉遂移師龍頭木蘭等寨悉破之賊遂平

石阡 本思州地明永樂十一年置爲府隸貴州領長官司四曰石阡曰苗民曰萬彰萬商曰龍泉坪宣

德六年萬彰萬商長官安民奏前以官鈔糴糧儲備令蠻民守視溪洞險僻無所支用恐歲久腐爛賠納寶難請以充有司祭祀過使糜結之用從之

新添 故麥新地宋時克之乃改爲新添元置新添萬蠻安撫司洪武四年置長官司二十三年改爲衛
二十九年置軍民指揮司領長官司五曰新添曰小平伐曰把平寨曰丹平曰丹行

金筑 明洪武四年以故元安撫密定來朝詔置長官司隸四川行省十四年以獻馬助征討敕嘉其誠

升爲安撫司二十九年隸貴州軍民指揮使司萬曆四十年安撫金大章乞改土爲流隸州於貴陽府遂改金

筑爲廣順州

原二百四十四

廣西土司

明太祖洪武二年廣西諸蠻平 中書省言廣西諸峒雖平宜遷其人入內地可無邊患帝曰溪洞蠻獠雜處
其人不知禮義順之則服逆之則變不可輕動惟以兵分守要害以鎮服之俾日漸教化數年後可爲良民何
必遷耶 明史土司傳曰廣西徭獠居多盤萬嶺之中當三江之險六十三山倚爲巢穴三十六源踞其腹心
其散布於桂林柳州慶遠平樂諸郡者所在蔓衍而田州泗城之屬尤稱強悍種類滋繁莫可枚舉蠻勢之衆
與滇爲埒今就其尤著者列於篇觀其叛服不常沿革殊致可以覘中國之德威知夷情之順逆爲籌邊者之
一助云

桂林

明史傳云桂林自秦置郡漢始安唐桂州天寶改建陵宋靜江府元靜江路明初改桂林府爲廣

西布政使司治所屬內地不嘗列於土司然廣西惟桂林與平樂潯州梧州未設土官而無地無徭獠桂林之

古田平樂之府江潯州之藤峽梧州之岑溪皆煩大征而後克卒不能草薶而獸獮之設防戢戢世爲患是亦不得而略焉

明宣宗宣德六年命廣西土官衙門詞訟就近衛理之從都督山雲奏謂廣西左右兩江設土官衙門大小四十九處蠻性無常營殺不絕朝廷每命臣同巡按御史三司官理斷緣諸處皆瘴鄉兼有蠱毒三年之間遣官往彼死者凡七十八事竟不完今同衆議奏除土官衙門軍務重事外不必徑詣其處報可

柳州置自唐貞觀中宋以馬平縣爲柳州治度宗時移柳州治於柳城縣以馬平爲屬元世祖至元十三年置安撫司十六年改柳州路總管府領縣三曰柳城曰馬平曰洛容

明成祖永樂七年柳州九年賓州十四年融州十九年融縣蠻搖作亂官軍討平之宣德初蠻寇覃公旺作亂據思恩縣大小富龍三十餘峒以拒官軍總兵顧興祖等督兵分道攻之斬公旺并其黨千五十餘人捷至帝曰蠻民亦朕赤子殺至千數豈無脅從非辜者以後宜開示恩信撫慰而降之如賈琮戍交州可也二年廣西三司奏柳慶等府賊首韋萬黃韋朝傳等聚衆劫殺爲害敕興祖進兵剿平之

慶遠

東蘭等州附

秦象郡漢交趾日南二郡界後淪於蠻唐始置粵州天寶初改龍水郡屬嶺南道乾符中

更宜州宋升慶遠軍節度咸淳初改慶遠府至元十三年置安撫司十六年改慶元路總管府元大德元年中書省言南丹州與慶遠路相去爲近所隸戶少請省之遂併附安立安撫司明史傳曰正統四年莫禎南丹土官

奏本府所轄東蘭等三州土官所治歷年以來地方甯靖宜山等六縣流官所治溪峒諸蠻不時出沒原其所自皆因流官能撫字附近良民而溪峒諸蠻恃險爲惡者不能鈐制其出沒每調軍剿捕各縣居民與諸蠻結納者先漏洩軍情攻城潛遁及聞招撫詐爲向順仍肆劫掠是以兵連禍結無甯歲願授臣本州土官知府流官總理府事而臣專備蠻賊務禽捕殄絕積年爲害者其餘則編伍造冊使聽調用據巖險者拘集平地使無所恃擇有名望者立爲頭目加意撫恤督勵生理各村寨皆置社學使漸風化三五十里設一堡使土兵守備凡有寇亂卽率衆剿殺如賊不除地方不靖乞究臣誑罔之罪帝卽敕總兵柳溥曰以蠻攻蠻古有成說今莫顧所奏意甚可嘉彼果能效力省我邊費朝廷豈惜一官爾其酌之

平樂 唐置樂州復改昭州宋因之地界桂梧西北近楚清湘九疑鬱相繆結東南入梧溪峒林菁多爲播人盤據元成宗元貞二年廣西賊陳飛雷通藍青謝發寇昭梧藤容等州湖廣左丞巴特瑪淋沁擊平之天德五年升爲府 明史傳曰右江十寨隆慶中總督殷正茂擊破古田卽以檄趣八寨歸降得貸死於是寨老樊公懸韋公良等踵軍門上謁自言十寨共一百二十八村環村而居者二千一百二十餘家皆請受賦右江兵備椰一龍參將王世科謂十寨旣請爲氓當以十家爲率賦米一石村立一甲長寨立一峒老爲徵賦計久之十寨復聚黨作亂據民田產白晝入都市剽掠甚至攻城劫庫戕官民總制劉堯誨巡撫張任急統兵進剿分八寨爲三鎮各建一城

胡侯榮四姓爲渠魁力山又有種人善傳毒藥弩矢中人無不立斃四姓猶亦憚之云

明英宗天順七年大藤峽賊大掠梧州 時總兵官陳涇駐兵城中會太監朱祥等議調兵夜半賊駕梯上城

涇不覺遂入府治劫庫放囚殺死軍民無算大掠城中執副使周璫爲質涇等倉卒無計惟擁兵自衛隨軍器械并備賞銀物皆爲賊有布政使宋欽致仕家居挺身出以大義諭賊爲所害黎明賊聲言官軍若動則殺周副使涇等乃遣人與賊講解晡時縱之出城賊既出乃縱璫還時官軍數千賊僅七百而已都指揮邢斌奏至帝以梧州蕞爾小城總兵鎮巡三司俱擁重兵駐城中乃爲小賊所蔑視命兵部卽議處行

憲宗成化元年命僉都御史韓雍等率兵討大藤峽賊 兵部尙書王竑以峽賊稱亂日久皆由撫臣以招撫爲功致釀大患非大創不止因薦雍有文武才同征蠻將軍趙輔等率師討之時賊三千餘陷南平又入藤縣城十一月大兵次潯州謀深入以覆其巢分兵十五哨水陸並進腹背交攻連日鏖戰賊不能支破賊寨及斬獲溺死者不可勝計改大藤峽爲斷藤峽刻石紀之

武宗正德十一年總督陳金復督軍征府江諸蠻 金調兩廣官軍土兵分爲六哨水陸並進斬七千五百六十餘級金謂諸蠻利魚鹽耳乃與約商船入峽者計船大小給之魚鹽蠻就水濱受去如權稅然不得爲梗蠻初獲利聽約道頗通金以此法可久易峽名永通諸蠻緣此無忌大肆掠奪稍不愜卽殺之因循猖獗江路爲斷時總督王守仁定田州還兩江父老遮道言峽賊阻害狀守仁上疏請討報可乃率湖南兵至南甯約日會

兵寇開湖兵且至皆逃匿守仁故爲散遣諸兵狀寇弛不備乃合官軍突進連破油磔石壁大皮等寨賊奔斷藤峽復追擊破之賊奔渡橫石江溺死俘斬甚衆賊潰散遂移兵仙臺花相白竹古陶羅鳳諸處賊不支奔入永安力山官軍次第破之禽斬俘獲無算八寨平兩江悉定

南甯

故稱邕管泮河峙其西北交趾踞其西南三十六洞錯壤而居延袤幾千里橫山永平尤要害歷

唐及宋建牙置帥與桂州等初元至元十六年立邕州路總管府兼左右兩江溪洞鎮撫泰定元年改爲路領縣二曰宣化曰武緣 初南甯衛指揮僉事左君弼覈民之無籍者爲軍又繼所部入山伐木民多擾遂相構

爲盜旋討平之 明史土司傳曰南甯郡地夷曠可宿數萬師成化時征田州及經略南安舉弭節茲土後因

搖蠻不靖往往仗狼兵急則藉爲前驅緩則檄爲守禦諸徭乃稍稍驕恣不可盡繩以法議邕事者謂宜開重

鎮以復邕州督府之舊云領州四曰新甯曰橫州爲流官曰上思州曰下雷州爲土官上思州土官子孫叛服

不常弘治十八年改流官嘉靖後仍以土官襲下雷州明初印失廢爲峒屬鎮安府嘉靖後改屬南甯

原二百四十五

太平

漢屬交趾號麗江唐爲羈縻州隸邕州宋平嶺南於左右二江溪峒立五寨其一曰太平與古萬

遷隆永平橫山四寨各領州縣峒屬邕州建武軍節度元仍爲五寨後廢乃置太平路於麗江 明改路爲府

初太祖以左江太平土官黃英衍等遣使齋印詣平章楊璟降旋遣中書照磨蘭以權齋詔往諭左右兩江溪

峒官民曰騰茲兩江地邊南徼風俗質樸自唐宋以來黃岑二氏代居其間世亂則保境土世治則修職貢良

由其審時知幾故能若此頃者命將南征八閩克靖兩廣平定爾等不煩師旅奉印來歸嚮慕之誠良足嘉尚其益懋厥職以安居民以權至廣西衛鎮撫彭宗等以兵護送將抵兩江適來賓洞蠻寇掠楊家寨居民以權謂衆詔遠來見賊不擊何以庇民乃督宗等擊之賊敗走遂安輯其地兩江皆懽服焉洪武二年乃改府。

思明 唐置州隸邕州都督府宋隸邕永平寨元改爲路

明洪武初改路爲府二十九年遣使諭安南還思明舊地 土官黃廣成奏自故元改思明路所轄左江一路州縣峒寨東至土思州南至銅柱元兵征交趾去銅柱百里設永平寨置兵戍守命交人供其軍餉元季擾亂交人以兵攻破永平寨遂銅柱二百餘里侵奪思明屬地邱溫如營慶遠淵脫等五縣逼民附之以是五縣歲賦皆土官代輸前者本府失理於朝遂致交人侵迫益甚及告禮部立站於洞登洞登寶思明地而交趾乃稱屬銅柱界蒙朝廷遣官覈其事建武志尙可考乞敕安南還舊封庶疆域復正歲賦不虛帝令戶部錄所奏遣官往諭安南三十年安南王陳日焜議論往復久而不決以譯者言不達意復爲書曉之安南終辯論不已無還地意廷臣議其抗命當誅帝以蠻人怙頑不悛終必取禍姑待之三軍廣成又奏安南侵奪其祿州西平州永平寨地請遣使諭還從之

世宗嘉靖四十一年以剿平猺獞功命土官知州男黃承祖暫襲本職 明史傳曰崇禎十一年總督張鏡心

疏報土官殺賊官思明州黃日章黃德志等鼓衆叛逆帝令速禽首惡以靖地方論者以黃玠神奸身道大整

世濟其兇傳及四世猶併思明州而有之王綱驍矣然骨肉相屠至是四見蓋天道云 又曰州更土官趙氏何氏黃氏凡三姓皆絕始改流官

思恩 漢屬交趾唐爲州屬邕乃澄州止戈縣地宋開寶間廢澄州以止戈賀水無虞三縣省入上林治平間以上林之止戈入武緣隸邕元屬田州路歷代羈縻而已

明萬曆七年督撫吳文華謂九司日以騷擾編氓甚少緩急難恃請割南甯武緣縣屬思恩自是稱巨鎮云

鎮安

歸順州附

宋建右江宣撫司元改鎮安路 明改路爲府 歸順州舊爲峒隸鎮安府永樂間鎮安知

府岑志綱分其第二子岑永綱領峒事傳子瑛屢率兵報效弘治九年總督鄧廷瓚言鎮安府之歸順峒舊爲州治洪武初裁革今其峒主岑瑛每效勞於官乞設州治授以土官知州凡出兵令備土兵五千仍歲領土兵二千赴梧州聽調詔從之增設流官吏目一員瑛死子璋襲後從璋奏以本州改隸布政使璋多智略田州岑猛以不法獲譴都御史姚鏜將舉兵討之璋猛婦翁也鏜慮璋黨猛召都指揮沈希儀謀希儀雅知璋女失寵恨猛又知部下千戶趙臣雅營璋希儀因使趙巨語璋圖猛璋受命時猛子邦彥守工堯隘璋詐遣兵千人助邦彥言天兵至以姻黨故且與爾同禍今發精兵來幸努力堅守邦彥欣納之璋遣人報希儀曰謹以千人內應矣時田州兵殊死戰諸將莫利當隘者希儀獨引兵當之約戰三合歸順兵大呼曰敗矣田州兵驚潰希儀麾兵乘之斬首千餘級邦彥死焉猛聞敗欲自經而璋先已築別館使人請猛時猛倉皇不知所出遂擊印從

璋使走歸順璋詭爲猛草奏促猛出印實封之璋既知猛印所在乃鳩殺猛斬其首并府印函之間道馳軍門爲讒言所阻竟不論功

田州 古百粵地漢屬交趾郡唐隸邕州宋始置田州屬邕州橫山寨元改置田州路 明初改路爲府

省來安府入焉後改州領縣一曰上林

孝宗弘治十八年以流官掌田州府事 先是十二年岑溥爲子琥所殺琥亦自殺次子猛方四歲溥母岑氏

及頭目黃曠護之赴制府告曠歸至南甯頭目李蠻來迎曠慮蠻奪己權殺其使蠻率兵至舊田州曠懼還蠻將爲變乞以兵納乃調思恩岑潛率兵衛猛潛受曠賂納其女挾猛約分其大甲地比至田州蠻拒不納曠復以猛奔思恩幽之事覺總督鄧廷瓚檄副總兵歐磐等攝潛久乃出猛置於會城得奏命猛襲知府曠潛怒其事之不由己出也要泗城岑接東蘭韋祖鉉各起兵攻變接兵二萬先入田州殺掠男女驅之溺水死者無算括府庫放兵大掠城郭爲墟潛兵二萬攻舊田州據之殺掠男女五千三百餘人蠻逃去歐磐及參政武清等詣田州府勸治遣兵送猛還府曠懼罪匿潛家有司請治潛罪初蠻之迎猛也無他念及猛在外蠻守土以待其歸曠爭權首亂潛接祖鉉黨惡以致茲變潛受潛賂曲右之且誣蠻占據府治阻兵弄權事竟不直於是廷瓚言思恩岑潛罪惡正在逐捕而田州岑猛亦宜乘此區畫降府爲州毋基異日尾大之患從之至是廷議以思恩既平宜設流官岑猛世濟兇惡致陷府治宜降授千戶而遴選才望者假以方面職銜守田州仍賜敕以

重其權帝然之於是以平樂知府謝湖爲右參政掌府事時岑猛已降福建平海衛千戶遷延不行及湖至復陳兵自衛令祖母岑氏奏乞於廣西極邊率部立功以便祭養而總督陳金奏猛據薊巢要求府佐不赴平海衛參政謝湖不卽赴任爲猛所拒納餽遺而徇其要求宜速問時猛遣人重賂劉瑾得旨留猛而觀湖會江西盜起陳金檄猛從征猛所至剽掠然以賊平論功遷指揮同知

世宗嘉靖六年田州告捷於京師 岑猛論功遷官非其初意頗怨望先是二年率兵攻泗城拔六寨遂克州治岑接告急於軍門言猛無故興兵攻寨猛言接非岑氏後據其祖業欲得所侵地時方有土思州之役徵兵皆不至四年提督盛應期巡按謝汝儀議大征猛條征調事宜而應期以他事去詔以都御史姚鏜代命懸金購猛然鏜知猛無反心猛方奏辯鏜亦緩師而汝儀與鎮卻乃誣鏜之子涑納猛萬金廉得涑書獻之鏜惶恐乃再疏請征於是部趣鏜期進鎮借總兵官朱麟發兵八萬以都指揮沈希儀張經等統之分道並入猛闕大兵至令其下毋交兵裂帛書冤狀陳軍門乞憐鏜不聽督兵益急沈希儀斬猛長子邦彥於工堯隘猛懼謀出奔而歸順州知州岑璋猛婦翁也其女失愛璋欲藉此報猛甘言誘猛走歸順鳩殺之斬首以獻六年鏜以田州平告捷京師乃請改田州爲流官井陳善後七事詔俱從之

七年新建伯王守仁撫定田州 明史傳曰守仁威名素重及督軍務調兵數萬人至諸蠻心懼守仁至南甯道見王受等勢盛度亦未可卒滅上疏極陳用兵利害兵部議所見未確復陳五事令詳計其宜於是守仁又

疏云思田禍結兩省已踰二年今必欲窮兵盡剿則有十患若罷兵行撫則有十善臣與按臣及藩臬諸將領等據心極論今日之局撫之爲是臣抵南甯遂盡撤調集防守之兵數日內解歸者數萬惟湖兵數千道阻遂仍使分留南甯解甲休養待間而動而慮蘇王受願得歸境投生乞有一死臣等論以朝廷威德令齋飛牌歸巢曉諭期以速降無死蘇受等皆羅拜跣躐歡聲雷動尋率衆至南甯城下分屯四營蘇受等囚首自縛與頭目數百人赴軍門請命臣等復諭之曰朝廷既赦爾罪爾等擁衆負固騷動一方若不示罰何以雪憤於是下蘇受於軍門各杖一百乃解其縛又諭之曰今日有爾死者朝廷好生之德必杖爾者人臣執法之義衆皆叩首悅服願殺賊自贖臣隨至其營撫定其衆七萬餘人於二月二十六日悉命歸業不折一矢不傷一人而全活數萬生靈卽古舞干之化奚以加焉疏聞帝嘉之 又曰帝遣行人齋散獎賚於是守仁復疏曰田州外捍交趾內屏各郡深山絕谷猿獠盤據使盡誅其人異日雖欲改土爲流誰爲編戶非惟自撤其藩籬而拓土開疆以資鄰敵非計之得也今岑氏世效邊功猛獨註誤觸法雖未伏誅聞已病死臣謂治田州非岑氏不可請降田州府爲田州而官其子以存岑氏之後查猛有二子長邦佐自幼出繼爲武靖知州武靖嘗擒賊之衝邦佐才足制馭宜仍舊職而今所建州請以猛幼子邦相受吏目署州事俟後遞升爲知州以承岑氏之祀設土巡檢諸司卽以盧蘇王受等九人爲之以殺其勢添設田甯府統以流官知府以總其權從之 又曰八年守仁於思田既議設流官又議移南丹衛於八寨改思恩府城於荒田改設鳳化縣治於三里添設流官縣於思

龍增築五鎮城堡於五屯及侍郎林富繼之又言田州界居南甯泗城交通雲貴交趾爲備非一不宜改設流官南丹衛設在賓州既不足以遠制八寨遷八寨又不得以還護賓州爲今日計獨上林之三里守仁所議設縣者遷南丹衛於此夫設縣則割賓州之地以益思恩是顧彼而失此也遷衛則扼八寨之吭以還護賓州是一舉而兩得也然不宜屬田州而仍屬南甯爲便其議與守仁頗有異同詔從富言

泗城

宋置隸邕州橫山寨元屬田州路其界東抵東關西抵上林長官司南抵田州北抵永甯明初移

治古澗洞隸廣西

明史傳曰弘治十八年泗城土官岑九仙奏自始祖岑彭以來世襲土官至豹子應羅岑

欽之禍子孫滅亡殆盡其弟接衆推護印累著勞動乞令襲職俾轄蠻衆兵部尙書劉大夏等議約乃叛臣餘孽子應復自取滅亡今接者人皆傳稱爲梁接非應親枝又不知岑九仙是何人逃冒爲奏擾大夏先在兩廣見岑氏譜岑之始祖木納罕於元至正年間與田州知府之祖伯顏一時授官今九仙妄援漢岑彭世次應廣聖聽請治其罪其岑接應襲與否前已令鎮巡官勘奏岑九仙雖蠻人難以深究亦當摘發以破其奸從之

龍州

古百粵地漢屬交趾宋置龍州隸太平寨元大德中升爲萬戶府 明改龍州隸廣西布政司

奉議

宋置州初屬靜江軍節度使後屬廣西經略安撫司元屬廣西兩江道宣慰司 明史傳曰嘉靖

四年田州岑猛叛奉議土官嘗助猛攻泗城州提督盛應期許其自新令出兵討賊以功贖罪後土官知州死皆以土判官寧州事論者以奉議彈丸地三面交迫田州獨南界鎮安其勢甚感明初置衛銓官如堵死故事

蓋欲中斷田鎮以伐其謀云

廣東瓊州

謹按瓊州自明洪武時已升爲府特以其地多黎岐故明史土司傳標瓊州二字以目之卽

如前湖廣四川貴州雲南廣西俱用府州名之意也

元世祖至元十五年以瓊州路屬海北海南道宣慰司

瓊州居環海中漢武帝平南粵始置珠崖儋耳二郡

歷晉隋唐宋叛服不一至是改置瓊州路文宗天曆二年又改乾甯軍民安撫司

明洪武元年改瓊州府

孝宗弘治十五年黎賊符南蛇反鎮兵討之

時戶部主事馮馬奏府治在大海南

有五指山峒黎人雜居外有三州十縣一衛十一所永樂間置土官州縣以統之黎民安堵如故成化間黎人作亂三度征討將領貪功殺戮無辜迨知府張桓余濬貪殘苛斂大失黎心釀成今日南蛇之禍臣本土人頗知時勢乞仍考原設應襲土官子舍使集土兵可得數萬聽鎮巡官節制有能禽首惡符南蛇者復其祖職此以蠻攻蠻不數月可奏績矣詔從之

世宗嘉靖十九年崖萬二州黎岐叛

給事鄭廷鵠條陳三事下部議行之

奏略曰瓊州諸黎盤居山峒而

州縣反環其外其地彼高而我下其土彼膏腴而我鹹鹵其勢彼聚而我散故自開郡來千六百餘年無歲不遭黎害然無如今日甚矣今日黎患非九千兵可辦必添調狼土官兵兼召募打手集數萬衆一鼓而四面攻之然後可克嘗考剿除黎患其大舉有二元至元辛卯曾空其穴勒石五指山其時雖建屯田府立定安會同

二縣惜其經略未盡故所得旋失嘉靖庚子又嘗大渡師徒攻毀巢岡無處不至於是議者謂德置地勢平行擬建城立邑招新民耕守業已舉行中道而廢旋爲賊資以至復有今日謹條三事一崖黎三面郡縣惟東南連耶温脚二峒岐賊實當萬州陵水之衝崖賊被攻必借二峒東江以分我兵勢計須先分奇兵攻二峒而以大兵徑擣崖賊彼此自救不暇莫能相顧則殲滅可期傳聞賊首那燕已入凡陽搆集岐賊此必多方誤我且訛言搖惑以堅諸部助逆之心宜開示慰安以解狐疑之黨一隋唐郡縣輿圖可考今多陷入黎中蕩平後悉宜恢復并以德置子家羅活等膏腴之地盡還州縣設立屯田且耕且守仍由羅活磨斬開路以達安定由德置沿溪水以達昌化道路四達井邑相望非徒懾奸銷萌而王路益開拓矣一軍威旣振宜建參將府於德置各州縣許以便宜行事以鎮安人心其新附之民中有異志者或遷之海北地方屯田或編入附近衛所戎籍如漢徙澠山蠻故事又擇仁明慈惠之長久任而安輯之則瓊人受萬世利矣 明史傳曰瓊州黎人居五指山中者爲生黎不與州人交其外熟黎雜耕州地原姓黎後多姓王及符熟黎之產半爲湖廣福建奸民亡命及南恩藤梧高化之征夫利其土占居之各種酋首成化間副使涂榮設計犁掃漸就編差弘治間符南蛇之亂連郡震驚其小醜侵掠無時而息云

原二百四十六

●西域臣等謹按一統志哈密所屬編爲旗分視各蒙古固不得外視之矣今從前史舊文仍列西域

哈密衛 元末以威武王古納寶哩鎖哈密尋改爲肅王 明史傳曰東去嘉峪關一千六百里漢伊吾

慮地明帝置宜禾都尉領屯田唐爲伊州宋入回紇

明成祖永樂二年六月封哈密王愷克特穆爾爲忠順王已而病卒三年以兄子托克托自幼俘入中國拔之奴隸中俾列宿衛欲令嗣爵四年三月立哈密衛以其頭目爲指揮千百戶等官明年頭目陞十等作亂帝命甘肅總兵宋晟發兵應之并敕開誠撫托克托八年托克托以暴疾卒擢都指揮同知哈喇哈納爲都督兼事鎮守其地且封托克托從弟穆爾特穆爾爲忠義王世守哈密 明史傳曰初成祖之封忠順也以哈密爲西域要道欲其巡護朝使統領諸番爲西陲屏蔽而其王率庸懦又其地種落雜居一曰回回一曰輝和爾一曰哈拉呼其頭目不相統屬王莫能節制衆心離渙國勢漸衰及多卜丹實哩立都督丕勒蘇潛通威喇特孟克布哈等謀殺王不克王父在時納沙州叛亡百餘家屢敕王令還止還其半其使臣肆誚言天子不加罪但令慎擇使臣以是益無忌其地北威喇特西吐魯番東沙州罕東徹辰諸衛悉與構怨由是鄰國交侵罕東兵抵城外掠人畜去沙州徹辰先後兵侵皆大獲威喇特會額森王母諸親達喇錫哩弟也亦遣兵圍哈密城殺頭目俘男婦掠牛馬駝不可勝計取王母及妻北還晉王親詣威喇特迄不能自振時會額森方東犯不復還故土以是哈密獲少安

英宗天順元年封哈密伯勒格爲忠順王 伯勒格者多卜丹實哩弟也時以多卜丹實哩卒故封之

憲宗成化二年命擢巴達瑪爲右都督攝行哈密國王事 自伯勒格之亡親屬無可襲者頭目阿齊等冒托

金定編三編卷之二十一
歡特穆爾外孫巴達瑪可繼王母謂臣不可繼君國無王者八年至是頭目交章請詞極哀乃有是命八年其子哈沙以父卒請嗣職帝許之而不命其主國事國中政令無所出吐魯番蘇爾坦阿里乘機襲破其城執王母奪金印以忠順王孫女爲妾據守其地九年四月事聞遣都督同知李文等赴甘肅時阿里留其妹婿伊楞守哈密而已攜王母金印返吐魯番文等檄哈沙及徹辰罕東納克賽諸部集兵進討十年冬兵至布隆濟爾川不敢進哈沙等退去苦峪文等亦引還肅州帝乃命哈沙權主國事并命邊臣築苦峪城移哈密於其地十八年春哈沙糾罕東徹辰二衛兵與己所部共萬人夜襲破哈密城伊楞遁走乘勢連復八城遂遷居故土事聞進左都督并將士陞賞有差

孝宗弘治元年封哈沙爲忠順王 時吐魯番阿里已死其子阿哈瑪特嗣爲蘇爾坦僞與哈沙結婚誘而殺之仍令伊楞據其地明年哈密舊部綽克圖等請邊臣調徹辰罕東兵夜襲破其城伊楞遁

五年春命立善巴爲忠順王 尙書馬文升言番人重種類且素服蒙古哈密故有回回輝和爾哈拉呼三種北山又有舒嚕克圖納克賽相侵還非得蒙古後裔鎮之不可今安定王族人善巴乃故忠義王托克托近族從孫可主哈密帝以爲然而諸番亦具奏善巴當立故有是命已而諸番索善巴犒賞不得六年春阿哈瑪特潛兵夜襲哈密執善巴伊楞復據守焉

七年阿哈瑪特遣使詭言願還善巴及哈密 先是伊楞據哈密變開大學士邱濬欲馬文升經略西陲文升

以番人嗜利不習騎射自古未有西域能爲中國患者徐當靖之潛復以爲言文升請行廷議以本兵未可遽出乃推右侍郎張海都督同知侯謙二人皆庸才但遣吐魯番人歸諭其主駐甘州待之至是阿哈瑪特諛言願還善巴海等以聞廷議以善巴被虜孱弱可知即使復還勢難復立宜革其王爵居之甘州糶糴安定王諭以不復立之故令都督恩克布拉克和爾總理哈密事與賽音和碩係回拜達勒默色係哈等分領三種番人以輔之且修潛苦峪城墜凡番人散處甘涼者令悉還其地給以牛具口糧我不急索善巴彼將自還也帝如其言敕諭海等喜甚卽如諭閉嘉峪關修苦峪城令流寓番人歸其地拜疏還朝言官交章劾其無功並下吏貶秩而哈密終不還

十年阿哈瑪特送還善巴及哈密之衆先是八年馬文升銳意謀興復用許進巡撫甘肅備大將劉甯等潛師夜襲伊楞逸去斬其餘卒撫降餘衆而還自明初以來官軍無涉其地者至是諸番始知所畏又以朝廷閉關絕貢咸怨阿哈瑪特阿哈瑪特悔乃送善巴及哈密之衆還冬起王越總制三邊軍務兼經理哈密越言哈密不可棄善巴亦不可廢宜仍其舊封令先還哈密量給修城築室之費輜賜三種番人及徹辰罕東舒瞻克圖納克賽諸部以獎前勞且責後效報可自是哈密復安

武宗正德十二年冬吐魯番復奪哈密城據之

世宗嘉靖七年總兵王瓊希時貴指必欲議撫因言番人且悔宜原情赦罪並上潛等功狀章下兵部尙書胡

世甯乞如先朝棄交趾故事力言哈密不必興復帝然之自是置哈密不問許吐魯番通貢西陲藉以息肩而哈密後爲寶保雅達子穆爾嗎哈穆特所有服屬吐魯番迄隆慶萬曆朝猶有入貢者然非忠順王苗裔也

明史傳曰當嘉靖時番寇屢犯邊城當局者無能振國威以雪讎恥而一二新進用事者反借以修怨由是封疆之獄起百戶王邦奇者素憾楊廷和彭澤嘉靖六年春上言澤賂番求和廷和論殺賽音和碩誅此兩人庶哈密可復賊不內侵桂夢張璠欲藉此興大獄斥廷和澤爲民盡置其子弟親繫於理有自殺者復遣官往案番酋伊楞言非敢獲罪天朝所以犯邊由冤殺賽音和碩寶保雅達二人故今願獻還城印贖前罪事下兵部夢以前獄未竟必欲重興大獄與禮兵二部尙書方獻夫王時中等協議爲挑激之詞言宜嚴覈激變虛竇又九疇報捷時稱瑪克蘇爾阿拉克已斃礮石下二人實未死帝固疑之覽夢等奏益疑邊臣欺罔詔責九疇欲置之死尙書金獻民侍郎李昆以下坐累者四十餘人七年正月九疇逮至下獄夢等必欲殺之并株連廷和澤刑部尙書胡世甯力救帝稍悟九疇免死澤獻民等皆落職番酋氣益驕而夢又薦王瓊督三邊盡釋還九疇所繫番使許通貢番酋迄不悔罪侮玩如故 顧炎武日知錄曰唐之吐番卽今之吐魯番回紇卽今之

回回是也唐書回紇一名回鶻元史有輝和爾部卽回鶻也其曰回回者亦回鶻之轉聲也

元史太補紀以回鶻回回爲二國恐

非其曰輝和爾者又回鶻之轉聲也

冊府元龜按國史敘鐵勒種類云伊吾以西烏耆以北有契弊烏護紇骨等部契弊則契苾也烏護則烏紇也後爲回鶻紇骨則紇挖斯也轉爲詰

曼斯蓋番音有緩

總卽傳譯語不同明會哈密古伊吾廬地在燉煌北大磧外爲西域諸番往來要路其國部落與回回輝和爾

三種雜居則回與輝和爾又爲二種矣

鄭所南心史輝和爾乃黠
詛爲父回回爲母者也

柳城 謹按明史西域傳柳城火州與吐魯番並列今以一統志考之吐魯番初與柳城俱屬火州後乃併有火州柳城之地 國初內附貢使不絕編旗駐牧於瓜州實蒙古屬國也

明成祖永樂四年五月命使齎綵幣賜柳城酋長 正統時並入貢後不復至 明史傳曰一名醫陳又名柳陳城卽後漢柳中地西域長史所治唐置柳中縣西去火州七十里東去哈密千里經一大川道旁多骸骨相傳有鬼魅行旅早暮失侶多迷死出大川渡流沙在火山下有城屹然廣二三里卽柳城也四面皆田園流水環繞樹木陰翳土宜稌麥豆麻有桃李棗瓜葫蘆之屬而葡萄最多小而甘無核名玳瑁葡萄畜有牛馬羊駝節候常和土人純樸男子椎結女子蒙皂布其語音類輝和爾蓋邇火州及吐魯番後吐魯番強二國爲所滅

火州

明成祖永樂四年五月命以綵幣賜火州王子哈撒 正統十三年後不復至 明史傳曰又名哈喇在柳城西七十里吐魯番東三十里卽漢車師前王地隋時爲高昌國唐太宗滅高昌以其地爲西州宋時回鶻居之元名火州與安定曲先諾衛統號輝和爾置達魯噶齊監治之其地多山青紅若火故名火州氣候熱五穀畜產與柳城同城方十餘里僧寺多於民居東有荒城卽高昌國都漢戍已校尉所治西北連巴實伯里國小不能自立後爲吐魯番所并

吐魯番

明成祖永樂五年吐魯番遣使達京師 明史傳曰在火州西百里去哈密千餘里嘉峪關二千六百里漢車師前王地嘗入貢元設萬戶府 謹按葉隆禮契丹國志高昌都交河城漢車師前王庭也四面多大山石積氣候溫暖厥土夏沃麥一歲再熟宜蠶有草名羊刺其上有蜜而味甚佳引水溉田出赤鹽其味甚美俗事天神兼信佛法其官有八長史有王將軍又有侍郎校郎至部從事階位相次亦有互市其國主親與北主評價又元史太祖紀十八年夏定西域諸城置高昌等達瞻噶齊監治之時號爲輝和爾地猶未稱吐魯番也

西番諸衛 謹按一統志明西番地 國初爲厄魯特古寶罕所有遣使修貢後自分爲左右二境部落散處其間謂之西海諸台古今仍明史舊文稱西番諸衛

元世祖至元時設吐番等處宣慰司 西番卽西羌族衆最多自陝西歷四川雲南西徼外皆是其散處河湟洮岷間者爲中國患尤劇漢趙充國張奐段熲唐哥舒翰宋王韶之所經營皆其地元封駙馬章庫爲甯濠郡王鎮西甯河州設吐番宣慰司以洮岷黎雅諸州隸之統治番衆

明太祖洪武四年正月設河州衛所皆命其酋長爲之帶刀侍衛嗣改西甯州爲衛并與西番市焉 謹按元史世祖紀及諸王表百官志釋老傳當其初起朔方固已崇尚佛教及得西域以其地廣而險遠民獷而好鬪思有以因其俗而柔其人乃郡縣吐番之地設官分職立總制院而領以國師至世祖至元二十五年十一月

因唐制吐番來朝見於宣政殿之故更名宣政院掌釋教以僧徒及吐番之境而隸治之其後又設吐番等處宣

慰司此明史西域傳之所據也惟喇馬章庫則元史作喇馬昌吉爲小異耳

成祖永樂時西番諸衛僧戒行精勤者悉給印誥許世襲洪武時西甯番僧薩喇爲書招降罕東諸郡又建

佛刹於碾白南川以居其衆及來朝請敕護持賜寺額名瞿曇寺立西甯及河州番漢凡三僧綱司其徒遂爭

建寺輒錫嘉名番僧來者日衆至是又多授喇嘛禪師灌頂國師之號有加至大國師西天佛子者由是族衆

輻輳京師見土實考西番之勢益分其力益弱西陲之患亦益寡至宣德元年以協討安定庫春功加封國師圖薩

巴凌屢等各給誥印

武宗正德四年蒙古都魯額布勒鄂爾多斯襲西甯之青海據之西甯即古湟中其西四百里有青海又曰

西海水草豐美番人環居之專務畜牧素號樂土至是勒布勒二人獲罪其王擁衆西奔職知青海饒富大肆

焚掠番人失其地多遠徙其留者不能自存反爲所役屬自是甘肅西甯始有寇寇患九年寇詗知諸道軍將

擣其巢由河州渡黃河奔四川出松潘茂州境直走烏斯藏及大軍引還仍返海上惟鄂爾多斯遁去

世宗嘉靖三十八年北部諳達襲據青海縱掠諸番時諳達猖獗歲掠宣大諸鎮又凌青海富饒擄子賓圖

賓都等數萬衆襲據其地布爾罕竄走遂縱掠諸番已引去留賓圖據松山賓都據青海西甯亦被其患陸慶

中諳達受封修貢惟謹二子亦斂戢會烏斯藏有稱活佛者諸部多奉其教賓都乃以焚修爲名請建寺青海

及嘉峪關外爲久居計廷臣多言不可許帝竟從禮官言許之賓都既得請又迫脅番人使通道松潘以迎活佛四川守臣懼逼乞令詣達約束其子毋擾鄰境詣達乃以開市爲請萬曆二年冬許賓都市於甘肅賓都市於莊浪歲一次既而寺成賜額仰華先是額布勒據青海邊臣猶以外寇視之至是以詣達故竟視若屬番諸酋亦以父受王封不敢大爲邊患而洮州之變乃起洮州番人以河州奸民預其物貨入掠內地他族亦乘機爲亂上總督石茂華集軍分討斬獲甚衆諸番震恐誓不再犯乃還 明史傳曰番有生熟二種生番獷悍難制

熟番納馬中茶頗柔服後寔通生番爲內地患自青海爲寇所據番不堪剽劫私鑄皮幣曰手信歲時加饋曰添巴或反爲嚮導交迺無忌而中國市馬亦解至蓋已失捍外衛內之初意矣原夫太祖甫定關中卽法漢武朔河西四郡隔絕羌人之意建重鎮於甘肅以北拒蒙古南捍諸番俾不得相合又遣西甯等四衛上官與漢官參治令之世守且多置茶課司番人得以馬易茶而都維之長亦許其歲時朝貢自通名號於天子彼勢既分又動於利不敢爲惡卽小有蠢動邊將以偏師制之靡不應時底定自邊臣失防輒得越境闖入與番族交通西睡遂多事然究其時之所患終在敵而不在番故議者以太祖制馭爲善原二百四十七

烏斯藏

大寶法王等

謹按一統志烏斯藏自

本朝崇德七年卽遣使歸藏其後貢獻不絕後復遣大臣駐

防其地亦屬國也茲仍明史之舊附於西域

元世祖至元六年尊烏斯藏僧帕克斯巴爲大寶法王

帕克斯巴者吐蕃薩斯嘉人族款氏生七歲誦經數

十萬言通大義國號聖童故名帕克斯巴年十有五謁帝於濟邸大見親禮中統元年十二月尊爲國師至是遂升號大寶法王更玉印十六年卒賜大元帝師之號自是其徒嗣者咸稱帝師 明史傳曰在雲南徼外去雲南麗江府千餘里四川馬湖府千五百餘里陝西西甯衛五千餘里其地多僧無城郭羣居大土臺上不食肉取妻無刑罰亦無兵革鮮疾病佛書甚多楞伽經至萬卷其土臺外有娶妻食肉者 謹按元史世祖紀以梵僧八合思八爲帝師蓋卽帕克斯巴也若烏斯藏有宣慰使司等則百官志謂僧俗並用云

明太祖懲唐世吐蕃之亂思制御之惟因其俗尙用僧徒化導爲善乃遣使廣行招諭又令舉元故官赴京授職於是攝帝師遣使來京賜紅綺禪衣及綬帽錢物明年二月躬自入朝上所舉故官六十人悉授以職改攝帝師爲熾盛佛寶國師仍賜玉印玉人製印成帝眎玉未美令更製其崇敬如此 明史大寶法王傳曰永樂五年春帝將薦福於高后命建普度大齋於靈谷寺七日帝躬自行香 又曰正德時帝減近習言謂烏斯藏僧有能知三生者國人稱之爲活佛欣然欲見之考永宣間陳誠侯顯入番故事命中官劉允往迎關臣梁儲等並切諫俱不聽允行以珠璣爲幡幢黃金爲供具賜其僧金印犒賞以巨萬計內庫黃金爲之罄盡勅允往返以十年爲期所攜茶鹽以十數萬計允至臨清漕艘爲之阻滯入峽江舟大難進易以艣艘相連二百餘里及抵成都日支官廩百石蔬菜銀百兩錦官驛不足取傍近數十驛供之治入番器物估直二十萬守臣力爭減至十三萬工人雜造夜以繼日居歲餘始率將校十人土千人以行越兩月入其地所謂活佛者恐中國誘

害之匿不出見將士怒欲脅以威番人夜襲之奪寶貨器械以去 又曰神宗時有僧索諾木嘉木粗者能知已往未來之事稱活佛順義王諳達亦崇信之萬曆七年以迎活佛爲名西侵翰拉爲所敗此僧戒以好殺勸之東還諳達亦勸此僧通中國乃自甘州遣書大學士張居正自稱釋迦摩尼比丘求通貢獻以儀物居正不敢受聞之於帝帝令受之而許其貢由是中國亦知有活佛此僧有異術能服人諸番莫不從其教卽大寶法王及闡化諸番亦皆俯首稱弟子自是西方止知奉此僧諸番王徒擁虛位不復能施其號令矣 又大乘法王傳曰成祖封闡化等五王各有分地惟大寶大乘二法王以游僧不常厥居故其貢不在三年之列 又大慈法王傳曰初太祖招徠番僧本藉以化愚俗弭邊患至成祖兼崇其教自闡化等五王及二法王外禪師僧官不可悉數其徒交錯於道外擾郵傳內耗大官公私驟然帝不恤也然至者猶卽遣還及宣宗時則久留京師耗費益甚英宗初年雖多遣斥其後加封號者亦不少至孝宗踐阼法王以下皆驅還本土由是輩下復清 又曰武宗好習番語番僧復盛有封大慶法王者或言卽帝自號也世宗立復汰番僧法王以下俱被斥

朵甘

在四川徼外南與烏斯藏隣唐吐蕃地元世祖至元時置宣慰司招討司元帥府萬戶府分統其

衆 謹案元史稱朵甘思至明世則稱爲朵甘矣

明史傳曰初元尊番僧爲帝師授其徒國公等秩故降者

變警號索諾木鄂色爾者歸朝授朵甘衛指揮僉事以元司徒銀印來上命進指揮同知已而朵甘宣慰賞竹監藏舉首領可爲指揮宣慰萬戶千戶者二十二人詔從其請鑄分司印予之乃改朵甘烏斯藏二衛爲行都

指揮使司以索諾木鄂色爾爲朵甘都指揮同知袁楚克鄂色爾爲烏斯藏都指揮同知並賜銀印又設西安

行都指揮使司於河州兼轄二都司已佛寶國師索諾木鄂色爾等奏舉故官薩木珠卜噶藏等五十六人命

增置朵甘思宣慰司及招討等司

招討司六曰朵甘思曰朵甘薩達曰朵甘丹曰朵甘倉唐曰朵甘川曰以默爾根萬戶府四曰沙爾瑪曰肅珠曰羅斯端曰塔克瑪千戶所十七以

薩木珠卜噶藏爲朵甘都指揮同知餘授職有差八年置額塔蘇軍民元帥府尋置隆達衛指揮使司十八年以巴勒珠爾藏布爲烏斯藏都指揮使乃更定品秩自都指揮以下皆令世襲未幾又改烏斯藏安布羅衛爲行都指揮使司永樂元年改巴勒千戶所爲衛後置烏斯藏諾爾松結行都指揮使司又置上印部衛皆以番人官之 又曰明太祖以西番地廣人獷悍欲分其勢而殺其力使不爲邊患故來者輒授官又以其地皆食肉倚中國茶爲命故設茶課司於天全六番而入貢者又優以茶布諸番戀貢市之利且欲保世官不敢爲變迨成祖益封法王等俾轉相化導以共尊中國以故西陲宴然終明世無番寇之患

長河西

魚通南

謹按明史長河西魚通甯遠安撫司治礪門城卽元之礪門安撫司也更以一統志考

之則其地在大渡河外卽打箭爐已詳四川土司天全六番傳矣 明史傳長河西魚通甯遠在西川徼外地

通烏斯藏唐爲吐蕃成化十七年禮官言烏斯藏在長河西之西長河西在越嶲之南壤地相接易於混淆長

河西番僧往往詐爲烏斯藏諸番王文牒入貢賞乃給諸番王及長河西棟巴罕呼敕書勘合以防詐僞

棟巴罕呼

在四川威州之西其南與天全六番接

謹按景帝實錄四川巡撫李匡奏棟巴罕呼宣慰

使格塔克嘉勒桑欲求御製大誥周易尙書毛詩小學方輿勝覽成都記諸書因言唐時吐蕃求毛詩春秋於
休烈謂予之以書使知權謀愈生變詐非中國之利裴光庭謂吐蕃久叛新服因其有請賜以詩書俾漸陶聲
教化流無外休烈徒知書有權略變詐不知忠信禮義皆從書出明皇從之今茲所求予之爲便不然彼因貢
使市之書肆甚不爲難惟方輿勝覽成都記形勝關寨所具不可槩予命如其言

賽瑪爾罕

寶壘哈雅塔寶干賽哩木揚
益克實德爾默布哈爾附

元太祖平西域命易屬賓地名賽瑪爾罕

賽瑪爾罕卽漢濟必

地隋曰漕國唐復舊名皆通中國帝蕩平西域盡以諸王駙馬爲之君長易前代國名以蒙古語始有賽瑪爾

罕之名去嘉峪關九千六百里元末爲之王者駙馬特穆爾也 明史賽瑪爾罕傳曰二十七年賽瑪爾罕王

特穆爾上表有欽仰聖心如照世之杯語照世杯者其國舊傳有杯光明洞徹照之可知世事故云帝得嘉

其有文 明史傳曰其國東西三千餘里地寬平土壤膏腴王所居城廣十餘里民居稠密西南諸番之貨皆

聚於此號爲富饒城東北有土屋爲拜天之所規制精巧柱皆青石雕爲花文中設講經之堂俗禁酒人物秀

美工巧過於哈烈而風俗土產多與之同其旁近東有寶壘哈雅塔寶干賽哩木揚益西有克實德爾默諸部

落皆役焉 又寶壘哈雅傳曰寶壘哈雅西去賽瑪爾罕五百餘里城居小岡上西北臨河河名火站水勢衝

急架浮梁以渡亦有小舟南近山人多依崖谷而居園林廣茂西有大沙洲可二百里無水間有之鹹不可飲

牛羊誤飲之輒死永樂中李達陳誠使其地其酋遣使奉貢宣德間命中官李貴齎敕諭其酋 又塔寶干傳

曰塔實干西去賽瑪爾罕七百餘里城居平原周二里外多園林饒果木土宜五穀民居稠密李達陳誠李貴之使與實壘哈雅同 又賽哩木傳曰賽哩木在塔實干之東西去賽瑪爾罕千餘里有城郭周二三里四面平曠居人繁庶五穀茂殖亦饒果木元太祖時都元帥薛塔喇海從征賽哩木諸國以勲立功卽此地陳誠李貴之使與諸國同 又揚益傳曰在賽哩木東三百六十里城居亂山間東北有大溪西流入巨川行百里多荒城蓋其地介巴實伯哩蒙古部落之間數被侵擾以故人民散亡止戍卒數百人居孤城破廬頽垣蕭然榛莽永樂時陳誠至其地 又克實傳曰在賽瑪爾罕西南三百六十里城居大村周十餘里宮室壯麗堂以玉石爲柱牆壁牕牖盡飾金碧繞琉璃其先賽瑪爾罕酋長駙馬特穆爾居之城外皆水田東南近山多園林西行十餘里饒奇木又西三百里大山屹立中有石峽兩崖如斧劈行二三百里出峽口有石門色如鐵路通京西番人號爲鐵門關設兵守之或言元太祖至東印度鐵門關過一角獸能人言卽此地也 又德爾默傳曰在賽瑪爾罕西南去哈烈二千餘里有新舊二城相去十餘里其酋長居新城城內外居民僅數百家畜牧蕃息城在阿木河東多魚河東地隸賽瑪爾罕西多蘆林產獮子陳誠李貴嘗使其地 又布哈爾傳曰在賽瑪爾罕西北七百餘里城居平川周十餘里戶萬計市里繁華號爲富庶地卑下節序嘗溫宜五穀桑麻多絲綿布帛六畜亦饒永樂十三年陳誠自西域還所經哈烈賽瑪爾罕巴實伯里阿都古巴達克珊錫喇瑪實壘哈雅賽哩木克實揚益和卓柳城吐魯蕃嚴津哈密塔實干布哈爾凡十七國悉詳其山川人物風俗爲西域記

以獻以故中國得考焉

巴實伯里 元世祖時設宣慰司尋改爲元帥府其後以諸王鎮之 王圻曰憲宗分建諸王合丹於此

世祖立宣慰司以萬戶慕公直爲使後置元帥府領屯田 明史傳曰西域大國也南接于闐北連瓦剌西抵

賽瑪爾罕東抵火州東南距嘉峪關三千七百里或曰焉耆或曰龜茲其國無城郭宮室隨水草畜牧人性獷悍君臣上下無體統飲食衣服多與瓦剌同地極寒深山窮谷六月飛雪

哈里 阿都古巴 達克珊附 元附馬特木兒旣君賽瑪爾罕又遣其子薩哈勒據哈里洪武時賽瑪爾罕及巴實伯

里咸朝貢哈里道遠不至至永樂七年貢使始至 王圻曰在肅州西相去一萬一千餘里東北至賽瑪爾罕

一千四百里卽漢大宛也 明史傳曰一名赫魯在賽瑪爾罕西南三千里去嘉峪關萬二千餘里西域最强

大之國中築大土室中置一銅器周圍數丈上刻文字如古鼎狀游學者皆聚此若中國太學然 又阿都

古傳曰在哈里西北三千里東南去賽瑪爾罕亦如之城居大村周十餘里地平衍無險田土膏腴民物繁庶

稱樂土永樂時通貢 又巴達克珊傳曰在阿都古東北城東十餘里地廣無險阻山川明秀人物樸茂浮屠

數區壯麗如王居西抵西域諸賈多販鬻其間

于闐 明史西域傳曰于闐自古爲大國隋唐間侵并戎盧捍彌渠勒皮山諸國其地益大南距葱嶺二

百餘里東北去嘉峪關六千三百里至元末國王暗弱鄰國交侵避居出谷生理蕭條其國人民僅萬計 明

史于闐傳曰其國東有白玉河西有綠玉河又西有黑玉河源皆由崑崙出土人夜視月光盛處入水採之必得美玉其隣國亦多竊取來獻

阿克蘇

沙哈魯附

明永樂十七年曾雅呼沙遣使來朝 明史傳曰國近天方賽瑪爾罕幅員甚廣城倚山面川川南流入海有魚鹽之利人無饑寒雅稱樂土 又沙哈魯傳曰在阿克蘇西海島中永樂中遣七十七人來貢日給酒饌果餅異於他國其地山川環抱饒畜產人性樸直恥鬪好佛

天方

明宣德五年鄭和使西洋分遣其儕詣古里聞古里遣人往天方因使人齎貨物附其舟偕行往返經歲市奇珍異寶及麒麟獅子駝雞以歸其國王亦遣使隨朝英宗正統命附扎哈貢舟還六年王遣子賽特阿里與使臣以珍寶來貢陸行至哈喇遇賊殺使臣傷其子右手盡刼物去成化二十三年其國中回回阿里欲訪求其兄乃攜寶物鉅萬抵廣東爲市舶中官韋睿侵剋赴訴於京睿先已賈緣於內乃責爲問諜行奸逐之去阿里乃號泣而去正德初從太監谷大用言善馬出天方兵部尙書劉宇希其指議遣使諭之嘉靖五年其國遣使者爲額木都康等八王十一年稱王者至三十七人禮官以番文二十餘通皆以索取叛人雅穆拉爲詞恐託詞窺伺乞嚴邊備帝可其奏十七年其使臣請游覽中土禮官疑有倭心以非故事格之然常通朝貢迄萬曆

中不絕 明史傳曰天方古筠沖地一名天堂又曰默伽水道自和拉摩色四十日始至自古里西南行三月始至其貢使多從陸道入嘉峪關在西域爲大國四時常似夏回回瑪哈穆特首於此地行教俗禁酒有禮拜寺俱極壯麗瑪哈穆特墓後有一井水清而甘泛海者必汲以行遇颶風取水灑之卽息當鄕和使西洋時傳其風物若是其後稱王者至二三十人俗亦漸不如初矣

默德訥

謹按一統志回回土地隸入版圖及其人之入中國者直同於華夏之民今以其爲回回祖國

仍附西域

明史傳曰回回祖國也地近天方相傳其初國王瑪哈穆特生而神靈盡臣服西域諸國咸尊爲

別詣扶爾

猶言天使也

國中有經三十本凡三千六百餘段其書旁行兼篆草楷三體西洋諸國皆用之其教以事

天爲主而無像設隋開皇中始傳其教入中國迄元世其人徧於四方皆守教不替

坤城

明宣宗時有開中之令其使臣瑪里鼎等卽輸米一萬六千七百石於京倉中鹽及辭還願以所納米獻官帝曰回回善營利坤城西城曰回種故云雜名朝貢寶圖貿易可酬以直於是予帛四匹布倍之

西夏

宋史外國傳曰西夏本魏拓拔氏後其地則赫連國也唐貞觀初拓拔赤辭來歸賜國姓其後析

居夏州者號平夏部至末年拓拔思恭討黃巢有功復賜姓李 謹按宋史論夏在唐時雖未稱國而王其土

久矣子孫歷王五代宋祥符間德明已追帝其父於國中建元吳始顯稱帝厥後因之與金同亡槩其歷世二